




KOMPT HER ZV

ICH WILLE VCH ER O VICKEN. MA. J.
 ER ALS GOT IST DER
 A.
 Davv. v.
 Deine schaffe
 Hören meine stim
 und ich kenne
 sie und sie gē mir
 und ich bejaenda
 ewige leben und
 niemand wird
 sie aus meiner
 hand risse.
 OTTES
 VND BEI ADEN SIND.



51





NABAL

1. Samuelis 25.


Ein Nemes

weltliches spiel in deutsche
reyme vbersezt / vnd so wol eynem
Erbaren / Namhafftigen hochweyssen Rade
vnd ganker gemeyne der Königlichen
vnd weitberümbten stadt Danzig in
Preussen zu ehren / als zur vbung
der jugent im Gymnasio
daselbs agieret.

HENRICVS MOLLERVS
HESSVS.

Cum non esse queas Mimus, sis & oile Momus.

Gedruckt zu Danzig / durch
Jacobum Rhodum
M. D. LXiiij.



Dem Hoch-

wirdigen in Gott Fürstent
vnd Herrn/Herrn Stanislaw Kol-
mischen Bischof etc. vnd dem Edlen Ehrn-
uesten Herrn Frank von Snylaw/ Erb-
gesessen zu Meselank/ vnd Heubtmann
auff Risenburg etc. gebrüdern/ mey-
nen gnedigen vnd grosgunstigen
Herren/ wünsch ich

Ich erbietung meiner bereit-
willigen diensten/ von dem Ewigen
Gott alles heil/ wolffart vnd selig-
keit. Hochwürdiger in Gott Edler Ehrnues-
ter/ gnedige vnd grosgunstige herrn. So
lange ich dem new gestifften *Gymnasio* in die-
ser weit vnd hochberumbten stadt Dankig
vorgestanden/ habe ich allzeit nach meinem
hochsten vermügen/ allen fleis trewlich an-
gewendet/ des ich mich mit gutem gewissen
widder alle falsche verleumbdung wol rus-
men mag/ das die zarte vnd liebe jugent vns
A ij ter meyn

ter meiner Disciplin/auff allerley weise vnd
wege in Gottes furcht/ geburlicher zier des
lebens/ guten kunsten vnd sprachen geubet
vnd getrieben wurde. Habe derhalben ne-
ben andern arbeitsamen vbungem auch die
nutzliche vnd lobliche gewonheit Comedi-
en zu agiren eingefuret/ vnd bißher alle jar
zwey mal/ erstlich Lateinisch auß dem Ter-
rentio/ darnach Deudsch auß der heyligen
Schriffte allein durch des Gymnasij knaben
agieren lassen. Auff das also zum ersten die
Knaben selbs der zweyer sprachen/ welche in
diesem Land in Kirchen vnd Schulen/auff
Landtügen/ im Radthaus vnd an gericht-
orten breuchlich sein vnd am meisten im
schwancck gehen/ zier vnd eigenschafft nicht
allein sehen vnd erkennen lernten/ sondern
auch dieselbigen reyniglich aus zusprechen/
vnd artig von sich zu geben von kind auff
gewonten: Zum andern/ das auch die ge-
meine burgerschafft im latein wol/ vbel oder
nichts erfahren/ darzu auch frawens perso-
nen/ nicht allein das zunemen der jugent als
so spuren vnd mercken kondten/ sondern
auch von mancherley zufellen/ wol vñ vbel-
stand

stand dieses lebens vnd wesens erinnert wer-
den/ vnd sich sampt irem thun gleich als in
einem spiegel besehen mochten. Ob nu wol
solch mein furnemen vnd werck von etlis-
chen/ mit was fug/recht vnd grund/ laß ich
sie darthun so sie können/ angefochten/ vnd
als ein vntüchtig vnd nichtig ding außge-
ruffen wird: So laß ich doch der selbigen
selbst angemaste zunötigung vnd vnzeitige
flugheit mich so sehr nicht anfechten/ das
ich es dafür wolt halten/es mußte nach irem
kopff vnd meinung alle ding bestellet vnd
hinaus gefüret werden/ vnd ich auch derhal-
ben mein furnemen drum must fallen las-
sen. Sonderlich dieweil ich gewis erkant ha-
be/ das sich solch werck nicht allein der meis-
te teil der gemeinen burgerschafft/ sondern
auch der größte hauff weyser vnd erfarnen
männer/ Ja auch die Obrigkeit selbs gefal-
len lest/ vnd es vor gut vnd nützlich ansicht/
Das ich hie nicht sage von der lust/so die iu-
gent darzu tregt vnd daruon empfengt/ das
sie sich müge vor einer ganken gemeine of-
fentlich sehn vnd also hören lassen/ das sie
von menniglich verstanden/ sich also bewen-

A iij se/das

se/das sie müge den danck/ als lob vnd einen
guten namen darvon bringen. Als ich nu
vmb eine deudsche Comedien/ welche dis
jar mocht erhiebiert werden/ bekummert
vnd darnach mich befragt vnd vmbthet/ so
habe ich keine vberkommen können/ welche
tüchtig vnd würdig gewesen wer/das sie von
dieses *Gymnasy* knaben het mügen odder sol
len agieret werden. (denn die besten etliche
jar her außgelesen vnd alhie vorhin gehanz
delt worden.) Auff das derhalben vmb sol
ches mangels willen die eingefürte gewon
heit nicht mocht nachbleiben/ so setz ich mir
für/ weil es meiner profession nicht unges
mes/ich auch aus diesem orden nicht der er
ste wer/ mich drüber zu machen/ vnd ob ich
selbs eine schreiben künfte zumorsuchen. Als
ich nu dem argument nach dachte/ ist mir
vorkommen eines treflichen Poeten vnd der
heyligen schrift Doctoris Rodolphi Gual
theri Comedien eine / welche er im latin vor
vierzehen jaren zu Zürich hat außgehen las
sen/ vnd darin des Nabals leben vnd todt
aus dem funff vnd zwenzigsten Capitel des
ersten buches Samuelis künstlich / nützlich
vnd

vnd lieblich abgemallet. Dieselbige Comedien / dieweil sie mir vmb viel vnnnd manscherley erinnerung vnd lehr willen wol gefallen hat. (denn sie / so man sie allein fleissig vnnnd recht ansehen vnd betrachten wil / bey na aller menschen / was standes / ampts / alters vnd geschlechts die sein / gebüer vnnnd eigenschafft abmallet / vnd wie sich dieselbigen irem beruff nach halten / odder ja halten sollen / für die augen stellet / also das sich auff den lauff dieser ihigen zeit keine andere het besser schicken vnd reimen können.) So hab ich sie für mich genommen / vnd in deudsche sprach vnd reimen vberzusetzen mich befließen : vnd habe zwar dem lateinischen so viel möglich vnd füglich gewesen gefolget / doch aber an vielen orten also geendert / vnd nach meinem fürnemen vnd dieses ortes gelegenheit vnd umbstende gerichtet / ja etliche personen vmb der knaben willen hinzugesetzt / das / so einer sie legen einander halten wolt / derselb an etlichen orten beynah zweyfeldn kond / ob diese aus der lateinischen vbersetzt vnd verdeudscht were. Dieweil sie sich aber was lang verstreckt / also das es vers

A iij Drücklich

Drüßlich worden wer/ zur agierung oftmalß
abzuschreiben/ so bin ich sie in druck zuuer-
fertigen bewogen vnd verursacht worden.
Weil aber ein alter gebrauch vnd herkommen
ist/das stadlicher/ehrnliebender vnd ansehn-
licher personen namen vnd titel im anfang
solcher newer bucher gesetzt vnd gebraucht
werdē/ vñ dz vmb mancherley vrsach willē/
die hie zu erzele vnnotig: So habe ich dem-
selbigen auch nachkommen wollen/ vnd mich
nach solchen personen umbgesehen/ welchen
vmb gebreuchlicher vñnd bekandter vrsach
willen/ dis Büchlein möcht zugeschrieben
werden. Habe mich aber nicht lange dar-
vmb durffen bekümmern/ denn mir bald ewre
Gnaden vñnd herligkeyten / Hochwirdiger
vnd gnediger Fürst/Ernuester vnd groszün-
stiger Herr/vorkommen/darauff auch mey-
ne gedanken gänzlich gefallen vnd berwen
blieben. Denn da ich bey mir betrachtet/
wie ewer Gnaden vñ herligkeyten auß einem
alten/ edle vñ loblichen stam des geschlechts
von Sylslaw in diesem land Preussen ent-
sprungen: in irem vaterland beid im geistlich-
chen vnd weltlichen regiment hochgesehen:
mit

mit allen guten tugenden vnd künsten reich-
lich gezieret: allen Christlichen vbung-
der Schulen in gnaden vnd gunsten ge-
neigt: mir auch vor dieser zeit alle gnade/
gunst vnd furderung in vnd aus irem vas-
terland beweyset. So bin ich durch diese
betrachtung verursacht vñ gezwungen wor-
den/Ewre Gnaden vnd herligkeiten andern
alhie vorzuzihen/ vnd sie diesem büchlein
zur zier/ehr/cōmendation/schutz vnd schirm
zu eruelen vnd zu gebrauchen. Dieweil ich
auch bedacht/erstlich das niemand sich mei-
ner so willig/begirig/gnedig vnd günstig
wurd annemen/ vnd mich meines begerens
geweren: Darnach dieweil ich auch ver-
meinet/es könne ewren Gnaden vnd herlig-
keiten meine danckbarkeit auff keine andere
wege erzeigt vnd andern bekandt gemacht
werden. Vbergebe derhalben vnd befehle
ewren Gnaden vnd herligkeiten diese meine
junge arbeit/ gleich als eine unmündige
vnd noch vngetauffte frucht/ Vnd bitte
dienstlich vnd ganz sehr Ewre Gnaden
vnd herligkeiten/ wollen sich derselbigen als
schutzhern vnd genattern/ irer alten gütig-

feit vnd angeborner fromkeit nach/ gnedig
vnd günstig annemen: irem gewalt aber
vnd hohen ansehen nach widder alle verbitz
terte afterreder vnd feindselige flügling fe
stiglich beschirmen vnd in ire tugentreiche
vnd trewe hand lassen befolen sein. Welchs
so ewre Gnaden vnd herligkeiten/ wie ich
mich genzlich verhoffe/ thun werden/ So
wil ich mit dem Latinischen Poeten mich
getrost hören lassen.

*Rumores rabularum & inuidorum
Omnes vnus aestimemus assis.*

Ich frag nach aller fleffer schar/
Vnd gschrey des Neidharts nicht ein har.

Wil auch ewren Gnaden vnd herligkeiten
mit aller danckbarkeit vortan zu dienen wil
lig vnd geneigt sein. Der Allmechtige vnd
Ewige Gott/ wolle ewren Gnaden vnd
herligkeiten / zu der Christlichen Kirchen/
nötiger Schulen/ vnd des ganken vater
lands Preussen wolffart/ wachstum vnd ges
deyen/ in langwiriger gesundheit vnd blü
ender herligkeit gnediglich stercken/ mehrer
vnd

vnd erhalten. Geben im new gestiften
Gymnasio zu Dankigk den 23. Januarij /
Auff welchen diese Comedia öffentlich zu
ersten ist agieret worden / im Jar nach Chris-
sti Geburt 1564. da vor 2661. jar
der König David von der vnbilligkeit
des vnbesonnen Nabals vnd von der
vbermütigen verfolgung Sauls
erlöst / sein regiment in Israel
hat angefangen.

Ewrer Gnaden vnd herlig-
kerten bereitwilliger
diener.

Henricus Mollerus Hessus
Gymnasij Dantiscani Rector

Namen der personen dieser
Comedien, vnd der knaben, so die
personen agiret haben.

Prologus vier knaben.

1. Georgius Klinsky von Rautenberg nobilis.
2. Thomas Thomæ Dantiscanus.
3. Michaël wicherling Dantiscanus.
4. Iohannes Rhode Dantiscanus.

Periocha oder inhalt.

Iacobus Schmidt Dantiscanus.

Argumenta quinq. actuum.

1. Achatius von Suchten, Senatoris F.
2. Franciscus König Ambrosij F.
3. Gerardus Brandes Consulis F.
4. Iohannes Preut Consulis F.
5. Augustinus Tolck Dantiscanus.

Epilogus funff knaben.

1. Philippus weiner Dantiscanus.
2. Adrianus Kopfferschmidt Dantiscanus.
3. Winoldus Speman Dantiscanus.
4. Andreas Leiper Dantiscanus.
5. Eberardus Kekerbart Dantiscanus.

Nabal.

Michaël Petrus Dantiscanus.

Abigaël

Abigaël.

Iohannes Semelback Dantiscanus. +

Abel zwey knaben Nabalis.

- 1. *Iacobus Hofener Senatoris F.*
- 2. *Detardus Brandes Consulis F.*

Aser puer Abigaëlis.

Sebaldus Kopff Dantiscanus.

Achab.

Iohannes Hoyer Dantiscanus.

Amon.

Iohannes Crusius Dantiscanus.

Sophar.

Nicolaus Konarsky nobilis.

Balach.

Nicolaus Schultz Silesius.

Boas tres pueri.

- 1. *Christoferus Bohemus Silesius.*
- 2. *Casparus Teitzius Pomeranus.*
- 3. *Casparus Sellius Marchita.*

Daniel œconomus.

Iacobus Bartsch Dantiscanus.

Agar.

Bartholemeus Berent Dantiscanus.

Rebecca.

Lucas Reinefelt Dantiscanus.

*serui do-
mestici.*

*serui ru-
stici.*

*Ancille
Abigaëlis*

Gnatbo

Gnatho parasitus.
Iacobus Sedlau Grudentinus.

Abraham.

Andreas Kemerling Dantiscanus.

Simon.

Georgius Schultz Dantiscanus.

Iacob.

Henningus Deterus Marchita.

Balam.

Casparus Stollus Risenburgensis.

*Coniunx
Nabalis.*

DAVID.

Petrus Peper Dantiscanus. †

Thobias zwey knaben Davidis.

1. *Constantinus Ferber CONSVLIS F.*
2. *Georgius Scheper Dantiscanus.*

Abiathar sacerdos.

Balthasar Redlich Gubinensis.

Ioab Dux.

Fabianus Holstius Prutenus.

Abisauus tribunus.

Iohannes Fischer Prutenus.

Obed miles.

Martinus Breslach Furstenbergensis.

Aber

Aber miles.

Martinus Richardus Dantiscanus.

Vrias legatus ad Abigaëlem.

Crispinus Meistenburg Prutenus.

Iosaphat collega.

Andreas Rhederus Marienburgensis.

Jonas tympanista.

Lancilotus Lasir.



Acta intra parietes Gymna-
sij Dantiscani diebus Bacchanalio-
rum, Anni post natum Chri-
stum 1564.

- D. Constantino Ferbero Consule, &
D. Augustino Wolnero Senatore, Aedilibus Curulibus, Gymnasij
praefectis & patronis.

Edita

- D. Iohanne Brandes Consule Burga-
grauio.
D. Georgio Clefeldio I. V. Doctore
Proconsule & Legato.
D. Iohanne Preut Equite aurato
Consule.

a-
Prologus recitatus est a
quatuor pueris.

Primus puer.

Ir herrn vnd freunde all zugleich,
An ehrn, tugend vnd weißheit reich.
Die jr hie scheinen last ewr gunste,
Vnd hoch achtet die freyen kunste.
Erstlich wunschen wir euch alls gut,
Wie man solchs gutten gonnern thut.
Darnach so thun wir auch begeren,
Das jr euch ja nicht wolt beschweren.
Zu horen vnser sach in gemein,
Vnd auch darüber richter sein.
Ob vnser furnemen mit grundt,
Billich angfochten werden kundt.
Als schickt sichs nicht zu vnsern sachen,
Das wir solten ein schawspiel machen.
Vnd etwas bringen auff die bahn,
Dardurch frewd wurd gerichtet an.
Denn ob wirs wol halten darfur,
Das solchs wol ansteh vnd gebur.
Der zarten vnd fleißigen jugent,
Nach jrer art vnd lieb zur tugent.
Dieweil wir doch erfahren heut.
Das stoltz vnd vnruwige leut.
Durch jrn hohmut sich vnterstan.
Dis furnemen zu fechten an.

B

Vnd

Vnd durch abgunst vnd falsche tuck,
Vnd andre solch ehrliche stuck.
Gantz vnuerschempt darnach thun stechen,
wie sie vns mochten was ab brechen.
An vnser trew vnd namen gut,
Vnd an vns kueln jrn frechen mut.
So dunckt vns nicht vnbillich sein,
Das wir jn wider reden ein.
Vber vnser ehr halten fest,
Vnd vns entschuldgen auff das best.
Auff das aber solchs im anfang
Nicht werd verdruslich vnd zu lang.
(Denn solten wir den neidern all,
Nach recht begegnen auff ein mal.
So mussten wir ein monat lang
Haben darzu, ein solchen danck
Verdienen wir von vielen leuten,
Die alle ding zum ergsten deuten.)
Drumb wollen wir ytzt und allein
Zweyer leut red vnd falschen schein
Entdecken, vnd auch widerlegen,
So sich wider vns hie erregen.
Das in latein vnd deudscher sprach
Al jar vnser gewonheit nach
Wir dieser schul zvbung vnd ebrn
Zweymal Comedien agern.
Dieselbge soln durch diese knaben,
Kurtz jren bscheidt vnd antwort haben.

Puer secundus.

Es

Es sind dar etlich klug gesellen,
welche sich gantz ernsthaftig stellen.
Runtzeln die naeß, klagen vns an,
Das wir durffen auff freyen plan
Schimpffrede bringen offentlich,
Sagen es sey sehr ergerlich.
Vnd werde guter zucht vnd sitten,
Durch solche spiel viel abgeschnitten.
Es sey wider die erbarkheit,
Vnd thu schaden der meßigkeit.
Denn man mit lecherlichen stucken,
Gemeinglich solche spiel thut schmucken.
Vnd fuhrn personen ein darneben,
Die boeß exempel von sich geben.
wan ich solchen kluglingen sagt,
Das sie, was in hir nicht behagt,
Zu hauß spielen, wie geyle knecht,
So thet ich in z war eben recht.
Aber jr sehts, verstehts auch wol,
Das sie des klugelns sind zu vol.
Daruon in dann der bauch auffblest,
was sie thun, das mus sein das best.
Aber sie treffens nicht alzeit,
Es feylt in oft gar wunder weit.
wie dan auch hie: denn ob wol gleich,
Die knaben da beid arm vnd reich,
Verkleidet stehn nach spieles art,
So sind doch jr gemutter z art,
Gantz vnbesfleckt, vnd halten fest,
was mit ebren sich wol thun lest.

B ij Das

Das sie aber itz und dis spiel.
Han angericht mit arbeit viel,
Da habens ehrlich vrsach zu.
welche jr auch solt horen nu.
Wir soln ja lernen in der jugent.
Zwey stuck vornemlich, kunst vnd tugent.
Geschicklicheit vnd sitten gut,
welchs man dann aus Comedien thut.
Denn da ist in den dingen z war,
Viel nutz s, vnd guter lehr fur war.
weil die Comedien in gemein,
Ein ebenbild vnd spiegel sein.
Darin man sehen kan gar eben,
wie hier ein yederman thu leben.
Es scheint wol gleich als wers nur spiel,
Aber es hat auch ernstes viel.
Da wird nutzliche lehr gegeben,
wie wir soln ansteln vnser leben.
wie wir mugen in allen handeln,
Mäßig vnd würdiglichen wandeln.
Es sind aber gesprengt mit ein,
Schimpffred vnd artig possen fein.
Das dardurch werd die red geziert,
welchs dann ein lust zur lehr gebiert.
Doch gehn sie auch on nutz nicht hin,
Sie han oft ein verborgnen sin.
wird also durch solch schimpff vnd spiel,
Die herb tugent gemieltert viel.
Vnd gleich mit süsser wurtz gekreut,
Das dar lust zu kriegn junge leut.

Gleich

Gleich als die Ertzt ein bittern tranck,
So etwan ist ein kindlein kranck.
Mischen, vnd strewen zucker drein,
Das ihn das kind gern neme ein.
Vnd nicht darob ein schewen trag,
Sondern nutzlich geniessen mag.
Vnd ob wol gleich ein loser balck,
Ein vnlust vnd ein bosser schalck,
Zu Zeiten hirmit vnterleufft,
Vnd einem andern brilln verkeufft.
So wird der doch nicht eingefurt,
Vnd seine that darumb berurt.
Das wir der sollen folgen nach,
Sondern das wir auff vnser sach
Lernen hieraus fleißig zu mercken,
Vnd vns in zucht vnd frombkeit stercken.
Dieweil wir sehn das bosen lohn,
Ein schalck alzeit bringe daruon.
Dis wil ich auch han angezeit,
Ein yeder thu was jm geeigt.
Seh wo es eim andern angebricht,
Hut sich dauor, vnd folg jm nicht.
Allein das gut das nem er an,
Das mach sich nutz ein yederman.
Sicht er was eim andern nicht wol
Ansteht, dasselb er fliben sol.
Dis sey auff der klugling anklag,
Genug gesagt auff diesen tag.
Den andern nu desgleichen wol,
Dieser knab antwort geben sol.

B ij Puer

Puer tertius.

Es sind auch sonst noch ander dar,
Denn diese weiß gefellet & war.
Das man schawspiel thu richten an,
Bringen dis aber auff die ban.
Das wir es nicht als treffen wol,
Vnd machens nicht wie es sein sol.
Denselben zu antworten fein,
Dunckt mich ytzt gar nicht notig sein.
Sondern wir thun sie allein bitten,
Das sie nach jrer art vnd sitten,
Dasselbig besser machen wollen,
was wir nicht treffen wie wir sollen.
Last sehn was sie konn machen draus
Ob in nichts gbrech in jrem haus.
Ob sie vns können vberwinden,
So sol sichs & war wol anders finden.
So sies aber nicht besser können,
So wollen sie vns doch vergonnen.
Das wir es mügen & imlich machen,
In diesen schwern vnd newen sachen.
Darin wirs haben gut gemeint,
Vnd vns so mit einander vereint.
Das wir gar nichts wolln geben drauff,
was hir klappert der vnnutz hauff.
So ewer gmut, jr erbar leut,
Vns dis allein zum besten deut.
Vnd lest sich vnsern fleis gefallen,
Vnd was wir thun zu ehrn euch allen.

Puer quartus.

Dis

Dis ist vnser schutz, wil vnd ziel,
Hort nu auch was wir fur ein spiel.
Auff dis mal han gerichtet an,
Zu agieren auff diesem plan.
Das funff vnd zwentzigst Capitel,
Des ersten buches Samuel.
Hat vns das argument gegeben,
Vnd ist von Nabals todt vnd leben,
wie sichs mit jm hab zugetragen,
Ich wil dar hier nicht viel von sagen.
Denn jr werds als weitleufftig horen,
So vns nicht yemandt wird verstoren.
was hir aber noch weiter bey,
Zu lernen vnd zu mercken sey.
Das sol am end kommen an tag,
Dis aber ich wol sagen mag:
wer auff dis spiel hat eben acht,
Vnd alles bey sich recht betracht.
Der wird hie lernen vnd auch sehn,
wies auff der welt pflegt zu zugehn.
Durch alle stende in gemein,
Hoch vnd auch nider, gros vnd klein.
Dieweil aber durch ewre sohn,
Die gute kunst vnd tugend schon.
Lernen mit fleis an diesem orth,
Dis spiel sol werden gstelllet vort.
So danckt GOTT, vnd eim Erbarn Radt,
Der ein solch werck gestiftet hat.
Darin so schon vnd edle knaben,
Mugen jr lehr vnd vbung haben.

B iij Auff

Auff das, so etwan kompt der tag,
Die gantz stadt sie gebrauchen mag.
Drumb wollet auch mit wort vnd that,
Wie jr dan angefangen hat.
Erzeigen ewr gutwilligkeit,
Vnd machen vns dardurch bereit.
Willig vnd lustig, das hirnach
Wir so anstellen vnser sach.
Euch oft schawspiel zu richten an,
Solchs woln wir euch gebeten han.
Vnd wunschen, das euch Gott wol geben,
Ehr, gluck, heil, vnd das ewge leben.

Periocha.

Nabal wil die jarzeit began,
Vnd richt ein herlich malzeit an.
Vor die so seine schaff bescheren,
Vnd fordert zu den selben ehren.
Seine nachbarn vnd gut gesellen,
welche gantz willig sich einstellen.
David aber zu Nabals haus,
Schicket seine legaten aus.
Von jm zu bitten profiant,
Aber Nabal mit spot vnd schand
Sie richtet ab, vnd gibt in nicht,
David der wird solchs bald bericht.
Vnd hoendt jm der schimpff also sehr,
Das er sich rust zur gegenwehr.
Vnd schwert Nabaln mit seinem haus,
Gar in die grundt zu rotten aus.

Da

Da aber frau Abigaël
Vernimpt ein solch gros vngefel.
Vnd was David hab in dem sin,
Da macht sie sich bald zu jm hin.
Nimpt mit sich profiant vnd speis,
Vnd bringts so weit durch jren fleis.
Das David mit den seinen allen,
Sein furnemen vnd zorn lest fallen.
Da sie aber solchs jrem man,
Dem Nabal zu haus zeigt an.
Er dauon sehr erschrecken thut,
Vnd wird mit jm nicht widder gut.
Sondern er gewlich dahin stirbt,
Bald David vmb die witfrau wirbt.
Vnd kriegt sie auch, vnd wird das spiel,
Geend in frewd vnd wollust viel.

Argumentum actus primi.

Erstlich hie fein beschrieben werden,
Eins heuchlers sitten vnd geberden.
Darneben wird recht abgemalt,
Wie es vmb Nabal hab ein g stalt.
Wie er wol sey reich, prechtig, stoltz,
Aber darbey ein grobes holtz.
Der keiner tugend hab vergessen,
Vnd kon nichts dann sauffen vnd fressen.
Der lest anrichten ein wolleben,
Daruon thut sich der lerm erheben.
Denn David der leidt grosse noth,
Dieweil sein kriegsuolck hat kein brodt.

B 5 Denz

Dem wird vom Ioab kund gethan,
wie solchs mael sey gericht an.
Derhalben wird ein notger rath,
Von kriegsbrehten beschlossen dradt.
Das man zu Nabal in sein hauß,
Sol eylend boten schicken aus.
Zu bitten von jm profiandt.
Ob solchs nu werd wol angewandt,
Das werd jr horn im andern teil,
So jr euch nemen wolt die weil.

Actus primi Scena prima.

Gnatho. Nabal.

Gnatho.

Itz und erfar ich mit der that,
was das gemein sprichwort in sich hat.
Das nichts so bose sey auff erdt,
welchs nicht etwan wor nutz zu werdt.
Dis mag ich mit der warheit sagen,
Ich habs erfarn in kurtzen tagen.
Denn da ich gieng gantz vnuorsicht,
Vnd het kein pfeng im beutel nicht.
Sah mich fast vmb, obch einen fund,
Den ich mit list betriegen kund.
Das er mich nert ein ledig gang,
Denn arbeit thut mir mechtig bang.
Arbeit ich nicht gewonet bin,
Mich tregt auch nicht darzu mein sin.
Wo abr wer ein land zuuorzeren,
Dawolt ich wol bestehn mit ehrn.

Beweisen

Beweisen meinen trewen fleis,
Schlemmen das mir außbrech der schweis.
Da ich nu also vmbher schlich,
Wolt vmb ein dienst bewerben mich.
Da traff ich an den rechten man,
Derseib wont hie nicht weit hindan.
Nabal so ist der name sein,
Er ist vorwar ein recht mastschwein.
Grob von verstandt, vnd vnuorschempt,
Der tag vnd nacht gern weidlich schlempt.
Vnd was mehr sein der feinen stuck,
Ersoffen ist er gar im gluck.
Vnd ist vber die masse reich,
Da hat er jn kaum seinen gleich.
Sonst ist er grob als bonen stro,
Gfelt jm doch wol, vnd wird sehr fro.
So man jn lobt vnd weidlich rumpt,
Sein thun mit schonen worten blumpt.
Ob er gleich all die tage sein,
Nichts außgerichtet hat so fein.
Nichts so ehrlichs mit hand noch munt,
Das er darumb zu loben stundt.
Ich merckt bald was die glock geschlagen,
Gdacht, har mein gsel, dem mustu zu wagen.
Dem narren mustu brilln verkeuffen,
Er wird fein tantzen nach meiner pfeiffen.
Ich trat jm nehr, streichelt den bart,
Vnd grust jn nach hoflicher art.
Hub an, vnd sagt, das ein geschrey,
In aller welt erschollen sey.

Wie

Wie er sey so gar tugentreich,
Vnd sey jm an ebrn niemandt gleich.
Solchs, sagt ich, wer on alles Ziel,
Vnd legt darzu des dinges viel.
Das nicht was war, thet jn oft nennen
Ein herrn, das ich mocht recht erkennen.
Wie er durch aus gesinnet wer,
Welchs dan geschach on alls beschwer.
Ich het jn bald am schnabl erkant,
Das all sein thun nur wer ein thant.
Das er ein grobes holtzlein wer,
Het an sich weder kunst noch ehr.
Wer ein Zubringer, ein weinschlauch,
Vnd jagt es alles durch den bauch.
Aber dardurch hab ich mit frommen,
Ein fetten hals vnd gwinst bekommen.
Denn als er mich het ghoret aus,
Furt er mich bald mit sich zu haus.
Vnd zeigt mir al sein hab vnd gut,
Fragt, wie es mir gefallen thut?
Ich sagt, sehr wol, wem wolt aus allen
Ein solch herligkeit nicht gefallen?
Vnd schwur das auff der gantzen erden,
Seins gleichen nicht mocht gfunden werden.
Er wer der grost im gantzen landt,
An reichthum, weisheit vnd verstandt.
Der gute geck thet nicht lang beiten,
Vnd thet mir bald ein tisch bereiten.
Setzt auff vom aller besten wein,
Vermant mich ich solt frolick sein.

Vnd

Vnd notigt sehr zum trincken mich,
Ich tranck, aber doch maßiglich.
Das ich nicht wurd vom trunck vbreilt,
Vnd es mir an mein anschlag feilt.
Ich lobt den wein, ich lobt die speis,
Es wer all auff die beste weiß.
Endlich sagt ich all wie er sagt,
Welchs jm dan also sehr behagt.
Das er mich bald im ernste nent,
Den besten freund, so er erkent.
Vnd lies mich gehn mit dem bescheidt,
Das ich heut solte sein bereit.
Zu sein sein gast im mittags mal,
Ich wehrt mich zu war nichts vberal.
Drumb kom ich nu zu sein sein gast,
Vnd hab drauff gestern abend gfast.
Vnd ist die endlich meinung mein,
Das ich jm gar wil zugthan sein.
Wil alles thun was jm behagt,
Wil sagen alles was er sagt.
Vnd wil gebrauchen hic mein kunst,
Das ich ja solchs nicht thu vmb sonst.
Wil mit jm sein faul, freßig, toll,
Das ich mein seckel krige vol.
Aber wer steht dort vor seim hauß?
Für war er geht da selbs heraus.
Ich wil hir auff ein seiten stehn,
Vnd lassen jn fürvber gehn.
Vnd horn was er wird geben für,
Ken ich in recht, so wird er nu.

Von

Von seinem gut, reichthumb vnd macht,
Rumen, vnd praln mit grosser pracht.

Nabal.

Wer wolt wol sagen jimmermehr,
Das ich nicht gantz gluckhafftig wer?
Der ich so viel sylber vnd golt,
Als einer jimmer wunschen solt.
In meinem schatze hab verborgen,
Das ich gar nirgends darff vmb sorgen.
Dartzu hab ich obn all gefahr,
Der guten freund ein grosse schar.
Eins ist allein, das mir weh thut,
Vnd bringt mir oft ein schweren mut,
Das mein weib nicht gesint wie ich,
Nicht lassen wil betzemen mich.
Sie ist so ein sorgfeltig frau.
Im haushalten so karg vnd gnaw.
Ist so verschlagen, das ich meine
Yr mug gleichen der andern keine.
Sie thut mich oft mit wortn bethoren,
Vnd ligt mir stets vor meinen ohren.
Das ich von mein thun solt ablassen,
Vnd ein ander art an mich fassen.
Sein fürsichtig, nuchtern, behendt,
Wie sies auff ire weise nent.
Hat mir so manche zech verstort,
Vnd was zun freuden sonst gehort.
Vnd das ich kurtz die rede mein,
Sie wil gantz Doctor Siman sein.
wiewol

Wie wol ichs doch wol leiden mag,
Das sie klug ist, vnd jimmer klag.
Ich wil bleiben auff meiner art,
Vmb jr red mich nicht kummern hart.
Wil in saus vnd in freuden leben,
Darff ja drumb niemandt rechnung geben.
Was frag ich viel nachs weibes sag,
Vnd sonderlich auff diesen tag
Wil ich haben ein frischen mut,
Vnd thun mein leibe was zu gut.
Wil mir lassen was guts bestellen,
Vnd laden darzu gut gesellen.
Aber wen seh ich stehen dar?
Ists nicht der Gnatho? ja vorwar
Erists, Das ist ein newer freundt,
Zwar, ein getrewer man er scheint.
Gnatho was verzuechst du dar lange?
Kom her, laß dir gar nicht sein bange.
Du darfst dich gar vor mir nicht schewen,
Mein kundschafft sol dich nicht gerewen.

Gnatho.

Ich wunsch mein herrn ein gutten tag,
Vnd thu jm alls was ich vermag.

Nabal.

Mein lieber Gnatho, du thust recht,
Das du wie ein getrewer knecht
Bezeiten dich einstellen thust,
Du mir ein wenig dienen must.

Die

Die nechste zech, wie gfiel sie dir,
Vnd alles was du da bey mir.
In meinem haus gesehen hast?

Gnatho.

Es hat mir als behagt so fast.
Das ich in dem ich gieng nach haus,
Mich noch verwundert vber aus.
Vnd hab es mir so gantz vnd gar
Gebildet ein, das es vorwar
Mir auch im schlaff vorkommen ist.

Nabal.

Hastu zu jrgent einer frist
Gesehn was auff der gantzen erden,
Das mein gut mocht vergleicht werden?

Gnatho.

Nein ich vorwar bey meinem eidt,
Ia ich gleub, das ich all die zeit
Meins lebens, sol ich dwardheit jehen,
Dergleichen nimmer werde sehen.
Gibt doch von klarem marmorstein,
Das gantze haus ein hellen schein.
Vnd ist gestrichen an mit golt,
Ein Furst darinne wonen solt.
Zwar ders gebawet hat so fein,
Der muß ein man von ehren sein.
Von sinnen scharff, gescheid vnd klug,
Wies gantz gebew bezugt genug.
Es ist alls angegeben wol,

Vnd

Vnd sind all winckel reichthums vol,
Ich euch vor einen weisen acht,
Der irs all so profietlich gmacht.

Nabal.

Ich hab vorwar gespart kein fleis,
Vnd habs gebawt auff dbeste weis.
Vnd es so stadtlich zugericht,
Aber dis ist noch alles nicht.
Ich habe noch der Ecker viel,
weinberg vnd wiesen one ziel.
Fischteiche, wildnis, berg vnd thal,
Auch gros vnd klein vike ohne zal.
Drey tausent schaff in einer herd,
Vnd tausent ziegn, viel geldes werd.
Der diener so ein grosse schar,
Das ich mit warheit sagen thar.
So es erfurdern wurd die noth,
Ich darmit wolte schlagen todt
Ein hauffen feind in jrm gezelt,
Odder veriagen auß dem felt.
wie Abraham auch hat gethan,
Als man list in der schrift dauan.

Gnatho.

Ich wunder mich in diesem fall,
Das jr sie kund regieren all.
Vnd solche muh allein ertragen,
Ich wurd zwar bald dafur verzagen.

Nabal.

¶ Ich

Ich bin vor andern menschen all
Begnadt, das mirs all glucklich fall.
Was ich begin, was ich anfang,
Das gwint all ein guten außgang.
Was ich nur thu, das ist beqwem,
Vnd allen menschen angemem.
Darumb ob gleich gar wenig ich
Der hausforgen anmässe mich.
Gar wenig mit worten bestell,
Vnd thu den knechten kein befehl.
So sind sie doch so abgericht,
Das sie mich ja verzornen nicht.
Das sie das thun willig vnd bald,
Darzu ein jder ist bestalt.

Gnatho.

Daran thun sie billich vnd recht,
Denn so sol thun ein gtrewer knecht.

Nabal.

Ia, oft der konig Saul auff's best,
An seinen hoff mich fordern lest,
So etwan, von des reichs gebur,
Im wichtge hendel fallen fur.
Vnd setzt mich zu den Redten fein,

Gnatho.

Ia, das du must jr narre sein.

Nabal.

Denn weil ichs alle sage frey,
Vnd trag fur keinem menschen schew.

So

So hab ich mir des konigs gnad
Durch solch freyheit erworben dradt,

Gnatho.

wem wolts dann weiter wunder sein,
Das es im reich steht recht vnd fein,
Dieweil es solche Redte hat?

Nabal.

Ich muß dir melden eine that,
Die ich im Radt ohn alles Zagen,
Begangen hab fur wenig tagen.
Daraus du dann magst nemen ab,
Wie ich so gute radtschleg hab.
Du kenst ja David wie ich mein?

Gnatho.

Es solt wol der von Bethlem sein
Der auffrurer, welcher zugleich
Dem kunig, vnd dem gantz en reich
Ein abgesagter feind jtz t ist.

Nabal.

Derselb: auffm rechten weg du bist.
Als der sich hoch vergriffen het,
Kong Saul ein radtschlag halten thet,
wie er den auffrurer mit gwalt,
Mocht fahen vnd vortilgen bald.
Die andern Redte all in ein
Sie wolln ja klug gehalten sein.
Aber sie stimptn ich weis nicht was,
Sonderlichs Z war nichts drauffe saß.

C ij Endlich

Endlich da mich der furst auch fragt,
Was ich dan zu den sachen sagt.
Der andern stim im selben fal
Verwarff ich vnd jr meynung all.
Vnd sagt, sie hetten dar kein stadt,
Dem konig gab ich diesen radt.
Das er seinr tochter Michol eben,
Die er David het erstlich geben.
Der solt er gebn ein andern man,
So wurd der handel gehen an.
Denn David kont ja nicht mit ehren,
Vnd mit gedult, seins weibs entperen.
Es wurd von grosser lieb vnd schmertzen,
Im also weythun in seim hertzen.
Das er willig wurd kommen dar,
Vnd gebn sich schuldig offenbar.
Das er schwerlich gesündigt hab,
Vnd wols seim herren bitten ab.
Geb sich auff gnad vnd auff vngnad,
Vnd alls was er besitzet vnd hat,
Das er nicht durft sein gmahl verlassen.
Als dan kond in der konig fassen,
Vnd alle ding so mit jm machen,
Das er nicht mehr verwirt die sachen.
Da nun der selbge furschlag mein,
Vielen daucht nutz vnd betlich sein.
Da hub ich an zur selben stund,
Vnd meinen Ohm zu lobn begund.
Das er kaum hette seines gleich,
Denn er wer edel, frum vnd reich.
Ich

Ich badt auch die Redt in gemein,
Doch heimlich, das sie wolten sein
In der sachen mir zugethan,
Vnd bey dem konig halten an.
Vnd helffen das es mocht geschen,
Hoff auch es sol von staden gehn.
Das mein Ohm kum zu hohem schein,
Vnd werd des konigs schwager fein,
wo Ionathas des konigs sohn,
Die sache nicht hat verstoret schon.
Derselb der ist, der mir allein
In dieser sache kan schedlich sein.

Gnatho.

So viel ich kan die sache verstehn,
So ist durch ewern radt geschen,
Das David ist sein gmahl genommen.

Nabal.

Durch meinen radt allein ist kommen.

Gnatho.

Hilff lieber Gott in ewigkeit,
Was hor ich von ewr herligkeit?
Wie dunckt mich so gros wunder sein,
Das euch solchs ist gefallen ein.
Das ist vorwar der rechte grieff,
Wer es besinnen kan so tief.
Das er gibt rath mit solcher kunst,
Das er es nicht darff thun vmb sonst.
Ist nu der kong klug vnd ernhafft,

C ij So

So wird er solche Schwegerschaft
In keinem weg passieren labn.

Nabal.

Aber das du mugst recht verstan,
Warumb ich dich gefurdert heut,
So hor, ich hab viel guter leut,
Viel freund vnd nachbarn, wie ich sag.
Geladen ein auff diesen tag.
Denn ich hab meinen schaffen all
Nu lassen abschern jre wol.
Nach solchem pfleg ich alle jar,
Ein bancket stadtlich gantz vnd gar
Zurichten an, so wil ich auch
Heut halten den alten gebrauch.
Das solchs nu all geb wie es sol,
Vnd ich die gest entpfan ge wol.
So wil ich das du jtz zu hand
Alls zurichdest nach deinem verstandt.
Auff das, wan wir beysamen bleyben,
Den gantzen tag in frewd vertreiben.

Gnatho.

Da wil ich keinen fleis nicht sparen,
Vnd kond mir zwar nichts widerfahren,
So lieb vnd angnem, denn das jr
Mein fleis vnd kunst mugt sehen hir.
Denn ich des dings ein meister bin.

Nabal.

Das hor ich gern, so geh nu hin.
Vnd

Vnd bfiel den knechten in dem hauß,
Das sie gebn on aln mangel aus,
was zu solchem hancket gehört,
Auff das all ding recht gebe vort.

Gnatho.

Ich wil es alles machen wol,
Das es mein herren gfallen sol.
O wie steht mir das gluck jtz t bey,
Ich wunsch, das es nur bstendig sey.
So wird es sein mit meinem frommen,
Ich hab mein rechtes ampt bekommen.

Actus primi Scena secunda.

Achab, Amon, Sophar serui & Gnatho.

Achab.

Sich Amon, wer kompt da in hast?
Mich dunckt es sey ein newer gast.
Es trieg mich dan sein angesicht,
So hab ich in mein tage nicht
Zuor gesehn, mich wunder nimpt,
wie er so frolich zu vns kumpt.

Amon.

Ich es zwar wol erraten wolt,
Daran mirs gar nicht feilen solt.
was gilts, ob jtz t nicht vnser herr
Hab auffgegriffen obn gefer
Ein neuen gast, der jm sey gleich,
Vnd jm das maul mit honig streich.

C iij Vnd

Vnd geb dem gecken falsche wort,
Das er dardurch werd gar bethort.
Das man in lobt, das hort er gern,
Ob gleich all ehr ist von im fern.

Sopbar.

Vor einen fraß seh ich in an,
Der wird ein rechten herrn hir han.
Darnach der man, darnach der quast,
Wie der wirt, so ist auch der gast.

Achab.

Ir mocht wol schweigen solche wort,
Das sie nicht irgend jemandts hort.
Denn ob wol viel an vnserm herrn,
Zu taddeln ist, so sols doch fern
Von eim getrewen knechte sein,
Das ers mit seim hern vbel mein.
Der herr der thu auch was er wol,
Vor gut der knecht es halten sol.
Vnd nicht verachten seinen herrn,
Sondern im sein gehorsam gern.
Nabal ist herr, vnd wir sind knecht,
Wird er etwas nicht machen recht,
Da wird er zwar in jenem leben,
Schwer rechenschaft fur müssen geben.
Last in itzt thun was im gefelt,
Last in verprassen all sein gelt.
Sein haus vnd hoff, sein vieh vnd land,
Last in leben in sund vnd schand.
Vnser ampt sol vns nicht gerewen,

Zu dienen jm mit allen trewen.
Sein ehr, sein namen vnd gerucht,
Mit ein wortlein antasten nicht.

Ammon.

Du bist nu sehr andechtig worden,
Vnd dienst wol in der pfaffen orden.

Gnatho.

Gluck zu jr schlucker in gemein,
Ich werd hinfurt ewr stalbrudr sein.
Wie gehts, wie thuts, was habt jr fur?

Achab.

Hie stehn wir fur vnser herrn thur.
Du bist zwar ein seltzamer gast,
Sag, was du hir zu schaffen hast.

Gnatho.

Nabal mein hochster furderer.
Mein gunstger freund, vnd ewer herr,
Der hat mir aufferlegt dis ampt,
Das ich sol durch euch alle sampt,
Ein solche malzeit richten an,
Die vor yderman kon bestahn.
Das sie sey herlich zugericht,
Vnd hab an jr kein mangel nicht.
An gbratens, an gekocht, an kuchen,
Er wil in diesem stuck versuchen.
Was ich gelernt, vnd was ich kan,
Es geht euch all zugleich mit an.
Denn es sein viel ehrliche leut,

C 5 Nachbarn

Nachbarn vnd freund gebeten heut.
Drumb wil ich jtz in dieser hast,
Das jrs an euch nicht feylen last.
Seht das all ding werd wol bestellt,
Das es dem herren wol gefelt.
Thut ab der schaff vnd gens genung,
Feiste kappun, vnd hunner jung.
Bereitet die krampfvogel gar,
Vnd was sonst ist vor wildbret dar.
Das fulsel solt jr klein gnug hacken,
Thut auch etlich pasteden backen.
Karpfen, hecht, vnd allerley fisch,
Bereitet auch zu diesem tisch.
Kond auch einer ein new gericht,
welchs zuuor wer gesehen nicht,
Erdencken, der spar jtz kein kunst,
Vnd kost, er wird verdienen gunst.

Sophar.

Ich weis vorwar ins Konigs kuchen
Darf man so viel gericht nicht suchen,
wen er schon helt sein hochstes fest:
Als der wil han vor seine gest.

Achab.

Hat dir sonst vns nicht vnser herr,
Zu sagen an, befohlen mehr?

Gnatho.

Noch eins, das jr all faß mit wein,
So in dem gantzen keller sein,

Antzapffen

Anzapffen solt, vnd draus den besten
Auftragen, vnd schencken den gesten.

Achab.

Ich wils machen so best ich kan,
Vnd nicht vngunst meins herren han.

Ammon.

Dieweil so ist meins herren wille,
So wil ichs auch thun, vnd sein stille.

Gnatho.

So geh ich hin, vnd schmeck den wein,
Last jr euch dis gesaget sein.
Vnd seht wol zu, vergeßt das nicht,
Was ich euch all jtz hab berichtet.

Sophar.

Hab ich es nicht erraten fein,
Das der wurd ein schmrotzer sein?
Es solt mich ja verwundern sehr,
So an eim andern vnser herr
Dann an eim solchen feisten kragen,
Solt jrgend ein gefallen tragen.
Der muß ja gantz vnd gar verterben,
Darzu in schand vnd armut sterben,
Der sein wolfart, sein ehr vnd gut,
Eim solchen wicht vertrauen thut.
Aber laß jmr verterben hin,
Hierumb allein ich bkummert bin,
Das wir schier haben alle tage,
Ein newen vogt der vns wol plage.

Ich

Ich wolt das solche newe herrn,
An einem strick ersoffen wern.

Achab.

Du kanst das maul ehe halten nicht,
Du kriegst dan etwas ins gesicht.
Ins haus geh, vnd schaff das der herd,
Mit koln vnd fewr bestellet werd.
So wil ich auch zu hawen bald,
Auff das all ding werd recht bestalt.

Actus primi Scena tertia.

David, Abiathar sacerdos, Thobias i. puer.

David.

Keins menschen gluck das ist so gantz.
Das nicht etwan ein bose schantz
Schlage darein, vnd es verterbe,
Niemandt ist selig ehe er sterbe.
Keins gluck ist vor seim end zu preysen,
Wen ich solchs nicht kont sonst beweyssen.
So mocht ich jtz t in diesem leben,
Mich selbs zu ein exempel geben.
Ich hab vnlangst Abrams geschlecht,
An Goliad dem feind gerecht.
Da ich jn schlug mit meiner hand,
Erret aus noth das gantze land.
Da hat ich lob vnd ehre van,
Mir war gunstig ein yederman.
Der kong gab mir sein tochter fein,
Ein yederman wolt bey mir sein.

Vertraut

Vertraut sich mir vnd all sein gut,
Trug zu mir einen gutten mut.
Gfellschafft het ich vnz elich viel,
Wie hat sich jtz t verkert das spiel?
Das gluck hat sich verendert alls,
Viel elend ligt mir auff dem hals.
Dann weil ein mal des konigs gnad
Sich gegen mich verwandelt hat.
Vnd ich in sein vngnad gefallen,
So hat zugleich das hertz in allen.
Sich gegen mich gantz vmbgekert,
Vnd hat sie das gluck so erfehrt.
Das mir aus einer solchen schar,
Da ich mit stets vmbgeben war.
Die ich am hoff vnd in der stadt,
Het gros gemacht durch meine gnad.
Kaum, Gott seis klagt, zwen oder drey
In meim elend sind gstanden bey.
Ich fuel nu wol ich armer knecht,
Wie das dis sey gesaget recht.
Auff ein roer der sich lehnet fest,
Der sich auff menschen gunst verlest.
Denn wies roer schwach ist gantz vnd gar,
So ist die gunst auch wanckelbar.

Abiathar.

Ia, hieran solt jr oft gedencken,
So kan euch desto wenger krencken.
Das alle ding der menschen kindt,
So schlipfrig vnd so vnstet sind.

Aber

Aber Iehoua vnser Gott,
welchs wort ist ernst, vnd gar kein spot,
welcher die warheit selber ist,
Derselb der wird zu aller frist
Seiner zusag wol kommen nach,
Vnd helffen vns aus gfar vnd schmach.

David.

Ein andern ein gesunder man
Leichtlich vnd wol furschreiben kan,
wie er es allenthalb sol machen,
Vnd weißlich anschlan seine sachen.
Ich gdenck auch wol der lieben zeit,
Das ich andern in jrem leidt
Zu geben pflegt ein gutten radt,
Der jn auch oft geholffen hat.
Vnd das ich viel mit meinem trost,
Hab von irn schweren trawrn erlost.
Aber ich fuel auff diesen tag,
was meins leibs schwaches fleisch vermag.
widder den weg es hefftig sicht,
Vnd wil jn gerne wandeln nicht,
Den es doch andern hat gezeiget.

Abiathar.

Ia, so ist vnser fleisch geneiget.
Das weis ich wol, vnd wolt auch nicht,
Das ewr hertz wer also gericht.
Das es nicht trawret vberal,
Gleich wer es von bley oder stael.
Das must ja sein ein steinern hertz,
Dems

Dem vn gluck nicht solt bringen schmerz.
Sondern ich euch verman allein,
Das jr nicht wolt verzaget sein.
Das jr wolt jzt auff aller best,
Vber Gotts zusag halten fest.
Vnd sein gesetz mit fleis bewaren,
Alles mißstrawen lassen fahren.
Vnd ob gleich ist der feind sehr starck,
Sehr trotzig, grimmig, stoltz vnd arg.
Vnd auch dis elend sorgen vol,
Vnd es jzt vns geht selten wol.
Das jr doch, durch solche gefahr,
Euch last erschrecken nicht so gar.
Oder bewegen, das am meisten
Ir nicht wolt Gott gehorsam leisten.
Oder jm nicht sein vntertan,
Vnd allein ewern willen han.
Ir solt euch auch nicht duncken lassen.
Das jrs durch ewr vernunfft kont fassen.
Wie z kommen sey auß dieser noth,
Weiß vnd weg, weis alleine Gott.
Die wird er vns wol zeigen an,
Wir müssen jn bezemen lan.
Er woll nach seinem radt vnd willen,
All ding regiern, all vn gluck stillen.
Wir konnen jm gar nichts empfliben,
Wil er dan auch sein hulff verzihen,
Vnd vns probiern noch lenger zeit,
So mag ers thun, wir sein bereit
Zu leiden vnd zu thun allein,
Als

Alls was jm wird gefellig sein.
Doch eines frommen vaters mut,
Der sein kinden nichts boses thut.
Wird er zu vns behalten wol,
Er ist gutig vnd gnaden vol,
Er wird vns ja nicht hoher lahn
Versuchen, dan wir können bstan.

David.

Du sagest recht, denn ich gar oft,
So ich jm gleubt, vnd auff jn hofft,
Habe daher von jar zu jaren,
Sein gutigkeit vnd hulff erfahren.
Vnd zweiffel nicht am herren mein,
Er werd hirnechst auch gnedig sein.
Allein dis thut mir hertzlich weh,
Das ich des volckes jammer seh.
Wie durch tyranny vnd gewalt,
Es vnterdruckt wird manigfalt
Das sich in gricht vnd recht die heren,
Mit gschenck lassen die hende schmeren.
Sprechens vrteil nach gunst vnd gelt,
Deuten das gsetz wies jn gefelt.
Suchen jrn eigen nutz allein,
Die müssen vogt vnd empter sein.
Welche mit schalckheit sind gerust,
Vnd thun alles was sie gelust.
Vnd ist vnter derselben gwalt,
Des lands ein jemerlich gestalt.
Der frembde man thut hertzlich klagen,
Widwen

Widwen vnd Weisen schier verzagen.
Der arme man wird gar beschwert,
Niemandt ist das recht Recht beschert.
Yderman klagt, vnd niemandt ist,
Der dieser sach zu helffen wist.
Das es so vbel nu zugeht,
Vnd im land so erbermlich steht,
Dis ist allein welchs mir mein mut,
So sehr krenckt vnd betruben thut.

Abiathar.

Ia, ein getrewe Obrigkeit
Sol so gesint sein allezeit,
Fart jr nur fort in gleicher massen,
Zu sorgen vor die vntersassen,
So wird euch Gotts hulff bald erscheinen,
Denn er verlest nimmer die seinen.

David.

Sonderlich aber thut mich armen,
Der priester Gotts gantz sehr erbarmen.
Ist das nicht ein vnmenschlich that,
Die Saul an jn begangen hat?
Das er sie hat in diesen nodten
Vmb meinent willen lassen todten?
Ists dan nicht gnug, weh jimmer weh,
Das ich in gfar meins lebens steh:
Wo nicht mein fal so sehr vnglückt,
Das er auch andre nider druckt?

Abiathar.

Es

Es wer vns zwar der groste schmerz,
Der ein abstoßen mocht sein hertz,
Wo wir es anders wusten nicht,
Dan das es alls wurd außgericht
Durch Sauls gewalt, willen, vnd lust,
Das es jtz undt geht zu so wust.
Dieweil wir aber wissen zwar,
Das solchs sich zuträg gantz vnd gar,
Vnd gesche aus Gotts verhen gnis all,
Lieber in diesem jamertal
Was sind wir doch, sind wir verpflicht
Zu greiffen Gott in sein gericht?
Er weis was vns von noten ist,
Vnd sorgt vor vns zu aller frist.
Wir woln in weiter sorgen lassen,
Vnd ein getrostes hertz e fassen,
Vnd leiden alles mit gedult,
Was er vns aufflegt wol verschuldt.

Thobias 2. puer.

Dauid, gnediger kong vnd herr,
Seht dort kompt eylent Ioab her.
Was wird wol der von ewern dingen
Vor guter zeitung mit sich bringen?

Dauid.

Freylich er nichts wird bringen gut,
Denn es mir mein hertz sagen thut.
Wir wollen hir ein wenig stehn,
Vnd lassen in furuber gehn.
Auff das wir horen was er thut,
Mich

Mich dunckt jm sey nicht wol zu mut.

Actus primi Scena quarta.

Ioab, David, Abiathar.

Ioab.

Die klagen on bescheidenheit
Vbr jrs lebens muhseligkeit,
welchen von Gott wird zugegeben,
Das sie zu haus mugn sicher leben,
Vnd on gefahr jrs gutchens gniessen,
In rhw vnd fried jr leben bschliessen.
Ein armer kriegsman mag wol klagen,
Er hab nicht viel von guten tagen.
Wolt Gott das dis mocht bald geschen,
Das ich kont doch erfarn vnd sehn,,
Das des feinds gwalt wurd vnterdruckt,
Vnd Davids reich blieb vnuerruckt,
welchs jm von Gott ist zugesagt.
Dan wolt ich gar nicht sein verzagt,
Das ich wol kont mit warheit sagen,
Fried wer kommen zu vnsern tagen,
Vnd ich wer ein gluck selger man,
Vnd hub erst recht zu leben an.
Aber ob ich solchs hoffen mag,
Das seh ich noch nicht diesen tag.
Dieweil sich vnser gluck verschlimpt,
Vnd sehr von tag zu tag abnimpt.
Denn gleich als wers ein schlechte sach,
Das vns Saul hefftig stellet nach.

D ij Vnd

Vnd vns verfolgt beid tag vnd nacht,
Mit Tyranny vnd hochster macht.
So hebt noch vnser eigen man
Im leger einen lermen an,
Denn den kriegsleuten thut dis andt,
Das dar nicht ist mehr profiant,
Drumb sind sie jtz t so gar vol zorn,
Das ich die sach gab halb verlorn.
Denn wort die fullen nicht den bauch,
Drumb mach ich mich jtz t aus dem rauch,
Auff das ich sie nicht zornger mach,
So ich mich leget in die sach.
Vnd wolt den thun ein predig lang,
welche nicht konnen leiden zwang.
wo werd ich David finden nu,
Das ich jm dis zu wissen thu?
Aber da kompt er eben recht.
Ich euch gern gute botschafft brecht,
Aber die zeit die leids jtz t nicht.

David.

was ist's? thu mir ein klar bericht.

Ioab.

Da ich mich lang gefurchtet fur,
Das kompt vns jtz t recht fur die thur.
Denn im leger der gantze hauff,
Ist mit geschrey vnd klagen auff,
Das er armut vnd hunger schwer,
Nicht kon noch wol ertragen mehr.
Vnd sicht mich die gantz sache an,

Das

Das sie ein boß jar wolle han.
Zum aufbruch odder zum abfal
Dunckt mich sind sie gerichtet all.
Das solch nu nicht muge geschen,
So müssen wir bey Zeiten sehn,
Wie man dem vngluck komme fur.

David.

Furwar ich jtz t on zweiffel spur,
Das mir verfolgten man das gluck
Gentzlich hat zugekert den ruck.
Das niemand gleub ich sicherlich
Geplaget sey so sehr als ich.
Felt mir doch zu vngluck all tag
Mehr dan mein ruck ertragen mag.

Ioab.

Vorwar jtz t ist nicht klagens zeit,
Die sach gar kein verzug nicht leidt.
Last vns viel mehr zusam in eyl,
weils noch nicht hat so grossen feil,
Zur sachen thun, vnd radt erfinden.

David.

Ich wolts an mir nicht lan erwinden,
So ich etwan ein guten fundt
In dieser noth erdencken kundt,
Aber mir felt jtz t gar nichts ein,
wie dunckt dich, was zu thun wol sein?

Ioab.

Nabal ein gar sehr reicher man,
Dij welcher

welcher nicht wonet weit hindan,
Der lest heut ein gros herlich mal
Bereiten zu in seinem sael.
Vnd so viel ichs ab rechnen kan,
wird jtz t alls sein gerichtet an.
Derselb in dieser not allein,
Kan vns jtz t bald behulfflich sein,
Vnd vns mit profiant entsetzen,
Vnd die armen mit speis ergetzen.
So duncks mich nu geradten sein,
Das wir aus vnserm hauffen fein
Erwelen etlich menner gut,
Die nicht haben ein hast gen mut,
Vnd senden die zum Nabal hin,
Das sie mit fried vnd sanfftem sin
In reden an, vnd bitten thun,
Das er mit einem wenig nun
Vns helff, damit wir allein heut
Zu frieden stellen die kriegesleut.
Das gluck, hoff ich gantz vnuerborgen,
Das wird verendern sich auff morgen.
Vnter deß woln die andern sachen
Wir mit Gotts hulff wol richtig machen.

David.

Der nam Nabal der ist nicht gut,
Denn er ein narren bdeuten thut.
Was kan man von ein narren bekommen,
Das ein irgent mocht bringen frommen?
Doch muß man jtz t in diesen sachen,
Ausz

Aus der noth eine tugent machen.

Die weil sich dan nichts besser find,

Vnd wir han so ein hungrijs gfind,

So fal ich deynere meinung bey.

Abiathar sey du auch frey,

Was dich bedunckt, dasselb vns meldt,

Abiathar.

Vorwar es mir sehr wol gefelt,

Vnd falle bey euch allen beyden,

Weil die sach wil kein auffschub leiden.

Ioab.

Aber dort kompt mein bruder recht,

Vorwar keinen getrewern knecht,

Der baß zu diesem handel tocht,

Itzt in der eyl man finden mocht.

Dem wollen wir befehl die sachen,

Er wirds nach allem vorteil machen.

Actus primi scena quinta.

Abisauß, David, Abiathar, Ioab.

Abisauß.

Ich geh auß mein bruder zu suchen.

Die kriegsleut sehr schelten vnd fluchen,

woln den heubtman haben bey sich,

Es trieg dan all mein gdancken mich.

wan sie fort werden also fahrn

zu toben, pochen, vnd zu scharn.

So werden sie in alle not

Vns bringen vmb ein stücke brodt.

D. iij Aber

Aber ich darff nicht weit vmb gehn,
Ich seh in dort beim David stehn.
Es schickt sich eben wie es sol,

David.

Du kompst vns jtz und mechtig wol.
Von dir wir erst geredet han

Abisau.

Ich treffe euch auch recht eben an.
Ioab, das gantze regiment
Das wil das du kommest behend,
All kriegsleut schreyen gelt gelt gelt,
Wo sie nicht werdn zu fried gestelt,
So wirstu, ich thu dir nicht liegen,
Mit in, mit kleinem vorteil kriegen.
Ein solcher lerm wird sich erbeben,
Vnd dir einen schlag greulich geben,
Welchen du wirst vorwinden kaum,
Dem vorzukommen dich nicht saum.

David.

Wir haben vns beradtschlagt nun,
Wie man den sachen mochte thun.
Vnd haben schon ein weg erfunden,
Dardurch wir muge werdn entpunden
Von dieser sorg vnd furchten schwer,
Vnd langt an dich vnser beger,
Das du es wolst zu hertzen fassen,
Vnd dich darin gebrauchen lassen.

Abisau.

worin

Worin ich euch zu dienen weis,
Da wil ich sparen keinen fleis,
Ich wil euch sein gehorsam gern.

David.

Du kenst ja Nabal der nicht fern
Von binnen sein behausung hat?

Abisau.

Was kan vns geben der vor radt?

David.

Ein Legat mustu zu jm sein,
Vnd bitten in dem namen mein.
Das er vns wolt so gunstig fallen,
Die wir verlassen sind von allen,
Vnd so viel zerung teilen mit,
Auff mein anlangend, flehn vnd bit,
Das ich die kriegsleut einen tag
Dardurch zu frieden stellen mag.

Abisau.

Ich furcht es werd jm nicht sein eben,
Meint jr das er werd etwas geben?

David.

Ich hoff es werd von staden gan,
Er ist ja ein wol habner man,
Das er wol kon ohn grossen schaden
Solch gute freund zu gaste laden.
So seh ich ja auch keinen fund,
Dardurch ers vns abschlagen kund.
weil wir mit wenig sind benugt,

D 5 Vnd

Vnd jm nye schaden zugefugt.
Ia, sind viel mehr jm gwesen nutz,
Vnd seiner guter schirm vnd schutz,
Gleich als sie vnser eigen wern,
Solchs wird er ja betrachten gern.
Vnd vns jtz t ja verlassen nicht,
Die weil ers ist vns halb verpflichtet.
Er wird bdencken die ehre sein,
Vnd sich hir willig lassen ein.

Abisau.

Ich sag es auff die trewe mein,
Das aus eim harten kieselstein
Eh wasser einer drucken solt,
Dan vom Nabal, dem trunckenboldt,
Ein stucklein brod, ken ich jn recht,
Vnd so war sagn sein eigen knecht.

David.

Was taug viel ein vnuersucht ding?
Es ist ja eim reichen gering
Ein malzeit brod geben eim armen,
Nabal wird sich vnser erbarmen.
Er kan wol sein gestreng vnd karg
Vber sein gfind, denn sgfind ist arg.
Aber gegen den frembden man
wird er sich anders mercken lan.

Abiathar.

Ir must auch hirneben bedencken,
Das Gott all hertzen konne lencken,
wo

Wo hin er wil mit seiner hand,
Der wird jtz auch machen bekandt,
Das er der sey der alle sachen,
Mit seim wincken wol gut kon machen.
Er wirds schicken wie sichs gehort,
Das diese sach geh glücklich fort.

Abisau.

Dieweil es euch dan wol gefelt,
Das die sach so werd fort gestelt,
So wil ich sie also außrichten,
Das jr drob klagen solt mit nichten.

David.

Du thust was dir geburt von recht,
Gott wird auch beystehn seinem knecht.
Ioab, was dunckt dich bey den sachen,
Was sollen wir nu weiter machen?

Ioab.

Last vns ins legr, vnd da erwelen,
Den wir sampt meim bruder befehlen
Diese Legation in eyl,
Auff das es ja an vns nicht feil,
Da konnen wir auch bass verhuten,
Das die kriegsleut nicht sebrer wuten.
Vnd sich was newes vnter stehn.

Abiathar.

Wolan so last vns jimmer gehn.

Argumentum actus secundi.

David

David sein boten nu abricht,
Die selben sich auch seumen nicht,
Zihn hin nach Nabals haus in eyl,
Irfursatz schlecht in aber feil.
Denn ob sie wol gebn gut bescheidt,
Vnd bitten in in freundlichkeit,
Das er in wol behulfflich sein,
wil er sich doch nicht lassen ein.
Ia, ers in nicht allein versagt,
Sondern auch spotlich von sich jagt.
Vnd meint er hab sehr wol gethan,
Hebt darnach bald zu schlemmen an.
Da jr dan werdet klerlich sehn,
wies beim sauffen pflegt zu zugehn.
Auch jr dis hir beschriben findt,
was fur art hab das naß gesindt.
wie sie sich fulen nach dem sauffen,
wehtag haben mit grossen hauffen.
Ob aber David solchs gefalle,
Das jms Nabal versaget alle.
Das wird das drit teil thun bericht,
Hort weiter zu vnd hindert nicht.

Actus secundi Scena prima.

Boas, Balach serui rustici

Balach.

Vnser Herr ja auff diesen tag
Ein gasterey zu halten pflag,
So die woll abgeschoren war,
Ob er auch das wird thun diß jar?
Y Balach

Boas.

Y Balach weistu das noch nicht,
Ist doch all ding schon zugericht,
Der koch der hat mirs selbs gesagt,
Darzu die eine kuchen magt,
Das nye in vnfers herren haus
All ding so sey gerichtet auß.
Es ist all auffs kostlichst bestalt,
Vnd werden die gest kommen bald.

Balach.

Weistu dan auch was er vor gest
Zu der malzeit beruffen lest?

Boas.

Nicht gwiß weis ichs, gedenck mir doch,
Das es werd'n sein dieselben noch,
So er pflegt stets bey sich zu haben,
Sein zechbruder, die nassen knaben,
Die anders können nichts dann sauffen,
Vnd von einr zech zur andern lauffen.
Das weis ich das kein nuchtern man
Zu dem wolleben kommen kan:
Der sich nicht fet mit wein lest salben,
Es wer dan das er ebrent halben
Sein nechsten nachbarn bitten must,
Der nicht ein leben furt so wust.
Wiewol vnser herr ja in allen
An jm nicht hat ein groß gefallen,
Denn er wil jm oft reden ein,
Vnd nicht jm als gut lassen sein.

Sagt

Sagt oft von tugent vnd von Gott,
Obs Nabal gleich helt als vor spot.

Balach.

Was wird vns dan von guten dingen
Ein solche herlich malzeit bringen?
Werden wir jr auch mit genießen?
Wo nicht, wurd es mich hart verdriessen.
Wir haben ja die arbeit gthan,
Darumb sie ist gericht an.

Boas.

Wie anders? es wird vns wol gehn,
So wir allein zu können sehn,
Wan sich die andern sauffen vol,
So wird es vns geziemen wol,
Das wir mit einem leren mager
Vnser aufferlegt arbeit tragen.

Balach.

O wie ein bose zeit ist nu,
Wie geht es doch so vngleich zu.

Boas.

Wie so? wie sol ich das verstehn?

Balach.

Sichstus dan nicht all vngleich gehn?
Reich, selig vnd herlich auff erden
Durch vnsern sawren schweis sie werden,
Doch vber vns durftgen vnd armen,
Thun sie sich gantz wenig erbarmen,
Durch vns sie gute tage haben,

Von

Von vnser arbeit sie sich laben.
Sorgen doch fur vns nicht ein har,
Lassen vns schier verhungern gar,
Sie sind so stoltz von gelt vnd gut,
Vnd tragen so ein hohen mut.
Das sie vns auch kaum sehen an,
Ia, vns vor jre Esel han.
Sie bschweren vns mit arbeit gros,
Vnd wir sind gleichwol nackt vnd bloß.
Sie geben einen lohn gantz klein,
Vnd wir soln jimmer wacker sein.
Vnd arbeiten die gantze wochen,
Das wir nur werden haut vnd knochen.
Ich wolte z war, so diß ist recht,
Lieber ein herr sein, dan ein knecht.

Boas.

Ey was ich jimmer sagen sol,
Ein solcher narr wer ich auch wol.
Ich wolt auch lieber haben rw,
Aber es geht nicht anders zu.
Gott pflegt, die wir in sunden bleiben,
Den Kutz el vns also vertreyben.
Du aber mit gedult vertrag,
Was nicht geendert werden mag.
So wird es als wol gehn von steden.

Balach.

Das wird mich niemandt vberreden,
Das ich es dafur halten solt,
Das es GOTT also haben wolt.
So

So du es aber helts dafur,
So feilstu weit der rechten thur.
Denn ich habs ja gehoret heut,
Da der predger die schrift außdeut,
Das vns Gott sehr lieb hab auff erden,
Vnd wil das wir all selig werden.
Ist das dann heil vnd seligkeit,
Das man vns pflaget allezeit,
So bger ich nicht selig zu sein,
Der hund sey es oder ein schwein.
O das die reichen an dem ort
Dieselb predig betten gehort,
Sie wurden es zu hertzen nemen,
Vnd sich jrs stoltzs ein wenig schemen.

Boas.

Wie fein das doch ein mensch behelt,
Was jm wolthut vnd wol gefelt.
Hastu sonst draus behalten nicht?
Ich bin ja zwar anders bericht.
Das es ein zeichen gut vnd frey
Der veterlichen liebe sey,
Das gott mit solcher muh vnd zucht
In vns erwecket gute frucht,
Er thut ja alles wol vnd fein,
Vnd weis was wir fur kreutlein sein.
Also ein trewer vater pflegt,
Der zu seim kind recht liebe tregt,
Am selben keine ruth zu sparen.
Das es nicht muge vbel faren.

Gleich

Balach.

Gleich also auch die reichen sagen.
Aber was wil Gott vns viel pflagen?
Wir sind ja sonst genug gepflagt,
Es wird sein von den reichen g'sagt,
Dieselbe haben gute sachen,
Die solt Gott etwas zamer machen.
Vnd auff sie legen arbeit schwer,
Das sie vns druckten nicht so sebr.

Boas.

Lieber, wan dir Gott der gestalt
Het geben vber sie gewalt,
Was woltest doch mit jn beginnen?

Balach.

Das solten sie wol werden jnnen.
Ich wolt sie furn hinaus auff's feldt,
Vnd sie daselb in hitz vnd kelt
Also vmbtreiben vnd beschwern,
Das sie bald solten Gotts begern.
Ich wolt sie leren kennen recht,
Was arbeit eim vor wollust brecht,
Den stoltz wolt ich jn wol vertreiben,
Mit hacken, graben, misten, kleyben.
Sie haben weiß vnd weiche haut,
Vnd essen nicht gern speck vnd kraut.
Solt ich jr koch vnd meister sein,
Ich wolt es jn so treyben ein.
Das sie nach einem magern kol,
Die finger solten lecken wol.

E Die

Die hend in solten werden bald
Von qwesen hart vnd vngestalt.
Schwartz als ein kol, magr als ein hund,
Wolt ich sie machen so ich kund.

Boas. I.

Ey nicht so boeß, wie, so sie dan
Die arbeit kondten nicht bestan?

Balach.

Darzu wust ich wol guten radt,
Ich wolt sie treiben fru vnd spat,
Wolten sie nicht willig vnd gern,
So wolt ich nicht sein von in fern
Mit einer tatrſchen peitschen scharff.

Boas. I.

Vorwar der hetstu wol bedarff.
So du es wilt erkennen recht,
So horstu in das selb geschlecht.
Vnd wo du in derselb gestalt,
Wie sie, hetteſt jrgend gewalt,
Wurdstu viel schlimmer sein dan sie.
Ich wil dir sagen eben wie,
Sie thun vns ja mehr heissen nicht,
Dan was mag werden außgericht
Durch vnser sterck, arbeit vnd fleis.
Du aber auff ein newe weis
Wolteſt sie gar in grund verterben,
Das sie von arbeit musten sterben.
Oder entlauffen auß der welt:

Also

Also was dir an jn mißfelt,
Das wurdstu thun on all bedacht,
So du allein hettest die macht.
Aber der herr geht auß dem hauß,
Ich wil mich machn auff's feld hinauß.
Was wiltu jtz und fahen an?

Balach.

Zwar ich wil gleich bald mit dir gan,
Das er mich krieg zu sehen nicht,
Es wird wol on vns außgericht.
Laß jimmer spielen, sauffen, fressen,
Es wird zwar nicht werden vergessen.
Es wird ein mal kommen die zeit
Das sie zu spet werden mit leit
Vnd grossen wehmut sehr beklagen,
Das sies also getrieben haben,
Wan Gott wird ein schwer vrteil sprechen,
Vnd mit ernst solches leben rechnen.

Actus secundi scena secunda.

Nabal, Gnatho, Abel i. puer, Iacob, Balam.

Nabal.

Es ist ja jtz schier essens zeit,
Gleub, das auch all ding sey bereit,
Mich wundert was die gest auff belt,
Das sich noch keiner eingestellt.
Gnatho, wie ich dich fru bericht,
So hastus ja vergessen nicht,
Vnd es gemacht alnthalben recht?

E ij Seit

Gnatho.

Seit sorgen on, es ist alls schlecht,
Es ist zugricht auff's aller best,
Ich wolt das dar schon wern die gest,
Der lang verzug krenckt mir mein mut,
Vnd verterbt manches essen gut.
Das jm darnach am schmack gebricht.

Nabal.

Sie pflegen ja zu seumen nicht.
Geh junger ruff die gest herein,
Du weist welche geladen sein.

Abel i. puer.

Ia herr, ich wil es fleyszig thun.
Yr Iunckern, so jr gbietet nun,
So ist die malzeit schon bereit.

Iacob.

Wir sind auffm weg jtz t alle beid,
Ich gleub das Nabl zu dieser frist
Auff vns nicht wol zufrieden ist,
Vnd das jm sey wol halber bang,
Das wir verzogen han so lang.
Er hat sich nechten wol bezecht,
Vnd wird jm, ist mir anders recht,
Sein heubt jtz t gantz beschweret sein.
Wir truncken auch zwar sehr viel wein.

Balam.

Ich weis nicht wie jm sey geschen,
Ich kan furwar kaum recht noch sehn,
Mich

Mich dunckt das ich noch nicht den wein
Den ich hab gestern gnommen ein,
Verdawet hab, ich fuls furwar,
Das mir das heubt noch schweimet gar
Es wil heraus vornen zur stirn,
Vnd hemmert mir in meim gebirn,
Als het ich hundert schmid darin.
Aber wir woln gehn zu jm hin
Vnd halten vns nach rechts gebuer.
Sich da steht er vor seiner thur.
Herr Nabal, Gott gruß euch alzeit,
Zu dienen euch sind wir bereit.
Drumb stelln wir vns jtz willig ein,
Vnd wollen mit euch frolich sein.

Nabal.

Ir thut recht, vnd nach meinem willen:
Ich dorfft zwar gestern keiner brillen,
Ich sah alls mit vier augen an.
was habt jr aber so lang gthan?
Halt mirs fur gut, das ich thu fragen.

Balam.

Ich wil euch zwar die warheit sagen.
Als ich gestern auff stund vom tisch,
Daucht ich mich nuchtern vnd fein frisch.
Aber da in die lufft ich kam,
Bald ward mir meine zunge lam,
Die fuß mich nicht wol tragen wolten,
Die hend warn auch nicht wie sie solten.
Der kopff war mir so wunder schwer,

E ij Das

Das ich gieng taumeln hin vnd her,
Vnd hat mich wunder noch vor allen,
Das ich nicht bin in dreck gefallen.
Da ich nu kam zu haus so voll,
Mein bet das was gemacht sehr wol,
Ich legt mich mit hosen vnd schu,
Habs sonst auch vbl gerichtet zu.
Dauon ward ich so mechtig kranck,
Vnd hab gelegen heut so lang
Biß hin nach neunen auff den tag,
Doch ich mit warheit sagen mag,
Das mir mein ghirn ist noch so kranck,
Als het ich den gestrigen tranck,
Noch alzumal verdewet nicht:
Also hat jr mich zugericht.
Das es meim zechbrudr, halt ich frey,
Auch wol so widerfaren sey.

Iacob.

Mir ist ein poß so wunderlich
Begegnet, das darf sagen ich,
Desgleichen sey in hundert jaren
Einem menschen nicht widderfaren.
Es dunckt mich zwar wol halber schand,
Drumb darf ichs nicht wol sein bekandt.

Nabal.

Vor vns mußt jr es sagen wol,
Denn es euch on gefar sein sol.

Iacob.

wir

wir hatten was zu lang gefessen,
Mein gfindlein het mein gar vergessen.
Denn da ich kam vor meine thur,
Da war sie zu, ich klopfst dafur,
Ich klopf vnd klopfst mit fuß vnb hand.
Aber der da hort, war niemandt,
Im haus jderman feste schlief,
Ich ward entrust, hub an vnd rief
Die fraw, den knecht, die magt, den hundert,
Das weret schir ein gantze stund,
Doch alls vmb sonst, ich weis zwar nicht,
Obs nicht mein weib hab zugericht.
Was solt ich thun ich armer knecht
Ich war schleffrig, kalt vnd bezecht.
Ich kroch in stal vnter die schwein,
Da lag ich, vnd schlieff letzlich ein,
Hab so im stro die gantze nacht
Vnter den sewen hingebraucht.

Nabal.

Zwar ein schlim herberge: nu schaw
wan euch so g funden het ewr fraw,
Sie het gescholten vmb den possen.

Iacob.

Sie solt wol habn die thur verschlossen,
Vnd mich daraus nicht lassen kommen,
Eb sie von mir die hand genommen,
Das ich birnechst wolt nuchtern leben,
Vnd mich bey zeit nach hauß begeben.
Wo sind aber die andern gest?

E iij Mein

Nabal.

Mein nachbar sich lang bitten lest,
Hat alzeit außzurichten viel,
Vnd helt nimmer das rechte Ziel.
Er stelt sich alzeit langsam ein,
Vnd wil nur klug vnd nuchtern sein.
Sein wolten wir gantz wol entperen,
Wan nur die andern kommen weren.
Sie werden nicht lang bleiben auß,
Wir wolln gehn vnter des ins haus.

Actus secundi scena tertia.

Abisau, Obed, Aber milites.

Abisau.

wie ist es doch zu aller fart
Ein ding so gferlich vnd so hart,
Zu sein ein gtrewer kriegesman,
Der vnuerzagt all ding greiff an,
Das konnen wir sehr wol erachten,
Obs gleich andre nicht recht betrachten.

Obed.

So geht es zu alzeit auff erden,
Das wenig leut erfunden werden,
Die nicht jrs glucks vnd stands verdreust,
Ein ider bey sich also schleust.
Sih, dem es in seim stand wol geht,
In deinem es viel erger steht.
Also schliessen sie in gemein,
Die weil sie sich mehr bilden ein,

Nicht

Nicht was jr standt vor frommen bringt,
Sondern allein was drein mißlingt.
Daber kompts das der krigsleut leben
Von vielen wird der tittel geben,
Als sey dar kein vnruhe bey,
Es sey von allem elend frey.
Das thun aber die leut allein,
Die gantz vnd gar vnwissent sein.
Vnd haben nye gehort bescheidt,
Von vnfers thuns gelegenheit,
Wie das es vol sey gantz vnd gar
Des elends, vnglucks vnd gefahr.
Solten sie es ein mal versuchen,
Wurden sie dan nicht schwern vnd fluchen,
So wurdens ja Gott lassen walten,
Vnd von vns etwas anders halten.

Aber.

Ich hab z war auff von jungen jaren
Mit grossen schaden alls erfahren.
Denn da ich war ein junger knecht,
Gedaucht mich sein das gar nicht recht.
Es thet mich alles schwerlich qwelen,
was mir mein vater thet befehlen.
Vnd so ich dan ein kriegsman sach,
Ich alzeit bey mir selber sprach,
Ey wie hat der so gute tag,
Er thut allein was es wol mag.
Er ist von aller arbeit frey,
Vnd hat ein guten mut darbey.

E 5 Solche

Solche gedancken fieln mir ein,
Ich wolt kurtz umb ein landsknecht sein,
Vmb kriegs elend ich gar nichts wust,
Mir ist nu wol gebuest die lust.
Ich bin sein nu gar oft sat worden,
Vnd weis das zu dem krieges orden.
Niemand kan lust vnd liebe haben
Dan allein vnuersuchte knaben.

Obed.

Von kriegs elend vnd solchen dingen
Wolt ich auch wol ein liedlein singen.
Es ist mir auch also ergangen,
Ich wolt zu hauß nicht sein gefangen,
Vnd lief in krieg, vnd hab mit macht
Mein leib gewagt in mancher schlacht,
In scharmutzeln vnd sturmen heis,
Hab ich geschwitzt oft saxoren schweis.
Da mancher gieng bey mir zu grund,
Ich hab gehabt viel boßer stund.
Doch wie dem all, saxor her saxor hin,
Ich der endlichen meinung bin.
Ich wil mich so in diesem standt
Halten, das ich nicht werd zu schand.
Ich wil trewlich mein ampt bestehn,
Vnd solt es alls zu trummern gehn.
Ich wolt lieber mein leib verlieren,
Dan das ich David solt verkieren.
Ich wolt lieber nicht sein auff erden,
Dan an meim herrn meyneidig werden.

Es

Es must mir warlich werden leid,
Solt ich nicht bedencken mein eid.
Wir müssen jn darumb nicht meiden,
Das wir was müssen mit jm leiden.
Diß leids werden wir werdñ ergetzt,
wan er ins' reich wird eingesetzt,
widder des Sauls willen vnd list,
Das jm von Gott verheissen ist.
So bald nu solches wird geschen,
wird es mit vns all besser gehñ.
Dan werden wir vor vnsern lohn,
Gut, ehr vnd freud bringen dauon.

Abisau.

Du sagst wies an jm selber ist,
Vnd mit mir einer meinung bist.
Ich gdencke das der selbe tag
Ia nu so gar weit nicht sein mag,
Das wir des alles werden gwar.
Ia es wer schon vor langest klar,
So David mit den feinden sein
Sich het mit ernst wolln legen ein.
Het er so offft verschont jr nicht,
Die sach wer lengst on muh verschlicht.
Denn ob jm wol Gott in die hand
Gibt seine feind, das er on schand
Vnd one muh in einer stund
Dieselben all vertilgen kund,
So ist ers doch mit nicht geflissen,
Vnd macht sich druber ein gewissen,
Das

Das er begieng ein solche that
An dem, den Gott gesalbet hat,
Vnd in gesetzet in solche ehr,
Das er seines volcks kunig wer.
Dis ist die aller grost vrsach,
Das wir so lang habn vngemach.
Vnd zihn so in der jrr herumb,
Itzt in die richt, dan in die krumb.
Ich viel anders gesinnet bin,
Ich ließ es so nicht gehen hin,
Kem mir der feind zu der gestalt,
Das ich krigt vber in gewalt,
Ich wolt in so schmiren vnd salben,
Das er solt trieffen allenthalben,
Zwar nicht von oel vnd balsam gut,
Sondern von seinem eigen blut.
Nach seiner salb wolt ich nicht fragen,
Mit dieser † laug wol ich jm z wagen.

† vibrato
venabulo.

Aber.

Das deucht mich auch gantz gut vnd fein,
Vnd wolt darbey viel lieber sein,
Da man mit solcher salbe schmert,
Den da man hin zur kirchen fert,
Da wolt ich noch von werden jung.

Obed.

wolan es sey von dem genung,
Mit viel worten ist's nicht gethan,
Ein grosser gwerb wir jtz und han,
Das wollen wir erst richten auß.

Sekt

Abisaus.

Seht dort steht Nabal vor seim haus,
Dasselb das ist der rechte man
Den wir haben zu sprechen an.

Actus secundi Scena quarta.

Nabal, Obed, Abisaus, Aber, Gnatbo, Abel. I.

Nabal.

Die kuche ist bestelt auff's best,
Noch sind nicht kommen alle gest.
Iunger, hastus alln angezeigt?
Wern sie zu kommen auch geneigt?

Abel I. puer.

Herr, ich habs alles außgericht,
Es weigert sich gar keiner nicht.
Sie sagten zu, das sie in allen
Euch wolten gern sein zu gefallen.

Nabal.

Was kommen aber da vor gseln?
Mich dunckt das sie sich gleich so steln
Als wolten sie mich sprechen an,
Vnd eine reuterzerung han.
Solch volck das pflegt zu bringen nicht,
Auff's nemen sind sie abgericht.
Ich bin aber on alles schertzen
Allen betlern so gram von hertzen,
Das ich wolt lieber sehn ein bern
Dan solche leut, die was begern.
Sie gehn furwar kriegsch gnug herein.

Ir

Ir gwer vnd harnsch gibt hellen schein.
Soltens wol sein Davids genossen?
Der sich gestern mit man vnd rossen
Hie auff die neß sol glagert haben,
Wie mir angezeigt durch meine knaben?
So sie von der gesellschaft sein,
So wil ich in begegnen fein.
Vnd sie entfangen fur der thur,
Das sie Gott dancken solln darfur,
Das sie vngschlagen sind entkommen.

Abisau.

Hort bruder, wie thut Nabal brommen.
Wir wollen gleich hin zu ihm gahn,
Vnd vnser sache tragen an.
Herr Nabal, Gott geb euch all gluck.

Nabal.

warumb bhalt jr nicht auch ein stuck?
wer hat euch aber her gesandt?
Ir seid mir zwar all vnbekandt,
Zwar solche gest vnd solche leut,
Hab ich ja nicht geladen heut.

Abisau.

Ach herr lasts euch nicht sein ein spot,
Zwung vns jtz t nicht die grosse not.
welche dan auch wol eysen bricht,
So wern wir hieher kommen nicht,
Ich halt, euch sey nicht vnbekandt
Isay Sohn, David genant.

Vnd

Vnd wie jtz t steh desselben sach,
Wie er hab so groß vngemach.
Euch herr, darzu den ewern allen,
Wil er gern leben zu gefallen.
Vnd wunscht euch gluck, bittend darneben,
Das jr raum vnd stadt wollet geben
Mit mildem vnd gunstigem mut,
Was er von euch begeren thut.
Es ist vns jtz t gewiß furkommen,
Das jr solt haben furgenommen,
Auff diesen tag erw schaff zu bscheren,
Vnd altem gbrauch nach dem zu ehren
Zugricht ein mal, vnd auch verschafft
Zu laden die gantz nachbarschaft.
So ist nu vnser hochst begir,
welchs auch gantz freundlich bitten wir,
Das jr euch doch vber vns armen
In diesem kummer wolt erbarmen.
Denn dis mit warheit ich euch sag,
Das es heut ist der dritte tag,
Das wir nicht han im leger brodt,
Leiden von hunger grosse noth.
So seid jr herr es nu allein,
Der vns hir kan behulfflich sein.
Yr konnet vns entsetzen nun,
So jr es allein wollet thun.
Wir fordern auch diß nicht vmb sunst,
Das jr vns jtz t beweyset gunst.
Denn all die zeit so vnser hauff
Sich bierumb hat gehalten auff.
So

So sind wir ewerm land vnd vibe
Mit Worten oder wercken nie
Zu nah gewesen oder zu schaden,
Sondern viel mehr in allen gnaden
Das alls beschutzt, wie ewre knecht
Solchs alles konnen zeugen recht.
Diß wolt jr herr bedencken eben,
Vnd vns etwas zur zerung geben,
Was jr wol konnet jtz entberen,
Damit wir vns heut mogen neren.
Das wird sein gantz sehr wol gethon.

Nabal.

Was David? Was Isay Sohn?
Viel knechte voller meucheley,
Betrug, vntrew, verreterey,
Die nicht arbeiten wollen gern,
Lauffen teglich von jren herrn.
Ich must ja zwar nicht witzig sein,
Sondern beraubt der sinne mein.
So ich die alle wolt erneren,
Ob ich gleich so viel kont entperen,
Ich bin aber nicht so ein geck,
Das ich mein gut werff in den dreck.
Den jr hie sucht, den find jr nicht,
Nein, ich bin anders abgericht.
Ziht anhin auff ein ander strass,
Da es euch mog gelingen bass.
Hie krigt jr nichts, mugt weiter wandern,
Vnd suchen euch jrgent ein andern,
Der

Der sich durch gute wort vnd schmeicheln
Gern laß verfuren vnde streicheln.
Ir durfft euch auch nicht viel verblumen,
Vnd so hoch ewer wolthat rhumen.
Das ir habt gros trew angekert,
Hab ichs doch von euch nie begert,
Begers auch diese stund noch nicht.

Abisau.

Ey herr jr seid zu mild bericht.
Ein man nicht also reden solt,
Von vns jr anders halten wolt.
Wir sind nicht meuchler, auch nicht fluchtig
Die allein wern zu feyren tuchtig.
Sind nicht von vnsern herrn entlauffen,
Wir han auch niemands woln verkauffen,
Sondern wir werden vnuerschuld,
Durch tyranny vnd gros vnbuld
Des Fursten so getrieben vmb,
Sonst sind wir ja ehrlich vnd frumb.
Dan es kan ja kein mensch nicht klagen,
Das jm bey nacht odder bey tagen,
Von vns wer zugefugt ein leid.

Nabal.

Du must, das sag ich auff mein eidt,
Zwar sein ein vnuerschampter man,
Das du kong Saul darffst klagen an.
Vnd jm so reden an sein ehr,
Gleich als er ein tyranne wer.
Der euch verfolgte mit gewalt.

F wie

Gnatho.

Wie hats vmb die sach ein gestalt?
Ich hab es drin im haus gehört,
Das sich hir heben scharffe wort.
Was sind mir das vor kriegesleut?
Was suchen die hie, eben heut,
Da wir im fried wolln frolich sein?
Herr, last sie ja ins haus nicht ein.

Nabal.

Sie kommen mit gewappter hand
Von Davids rotten auß gesand,
Derselbe von mir fordern lest,
Das ich, was jtz vor meine gest
Ist angericht in meinem hauß,
Im geben sol ins leger naus.
Damit er mocht außspicken fein,
Die jtz gar außgehungert sein.
Werden aber aus meinem gsicht
Sie von stund an sich machen nicht.
So wil ich bald auff diesem plan
Ein solch spil mit jn fahen an,
Das sie nicht wissn wo auß, wo in.

Abisau.

wie? hat es einen solchen sin?
So wil ich dich zu erst auffreiben.

Obed.

Halt in, laß es jtz und so bleiben.
Vmb fechtens wiln sein wir hie nicht,
vir

Wir wolln des thun David bericht,
Der wird wol radten zu den sachen,
Wie wirs hinfurder sollen machen.

Nabal.

Ziht jimmer hin, vnd sagts jm alls,
Was euch begegnt ist dieses fals.
Vnd zeiget jm noch an darbey,
Das er nicht so vermessen sey.
Das er sich auff gemeiner strasse
In diesen grentzen finden lasse.
Sondern das er zibe bald von stadt,
Wo nicht, so wil ich finden raht
Im fuß zumachen, das er mein
Sein lebenlang sol eingdenck sein.
Drumb denckt vnd packt euch bald hindan.

Abisaus.

Zwar, du bist der rechtschuldge man.
Meinstu das wir nach dir viel fragen?
Du solst vns wol ein schweis abiagen,
Denn da bist recht geschicket zu,
Ia, wie dein allerbeste ku.
Ein grob vnd vngehoblets holtz,
Der allein ist von narheit stoltz.

Gnatho.

Ey landsman schon, ein solchen man
Soltu so hart nicht faren an,
Du weist villeicht nicht wer er ist.

Abisaus.

F ij Ein

Ein vnflat, gleich als du auch bist.
Aber das sag ich auff mein eid,
Nabal, es sol dir werden leid.
Lest mich Gott lebn, so wil ichs machen,
Das du vns nicht solt mehr belachen.
Ich wil dir widerumb so messen,
Das du solt nimmermehr vergessen,
Was du mir hast an diesem ort
Auff diesen tag geben vor wort.
Da magstu dich wol richten ein.

Gnatho.

Vorwar gantz sehr mich jammert dein,
Das du vmb solch geringe sachen,
Dir diesen man zum feind thust machen.

Abisau.

Ich wil dir bald, du loser tropff,
Also zulausen deinen kopff,
Das dus solt fueln vber ein jar.

Gnatho.

Fur dir furcht ich mich nicht ein bar.

Aber.

Ey nicht, laß vns von binnen gehn,
Sie mugen fur die beule stehn.
Wir wollen widrumb kommen bald,
Aber nicht in dieser gestalt,
Das wir wolten mit demut bitten,
Sondern nach krieges art vnd sitten.
So wird der Nabal dan thun buß,

Vnd

Vnd fallen vns bittend zu fuß.
Der jtz t meint, das er durch sein pocken
Sich an vns hab gar wol gerochen.
Vnd das wir gar sein abgeschreckt,
So er schnarcht vnd die zene bleckt.

Nabal.

Sie mugen hin z ihn jren weg,
Solch gest ich nicht zu not gen pfleg.
Gnatho was sagstu zu den sachen,
Was meinstu das wir solten machen,
So sie sich was wurden vermessen?

Gnatho.

Oho het wir so lang zu essen,
Meint jr das sie so kune sein,
Das sie sich mit euch lassen ein?
Sie mugen wol sehn etwas sawr,
Aber sie sind verzagte laur,
Vnd meinen vns mit wort zuschrecken.
Ich hab den tisch schon lassen decken,
Last vns darzu in freuden sitzen,
Vnd sie im legr vor engsten schwitzen.
Verzibt nicht lang, die speis wird kalt.

Nabal.

So geh hinein, vnd bstell das bald
Die ersten gricht werdn auffgetragen.
Hilff Gott, was sol ich jimmer sagen,
Wie sind die leut so abgefembt,
So mutwillig vnd vnuerschempt,

F ij So

So vnfinnig vnd vnbedacht,
Das sie meinen sie haben macht,
Das ein andern zumuthen an,
Was sie sich allein treumen lan.
Was jn gefelt, das muß sein recht,
Vnd wollen solchs auch haben schlecht.
So das ein andern nicht behagt,
Vnd er es jn villeicht versagt,
So ist dar lerm in allen gassen,
Sie thun gar bald ein grol drumb fassen.
Schreyen, es sey sund vnd auch schand,
Ir dienst sey vbel angewandt.
So du doch des hast bgeret nicht,
Gleich als mir jtz t vom David gschicht.
Aber was frag ich viel nach jm,
Was kummert mich sein zorn vnd grim?
So er mir doch kan schaden nicht.
Ich gleub es sey all zugericht,
Ich wil der losen leut vergessen,
Vnd frolich heut trincken vnd essen.
Wie solchs auch mein vorfaren thaten,
Vnd mir jtz t Gnatho hat geraten.

Actus secundi scena quinta.

*Jacob, Nabal, Balam, Abraham, Simon, Gnatho,
(Abel 1.*

Jacob.

Herr Nabal, ich bins nicht gewont,
Das jr der gest so lang verschont,
Ir pflegt nicht zu verzihn so lang,
Ein

Ein hungriger der wurd wol kranck.

Nabal.

Es ist mir zwar mit selber nicht,
Vnd widder meinen willen gschicht.
Aber als ich steh vor der thur,
Ist mir etwas gefallen fur,
Dasselb hat mir on alles schertzen,
Sehr weh gethan in meinem hertzen,
Vnd het ich nicht der gest verschont,
Ich het in warlich abgelont,
Es wer hingangen nicht on blut.

Iacob.

Botz druß, das wer nicht gewesen gut,
Was ist euch hir dan vorgestossen?

Nabal.

Ich mag nicht sagn den lamem possen.
Darzu so ist es jtz t nicht zeit,
Die tisch sein alle schon bereit,
Wir woln vns setzn, ist aller best.
Iunger, sind kommen all die gest?

Abel i. puer.

Sie sind all drein, allein die zwen
Die dort z samen spacieren gehn.

Nabal.

Das ist jr alte gewonheit,
Sie sind die letzten alle zeit.

Abraham.

F iiij wie

wie gehts doch zu so wunderbarlich
Vnter den menschen, sage ich.
wie mancherley lust, sin, begir,
Ist auff erden furkommen mir.
Was eim gefelt vnd liebet dar,
Ist hir eim andrn entgegen gar.
Also sind etlich nasse knaben,
Die nirgend lust vnd frewd von haben,
Dan das sie nur mit aller macht
Im sause leben tag vnd nacht,
Meinen sie sein so freye helt.
Aber mir nichts so sehr mißfelt
Als der selbigen art vnd weis.
Denn ich hab mich mit hohem fleis
Auff kunste der Philosophey
Von jugent auff gegeben frey.
Vnd geh nicht oft noch gerne auß,
Nirgent ist mir baß dan zu hauß.
Vnd jr solt mir solchs gleuben frey,
Das mir nicht wol zu mute sey,
Das ich jtz sol zu gaste gehn,
Denn ich weis wol was dar wird gschen.
Nabal der wird sich sauffen vol,
Vnd vns darnach all pflagen wol.

Simon.

Das ist sein art, die helt er eben,
Behelts auch wol bey seinem leben.
Was sonst betrifft ewr meynung fein,
Der kan ich nicht zu widder sein.

Das

Das ich jr aber folge nicht,
Vorwar das nicht mit willn geschicht.
Mein weib des alls ein vrsach ist.
Die mich zu haus stets nagt vnd frist.
Ich halt das auff der gantzen erden
Irs gleichen nicht mag gfounden werden.
Sie lest von zancken ab gar selten,
Von fluchen, morren, hadern, schelten.
Biß ich jr laß allein das haus,
Vnd pack mich zu der thur hinaus.
Daher kompts das ich lieber bleib
Bey andern, dan bey meinem weib.
Vnd bring so zu war mit kleiner ru
Die zeit vnd all mein barschaft zu.
Aber seht dort siht Nabal auß,
Das heubt das wird jm werden kraus
Das wir so lang sind auß gewest.
Gott gruß den wirdt vnd auch die gest.

Nabal.

O tardè, wo bleibt jr so lang,
Ich gdacht jr weret worden kranck.

Abraham.

Ich kond nicht eh kommen von haus,
Ich het vor was zu richten aus.

Nabal.

Das weis ich wol, solch kluge gsellen,
Haben alzeit was zu bestellen.
Aber was hat der ghabt zu braten?

F 5 was

was gilt, ich wolt es wol erraten.

Simon.

Ich weis zwar nicht, wolan radt her.

Nabal.

Ich wil radten ohn alls gefehr.
Ir seid ja nechten, ist mir recht,
Zu haus gekommen wol bezecht,
Ist da ewr fraw gewesen stum,
So ist die mein auch still vnd frum.
Ich mein sie sol euch han entpfangen,
Das jr so lang zur zech gegangen.
Vor zorn wird sie sein gar verbliechen,
Vnd euch also herauß gestriecken,
Das jr von farben noch seid schon.
Dis ist geweest der erste lohn.
Darnach hat sie euch armen man
Heut nicht wolln auß dem hause lan,
Biß sie von euch ein eid genommen,
Das jr nuchtern solt widerkommen.

Simon.

Ir habts erraten auff mein eid.

Gnatho.

Ir herrn es ist die hohe zeit,
Das jr euch setzet bald zu hauff,
Die speis ist schon gegeben auff.

Nabal.

So laß sie auch aufftragen bald,
Vnd

Vnd schaw das alls sey recht bestalt.

Gnatho.

Ich wil es alls mit fleis bestellen,

Balam.

Wo kompt jr her mit dem gesellen?

Nabal.

Ich hab jn nechst getroffen an,

Er ist sehr ein kurtzweilger man.

Darzu ein meister glert vnd weis,

Wie man sol kochen gute speis.

Auffs leckrichst vnd auff new manier.

Aber es ist die zeit ja schier

Zu tisch, wolan geht jr vorhin.

Abraham.

Das het wol einen newen sin,

Das die gest solten voran gehn.

Nabal.

Ey last vns hie nicht lange stehn,

Last euch nicht notgen, geht nur vort.

Simon.

Herr Nabal das wer vnerhort,

Geht jr vorhin, es euch gezimpt.

Nabal.

Dasselb nicht viel gibt oder nimpt.

Sol ich euch den weg weisen dan?

Iacob.

Also

Also ist's recht vnd wolgethan.
Herr Abraham folgt jr dem herrn,
was wolt jr euch doch lange wern?
Wir sind ja volck auß einem reich.

Abraham.

wolan, so gehn wir all zugleich.

Argumentum Actus tertij.

Nu wil der schertz nicht werden gut,
Denn David sich beraten thut,
wie er Nabals hohmut mug brechen,
Vnd mit gewalt sich an jm rechen.
Solchs einr von Nabals knechten hort,
Eylt derhalben nach hause fort.
Das er warne den herren sein,
Findet aber die Fraw allein.
Denn Nabal hat sich wol begossen,
Vnd gerissen gar seltz am possen.
Mit vnlust die gantz Zech erregt.
Vnd sich bey zeit zu rw gelegt.
Derhalben wird die groß gefar
Der Frawen angezeiget klar.
Dieselb die sucht nu eylend radt,
wie doch zuthun sey solcher that.
wie sie dem vngluck mog vorkommen,
Vnd hat sich entlich furgenommen,
Das sie mit demut vnd geschencken
wol Davids zorn vnd fursatz lencken.
Ob jr nu solch anschleg gelingen,
Solchs

Solchs wird das vierd teil mit sich bringen.

Actus tertij scena prima.

David, Abisau, Ioab.

David.

Ist Nabal so ein loser wicht,
Der an kein wolthat dencket nicht?
Vnd darff vns zu entbieten wort,
Die ein ehrliebnder nicht gern hort?

Abisau.

Er flucht vnd pochet grausam sehr,
Gleich als er gar besessen wer.
Vns vnd auch euch in gleichem fall
Die schalt er vor verreter all.
Vor buben die entlauffen wern,
Vnd hetten bstolen jre herrn.
Daruber er noch ernstlich drawt,
Er wolt vns blewen vnser haut,
Wo wir vns bald von angesicht
Auß diesen grentzen machten nicht.

David.

Was sagest du dan zu den sachen?

Abisau.

Ich thet es zu war auff's beste machen.
Erst thet ich vnser vnschuld kunt,
Verfacht die sach mit gutem grund.
Darnach versucht ich schon geberden,
Ob er durch flehn wolt linder werden.
Vnd

Vnd lassen sich durch bitt erweichen,
Ob gute wort thun wolten zeichen.
Aber da halff nichts vberall,
Es war verloren allzumal.
An vnser red sich gar nicht kart,
Ia, er daruon viel stoltz er ward.
Vnd hab ich in erkennen eben.
So wird er mit gut gar nichts geben.
wie sollen wirs dan greiffen an?
Solln wir in gar zu friede lan?
So meint er das wir sein verzagt,
Vnd er hab vns mit wortn veriagt.
Sollen wir dan mit bit vnd flehn
Vns etwas weiter vnter stehn?
So wird er sich noch mehr behagen,
Vnd es mit hohmut doch abschlagen.

Ioab.

Wo ich so schal wer wordn entpfangen,
Ich het ein nerrisch that begangen,
Vnd het dem groben pawrn gar eben
Ein weidliche maultasche geben.
Vnd jm die haar etwas verlesen,
Das er nicht bald het sollen gnesen.
Ich het jms maul vnd angesicht
Auff landsknechtsch also zugericht.
Das er het sollen fulen sehr,
wie es gar viel ein anders wer
Sein g sind nach seim mutwiln zu straffen,
Vnd mit ein kriegsman ban zu schaffen.

Ich

Abisau.

Ich mich auch schwer enthalten kund
Das ich nicht was mit jm begunt.
Vnd het ich nicht geschonet mehr,
Ich weis nicht was geschehen wer.

Dauid.

Es ist so gut, mirs auch gefelt,
Du hast gthan wie ein kluger helt.
Nu wolln wir schliessen einen radt,
Denn es nicht wenig auff sich hat,
Wie wir die knecht zu friede stellen,
Vnd wie wir mit dem groben gsellen
Es widrumb sollen schlafen an,
Das er es nicht vmb sonst gethan.
Das er vnuerschempt vns so sehr
Hat angetast an glimpff vnd ehr.
Ioab, was duncket dich hirbey,
Wie meinstu das zurathen sey?

Ioab.

Ir sehts, vnd seid auch selber klug,
Das die sach leidet kein verzug.
Denn armut vnd der hunger schwer
Pflagen die kriegsleut alzu sehr.
So weis ich nu kein andern fund,
Da diß durch gendert werden kund,
Dan das jr bald thut zu den sachen,
Im leger einen fried zu machen.
Das sich die knecht geben zurw,
Dar

Das wird diß allein dienen zu.
So jr anzeigt allen rotten
was Nabal vns hat zuentbotten.
Das wird sie all verdriessen sehr,
Vnd wird sein jr hochster beger,
Das sie sich mochten an jm rechen,
Vnd mit gewalt den hohmut brechen.
So jr dan merckt an jrer stim,
Das sie nu sind enz und mit grim.
So furt sie in der hitze auß,
Vnd gebt jn preiß des Nabals haus.
Das sies einnemen mit gewalt,
Vnd wer was krigt, das ders behalt.
So wird gestrafft der lose man,
Vnd bringt der hauff ein beut daruan.
Wir müssen dar nicht fragen nach,
was andre sagen zu der sach.
Den solchs wol nicht zu ehrlich scheint.
weil wir doch gnennet werden feindt.
Vnd wil vns fur freund niemand halten,
So wolln wir es Gott lassen walten.
Vnd vns feindlich genug beweisen,
Verheren alls mit brand vnd eisen.
So werden sies werden gewar,
wie es nicht sey ein klein gefar,
Das man so stoltz vnd so verbolgen
Vnschuldge kriegsleut darff verfolgen.

David.

Es ist nicht on vrsach geschen,
Das

Das ich bißher hab zugefehn.
Bin gwest mit meinem gluck begnugt,
Vnd niemand schaden zugefugt.
Denn ich hab durch solche gedult,
Beweren wolln vnser vnschuld.
Vnd das dieselb im gantzen land
Also viel leuten wurd bekant.
So hats mich auch gedaucht nicht recht,
Das des herren entgelt der knecht,
Vnd das der vnschuldige hauff,
Dem sonst zu viel wird glegt auff.
Solt vmb jrs herren schuld vnd sund
Vertorben werden in den grund.
Die weil aber mein gutigkeit
Nichts hilfft, noch mein sanfftmutigkeit,
Vnd der Nabal mein willen gut
Nicht allein nicht erkennen thut,
Sondern daruber das wir flehen
Vns angreiff mit lestern vnd schmehen.
Wil mich lieber ein feind erkennen,
Dan einen freund vnd nachbar nennen.
So wil ichs jm machen so heis,
Das er sol schwitzen blutgen schweis.
Er sol erfarn mit grossen schaden,
Was er auff sich vorn sach geladen,
Ich wil jn nicht lassen genesen.

Abisau.

Das ist mein sin auch lang gewesen.
Denn was ists, das wir dem thun gut,

G Der

Der es auffnimpt mit bosem mut?
Bey dem kein woltbat etwas gilt,
Sondern darumb noch schmecht vnd schilt?
Ja, es dunckt mich beyna allein
Ein vrsach vnsers jamers sein.
Darin wir jtz so lange leben,
Das wirm feind zu viel nachgegeben.
Das wir in han zu viel gesspart,
Vnd auff vertrag zu lang gewart.

David.

Es ist noch nichts versehn bißher.
Vnd so ja was versehen wer,
So wil ich lieber dis geschrey,
Das ich mehr from vnd gutig sey,
Dan tyrannisch, grausam vnd rauch,
So dunckt es mich noch besser auch,
Das einer durch vnwissenheit
Vieler verschont in krieges zeit.
Die ein stauß verdient betten wol,
Als das er vnbedacht vnd toll,
Ein eingen man brecht vmb sein leben,
Der nie dar zu het vrsach geben.
Aber wir wolln den handel gar
Antragen vor der gantzen schar,
Vnd wolln vns rusten, das wir bald
Die sach angreifen mit gewalt.

Actus tertij scena secunda.

Abelz. Aser pueri.

Der

Abel 2.

Der newe scheffer hat vorwar
Es alls bestellet herlich gar.
Es sind der gricht so mancherley,
Gekocht, gebackn, gebraten frey,
Das ich sie nicht all nennen kan,
Die gest ein wunder druber han.
Sonderlich gfelts meim Iunckern sehr,
Der legt dar ein z war grosse ehr,
Mit einem so herlichen mael,
Als nie gewest auff seinem sael.
Er selber so getrost auch frist,
Das daran wol zu spuren ist,
Das jm hie bislein schmecken wol.

Aser.

Der das nicht mocht, der must sein tol.
Wer nicht gut bislein essen wolt,
Ich weis wol was er fressen solt.
Puttermilch wurd er werden froe,
In eine kw ghort haberstroe.
Aber ich halt das da kein gast,
Sich fur der speise wehre fast.
Wer sich selbs da verseumen wolt,
Den schaden billich haben solt.

Abel 2.

Sie halten sich all nach gebuer,
Der nachbar gibt wol weißheit fur,
Greiffst gleichwol mit zum dicksten zu.
G ij Der.

Afer.

Der macht alzeit dem herrn vnro
Mit klugeln, vnd wundert mich fast,
Das er in gleichwol ladt zu gast.
Lieber was disputiert er dan?

Abel 2.

Er hub vom essen erstlich an.
Die frembde art gesiel jm nicht,
Zu viel so wer auch angericht.
Er hieß es ja ein vberfluß,
Daran Gott selbs het ein verdruß.

Afer.

Was sagt jm dan der Iuncker drauff,
Kamen sie nicht druber zu hauff?

Abel 2.

Der Iuncker sagt, doch mit zu lacht,
Wer in zum predger het gemacht.
Er hette solche kluge wort
Von den Leuiten oft gehort.
Die ließ er sich bekummern mit.
Aber an in legt er ein bitt,
Das er jm wolt zugfallen sein,
Vnd thun jm bscheid ein becher wein.
Da wolten sie jtz t handeln van.

Afer.

Er bat in kaum genommen an.

Abel 2.

Er

Er war gros, vol von starckem wein,
Er solt jm han gelohnet fein,
Das er hets disputierns vergessen,
Aber er thet wie vbermessen.
Hub an von messigkeit zu sagen,
Vnd vbersauffen sehr zu klagen.
Das ein weinschlauch vnd ein vielfraes
Der nicht wuste zu halten maess,
Gift auß dem machte seinem leben,
Welchs zur gesundtheit wer gegeben.

Aser.

Was sagt der Iuncker dan zu allen?

Abel z.

Er lies es sich nicht halb gefallen.
Sagt, das sie wolten von der maess,
Nach gschener malzeit reden baß.
Denn dauon zeit zu reden wer,
wan sie nicht konten trincken mehr.

Aser.

Wie, nam er jn dan auch noch an?

Abel z.

Nein, er wolt gantz vnd gar nicht dran.
Der Iuncker bat ein lange zeit,
Das er nur thet ein mal bescheidt.
Er wolts aber gentzlich nicht thun.
Als das der Iuncker mercket nun,
Da tranck ers einem andern zu,
Der nam es an on alle muh.

G ij Dem

Dem wars zu trincken auß kein kunst.

Aser.

wie, sind sie dan auch frolich sonst?

Abel 2.

Sie trincken flucks zu halb vnd vollen,

Noch sie nicht frolich werden wollen.

Sich noch nicht grosse frewd ereigt,

Der ein halb schlefft, der ander schweigt.

Der Iuncker der thut ja das best,

wolt gern frolich machen die gest.

Trinckt in fast zu, jtz halb, dan gantz,

Sicht in doch nicht wol auff die schantz.

Er muß alzeit der erst sein vol,

Die andern die sind nicht so tol,

Das sie so eingiessen den wein,

Sie können sich verschonen fein.

So richtet auch mit seinem wahr

Der nachbar viele trawrkeit an.

Der wil viel predgen bey dem wein,

Da man sol guter dinge sein,

Ich gleub, wer er nicht da gewest,

So wern viel frolicher die gest.

Aber nu wird nichts werden draus,

Sie werden nuchtern gehn zu hauß.

Allein der Iuncker wie es scheint

Der wird nicht nuchtern bleiben heint.

Aser.

Hat eres doch auch zalt allein.

Aber

Aber wir wollen gehn hinein.
Du auff den Iunckern fleißig schaw,
Ich wil gehn warten auff die frau.
Ob sie was het von noten mein,
Sie daucht mich nicht zu frieden sein.
Des Iunckern leben macht sie kranck,
Ich geh, das ich nicht bleib zu lang.

Abel 2.

Sich, wolln doch schon daruon die gest,
Das sie der herr so bald verlest?
Villich wolln sie gehn in den garten,
Ich muß hin, vnd auff den dienst warten.

Actus tertij scena tertia.

Nabal, Iacob, Balam, Abraham, Simon,

Nabal.

(Gnatho.)

Wolt jr dan so bald von mir gehn,
Euch ist nicht viel zu gut geschehn.
Es ist doch alls der red nicht werd.
Noch eins getruncken auff dem pferd.
Gnatho bring her ein kanne wein,
Die muß noch außgetruncken sein.

Abraham.

Ich wolt lieber von stund an sterben,
Dan mich willig vnd gern versterben
Mit einem vberflußgen wein.

Nabal.

Ir dunckt mich nicht bey sinnen sein.

G iij Zwar

Zwar viel kluger dan jr, ich bin,
Der jr habt so ein seltz am sin.
Vnd meint das jr durch ein trunck Wein
Solt gantz vnd gar vertorben sein.
Die heilige schrift ja gar sehr rumpft,
Den safft, der von den reben kumpt.
Vnd billich, denn dauon auff erden,
Die menschen frisch vnd frolich werden.
Mich dunckt, das die natur nichts trag,
Welchs gutem weine gleichen mag.
Mein lieber Simon, wie gehts zu,
Das jr doch seid so trawrig nu?
Ir pflegt ja lustiger zu sein.
Wan jr nicht mehr mugt trincken Wein,
So werdet jr nicht leben lange,
Oder macht euch exor frau so bange?
Furcht jr euch so sehr vor jrm zorn?
Ich wolt lieber nicht sein geboren,
Dan das mich meistern solt ein weib,
Habt jr nicht eins mans hertz im leib?
Ich wolt das mein Abigaeln,
Wan sie mich also solte qweln,
Vnd mir verhindern meine frewd,
Der todt hinholt fur eine beut.
Ich zwar jrer gar nicht verschont.

Simon.

Nein zwar, ich bins schon all gewont.
Sie mag mich wie sie wil entpfangen,
So bin ich es so all durchgangen,

Das

Das ich mich da gar nichts anker,
Vnd wen sie noch so zornig wer,
Vnd hat jtz t einen andern sin,
Das ich nicht so gar frolich bin,
Ich fuel mich etwas schwach vnd mat.

Nabal.

Da weis ich zu sehr guten radt,
Das euch bald besser werden sol,
Gnatho, gib her den becher vol.
Gott grusse dich du edler tranck,
Dich lob ich, dir sey ewig danck.
Du bist der menschen lust vnd heil,
Du vertreibst all traxoren vnd feil,
Mit deinem schmack, vnd alle schmertz en,
So bschwerlich sein dem leib vnd hertz en.
Nu Simon, schawt an diesen wein,
Der wird ein gut ertz neye sein.
wolt jr den becher thun bescheidt,
So sol euch vergehn alles leidt.

eleuato
poculo.

Simon.

Thut euch weiter kein vngemach,
Denn jtz und stehn also mein sach,
Das ich den trunck nicht kan vertragen.

Nabal.

Wie? wolt jr mir das ein versagen?

Simon.

Vorwar mein leib vermags jtz t nicht.

Nabal.

G 5 Ich

Ich bin noch guter zuvorsicht.
Ir werdet ewre ehr betrachten,
Vnd mich so schimpflich nicht verachten.

Simon.

Herr, was wolt jr mich doch viel pflagen?
Es wil nichts mehr durch meinen kragen.
Solt ich das jtz außsauffen als,
Es gieng mir zwey mal durch den bals.
Drumb wolt mich doch diß mal verschonen.

Nabal.

Das solt mir warlich sehr verhonen,
So jr mir einen trunck versagt.

Iacob.

Was einer doch den andern pflagt?
Vnd zanckt sich vmb ein becher wein?

Simon.

wol zwey quartir darinne sein.

Nabal.

O nein, es ist vorwar gering.

Abraham.

wie ist doch so ein nerrisch ding,
Das jr von eim menschen begert,
Darin doch ein kw oder pferdt,
Oder ein vnuernunfftigs schwein,
Euch nimmer wurd zu g fallen sein.
Herr wolt jr mir geben bescheid?

Nabal.

Darzu

Darzu bin ich gantz wol bereit.
Sehr gern ich euch bescheid thun sol,
Schmeißt her ein guten becher vol.

Abraham.

Euch treumt von sauffen alle zeit.
Ich bger jtz t ein andern bescheidt.
Sagt mir, habt jr auch ye gesehn,
Das es von ochsen wer geschen,
Oder in ewrer schaffe hauffen,
Das eins dem andern so mit sauffen,
wie jr jtz t thut, het zugesetz t,
Dadurch die g Sundheit wird verletz t,
Vnd der gantz leib schwach vnde kranck.

Nabal.

Das ist vorwar ein feiner schwanck.
Die thier die haben kein vernunfft,
Vnd ghoren nicht in vnser zunfft.
Wir sind menschen, vnd wissen wol,
wie man sich zur sach schicken sol.

Abraham.

Wir sind all menschen von gestalt,
Von Gott gezieret mannichfalt.
Aber gleich wie vnser gesicht,
Entpor gen himmel ist gericht.
Also solten wir vns ergeben
Zu folgen dem himlischen leben.
weil wir aber der vernunfft gaben
Den lusten vnterworffen haben.
Vnd sie dardurch schir gar erstickt,
Es

Es sich mit vns viel anders schickt.
Vnd hat der teuffel durch sein macht
Vns in solch schuld vnd schwachheit bracht.
Das wir dem nicht gehorsam sein,
Was die natur vns zeigt fein.
Schawt an die pferde, schaffe, stier,
Vnd andre vnuernunfftge thier,
Nicht mehr sie trincken oder essen,
Dan in von natur zugemessen.
Sie wurden auch nicht gniessen mehr,
Ob man sie gleich mit schlegen schwer
Darzu wolt notigen vnd zwingen.
Allein der mensch in diesen dingen,
Wil der natur sein ghorsam nicht,
So vbel sich willig anricht.
Das er entweder bald muß sterben,
Oder ja gantz in grund verterben.
Ia ist jm noch dran nicht genung
Das er verterbt sein leben jung.
Vnd renne in des teuffels reich,
Wo er nicht andre auch zugleich,
Mit einem so verfluchten streit
Verterbt, vnd macht des jren qweit.

Nabal.

Das geht vns gantz vnd gar nicht an.
Euch aber ichs hertzlich wol gan,
Zu furen einen orden hart
Nach vnuernunfftger thieren art.
Ir mugt wie die wilden thier leben.
wolt

wolt mir aber doch auch zugeben,
Das ich lebe nach meiner weis,
Macht doch die helle nicht so heis.
Vnd thut meiner was besser sparen,
So jr villeicht nicht wolt erfahren,
Das ich auch nicht gantz alber sey,
Vnd kont euch etwas bringen bey.
Wo nicht mit weisheit, doch mit sterck.
Hor lieber gsel diß eben merck.

Abraham.

Mir nicht, solchs ist nicht mein begeh.
Ich bin darumb nicht kommen her,
Das ich mit jemandt hie wolt ringen.

Balam.

Ey last doch ab von solchen dingen.
Ich weis vorwar nicht alzuwol,
wo fur ich euch doch halten sol.
Mich dunckt das jr nicht seid gantz weis,
Das jr euch z anckt von tranck vnd speis.
wie man der meßig sol genießen,
Vor mich wil ich also beschliessen.
Ein ander faste wie er wil,
Sey nuchtern, sorgfeltig vnd stil.
Kein ding thu ich so hefftig meiden,
Als durst, hunger vnd kummer leiden.
Diß ist mein eingesorg allein,
Das ich ja nicht mug ledig sein.
Drumb leb ich herlich vnde wol,
Full teglich meinen rentzel vol.
werd

Werd da gar nichts von vberladen,
Fuehl auch an leib vnd seel kein schaden,
Bin wol zu paß vnd auch gesundt.
So die doch kaum ein einge stund
Frey sein von kranckheit vnd gefahr,
Die sich huten das gantze jar.
Das sie ja nichts trincken vnd essen,
Es sey in dan vor zugemessen.

Nabal.

Das ist mein man, jr vrteilt fein,
Zwar das ist auch die meinung mein.
Das wir vns gute tage pflegen,
So lang wir vns hie können regen.
Solln wir abstehn von diesen dingen?
So wirds die zeit wol selber bringen.

Gnatho.

Ich halt es auch mit euch gantz frey,
Das es das aller beste sey.
So man auff der welt weidlich zert,
So lang eins leib vnd leben wert.
Worzu ist nutz die meßigkeit?

Nabal.

Wiltu mir dan thun den bescheidt?

Gnatho.

Iuncker, wo vor seht jr mich an?
Meint jr ich sey ein solcher man,
Der euch nicht liebt vnd ehret sehr?
Ich nems an, wans auch wasser wer.
Vnd

Vnd wil es auch recht wol besthen.

Abraham.

So wil ich nu von hinnen gehn,
Das ich euch ja verbinder nicht.

Iacob.

All sachen die sind nu verschlicht,
Wir wollen z ugleich mit euch wancken,
Herr Nabal wir thun vns bedancken
Vor alles gut, gehabt euch wol,
Ein jder es verschulden sol.

Nabal.

Es ist zuuor lange verschult,
Ir must jtz t haben so gedult.
Der trunck der hat mich halb beteubt,
Das mir etwas schweimelt das heubt.

Gnatho.

Iuncker wolt jr euch an mir halten?

Nabal.

Das muste ja das jarrit walten.
Solt ich mich nuchtern auff der gassen,
Als wer ich truncken, furen lassen?
Mir ist noch keins leitens von noten.

Gnatho.

Ich habs euch doch so angeboten.
Ich weis wol das jr nicht seid vol.
Doch muß man ja verhuten wol,
Das euch, eim solchen tewren man,

Dems

Dem gantz e land viel gutes gan,
Vnd wunscht jm gsundheit lange jar,
Nicht jrgend ein leid widerfar,
Vnd wurd daruon das land verwirt.

Nabal.

O das nu David der schaffhirt,
Mich auff diesem platz keme an,
Vnd das allein man gegen man
Solt streiten, so solt man wol sehn,
welcher den andern wurd bestehn.
Er solt fulen in freyem feld,
was er fur sich het vor ein heldt.

Gnatho.

Ey last den schaffhirten bezemen.
Ich wurde mich z war selber schemen
Auff den hirtten zu zihn ein schwerdt.
Vnd ob er es gleich wer wol wert,
Das ein so tapffer man mit rechten,
wie jr seid, mit jm mochte fechten.
So wurd er doch on allen schertz
Nicht haben so ein gtrostes hertz.
Das er sich dorfft gegen euch machen,
Denn er hat gar sehr bose sachen.
Darzu ist er sonst gantz verzagt,
Ein gharnschte magt jn wol veriagt.
Yr wolt euch jtz t was gutes pflegen,
Vnd zu der r w ein wenig legen.
Das jr gegen die vesper zeit
Dest lustiger vnd muntre seit.
Vnd

Vnd han wider ein guten mut.

Nabal.

Ich mag so thun, der radt ist gut,
So gehn wir in das haus hinein.

Gnatho.

Ich wil nicht ferne von euch sein.

Actus tertij scena quarta.

Jonas tympanista, Thobias 1. & 2. pueri Da-
uidis, Boas 2.

Jonas.

Ich het nicht gmeint das solche not
Yrgent het konnen sein an brot,
Als itz und in dem leger ist,
Vor hunger da man wurtz eln frist.
Mir z war es gar nicht schmecket wol,
Das ich solch speys geniessen sol.
Drey tag han wir kein andre speys,
woes noch hinaus wil ich nicht weis.
Zu murmeln hebt an der gmein hauff,
Vnd David kan nichts bringen auff.
Vnd wil vns doch auch nicht erlauben,
Das wir etwas mit streiffen rauben,
Ein gans, ein hun, ein schaff, ein rindt,
Vnd was man sonst bey bawren findt.
Diß ist beim hencken alls verbotten,
Drumb leyden not die armen rotten.
Zwar ich wer nye ein kriegsman worden,
So ich het gwust das dieser orden

H . . . So

So schwer vnd so gar betlrisch wer.

Thobias I.

Trummenschleger ich kom daher,
Das ich dir sag vom David an
Das du solt auff die trummen schlan,
Das sich versamlen die kriegsleut,
Denn, gmeine wird man halten heut.

Jonas.

Nicht wol schlecht sichs bey diesem spiel,
Der krefft hab ich nicht sehr viel,
Sie sind mir schir von hungrr vergangen.

Thobias I.

David wirds nu anders anfangen.
Er wird nicht mehr des feinds verschonen,
Er wird nach seim verdienst jm lonen.
Ich hoff das eine reiche beut,
All kriegsleut solln entpfangen heut.

Jonas.

wie? ist dan etwas news vorhanden?

Thobias I.

So viel als ich jtz hab verstanden,
So wird zu preis werden gegeben
Ein reicher pawr mit leib vnd leben.
Der auff die neh hir wonen sol,
Da wolln wir vns erholen wol,
was wir bissher haben verseumpt,
Da sols alls werden auff gereumpt.

Da

Da solt vns nicht werden so sawr.

Ionas.

wie heist dan der selb reiche bawr,
Ob ich in auch wol solte kennen?

Thobias 1.

Ich hab in etlich mal horn nennen,
wil mir aber jtz nicht einfalln.
Mich dunckt sie nennen in Caballn.

Ionas.

Es wird velleicht solln Nabaln heissen.

Thobias 1.

Recht recht, den solln wir heut zerschmeissen.
All sein gut das ist preis gegeben,
Da soln wir gar nichts lassen leben.

Ionas.

Die Zeitung die ist mechtig gut,
Vnd macht mir einen freyen mut,
Die kreffte sind mir wider kommen.

Thobias 2.

Laß horn wie wil das kalbfel brommen.

Ionas post pulsum.

Also jr kriegsleut in gemein,
Last euch diß all gesaget sein,
Das auff dem lermen platz in hast
Ir euch mit wehr all finden last.

Boas 2.

H. ij Hort

Hort Iuncker ich muß euch doch fragen,
Vnd bitt jr wollet mir doch sagen.
Was dis vmbschlan vnd gschrey bedeut?

Thobias 2.

Das werd jr wol erfahren heut
Ihr stoltzen vnbarmhertzen bawrn,
Ihr solt vns kriegsleut nicht mehr lawrn.
Heut wollen wir euch auff ein mal
Die alte schuld bezalen all.

Boas 2.

wiewol es ist ein hartes recht,
Vnd schweres ding, zu sein ein knecht.
Denn es vns vberschuttet gar
Mit arbeit, trubsal vnd gefahr.
So sind doch die knecht wol daran,
Die da vernunfftge junckern han.
Denn ob diese nach jrer art
Sind gleich gestrenge, karg vnd hart,
So kompt doch etwan eine stund,
Das sie mit gunst werden entzund,
Das sie an vns han kein verdriessen,
Lassen vns vnser trew geniessen.
Aber so einer seiner witz
Beraubet ist durch brunst vnd hitz
Der vppigkeit vnd blinden lust,
Das er nur furt ein leben wust.
Der selbge ist es zwär nicht werd
Das jm dien ein ochs oder pferd.
Mein Herr Nabal ein solcher ist,
Dem

Dem nichts dan witz vnd sinn gebrist.
Er gibt auff sein sach gar nicht acht,
Vnd hat es jtz t so schlim gemacht,
Das wo nicht Gott hir helffen thut,
Sein haus wird schwimmen in dem blut.
Vnd wir werden alle erschlagen.
Das ich nu mag jm solchs ansagen,
Vnd sehn was er wol machen draus,
So geh ich jtz t vom feld zu haus.
Wiewol ich acht das dieser that
Nicht mag erfunden werden radt.
Es wird hie kosten manche seel,
Es wer dan das Abigaël
Mein frau hir was zu radten kont,
welches ich jr dan hertz lich gont.
Aber sie geht eben herfur,
Vnd ist was trawrig wie ich spur.
Villich hat auch hir gutes nicht
Der volle Nabal an gericht.
Ob ich sie schon nu drumb wolt fragen,
So wird sie mir doch gar nichts sagen.
Also pflegt sie jrs mannes schuldt,
Vnd narnwerck tragen mit gedult.
Ich wil vor horen was sie klage,
Ehe ich jr diese Zeitung sage.

Actus tertij scena quinta.

Abigaël Boas z.

Abigaël.

Ach Gott wie ist der frauen leben
H ij Mit

Mit so viel sorg vnd muh vmb geben.
wie hat doch die liebe natur
Vns gmacht so ein arm creatur.
Sie hat vns zu vnruh gebezt,
Vnd das schwerste ampt aufferlegt
Das menschliche gschlecht zu geben,
Vnd es auch schir allein zurnehr.
Dieweil es noch ist schwach vnd jung.
Idoch als wers noch nicht genung
Zu haben ein so schweres leben,
So muß sie vns noch menner geben.
welchen wir müssen ghorfam sein,
Vnd leben nach jrm willn allein.
Ob der gleich nicht ist alzeit gut,
Ia, der in selbst oft schaden thut.
Aber ich diß nicht also klage,
Auch gar nicht auff die meinung sage
wie der gemeine hauff der frawen,
Die auff jrn mut willn allein schawen
Vnd haben keinen man vor gut,
Der in nicht nach jrm willen thut.
Vnd schelten drumb auff in allein,
Das er sie nicht lest Sieman sein.
Diß ist mein meinung gentzlich nicht,
Mein sin ist nicht darhin gericht,
Das ich wolt meinen man regieren,
welchs dan ein frawen nicht thut zieren.
Sondern diß ist die klage mein,
Vnd kond mir nichts beschwerers sein.
Dan das ich einen solchen man

Zu

Zu meim vn gluck bekommen han.
Der nicht acht gibt auff seine sach,
Der gar nirgent nicht fraget nach,
Er kan nicht versorgen sein haus,
Dar vns dan kompt viel schadens aus.
Vnd ob er gleich des keins nicht kan,
Drumb ich jm billch wer vnterthan.
(Denn ein frau jrn man billich ehrt
Der sie beschutzt, bekleid, erneht.)
So wil er doch das ich all sachen
Nach seinem tauben kopff sol machen,
Seuft sich darneben teglich vol,
Vnd pflegt allein des bauches wol.
Ach so ich seine laster all
Erzelen wolte auff ein mal,
So musste ich mit grosser klag
Darzu haben ein gantzen tag.
Noch mehrt mir dis sehr meinen schmerzen,
Das ich den kummer meines hertzen
Niemand darff klagen noch vertrauen,
Denn es mich etwan mocht gerawen,
Ich gleube, so ichs nach wolt sagen,
Vnd es vnter die leute tragen,
Das ich daran thet sund vnd schand,
Vnd widder den ehlichen standt.
Denn ein ehfrau nicht darauff tracht
Die Gott vnd jr ehr etwas acht,
Irs hausberrn laster odder schand
Zusprenge durch ein gantzes land.
Solt ich dan vor dem haussg'sind klagen,

H iij Das

Das wurd mir auch gar nichts zu tragen.
Denn so dasselb wurd wissen han
Das jr Herr wer ein solcher man,
So fragten sie nach jm gar nicht,
Vnd wurd nichts trewlich außgericht.
Denn ich das wol abnemen kan,
wo jrgent vnter fraw vnd man
Zwitracht vnd neidt entsteht im haus,
Da kan nichts gutes werden aus.
Denn so das gsinde solchs vermerckt,
So wirts in mutwilln bald gesterckt,
Das es sein herrn weng ebr erz eiget,
Vnd jm gar nicht ein wort verschweiget.
So weis ich nu in diesen sachen
Gantz vnd gar nicht anderst zu machen,
Dan das ich so vort mit gedult
Vertrag alls was mein man verschuldt,
Vnd in mich freß, was sonst vor schaden
Er durch sein art thut auff vns laden.
Das nicht auch durch mein vnuerstandt
Vns noch mehr schad werd zugewandt,
Vnd so erfrewet vnser feindt.

Boas 2.

Hilff lieber Gott, wer het gemeint,
Das so viel weißheit vnd verstandt
Bey allen frawn im gantz en land
Solt funden werden in gemein,
Als bey dieser frawn allein?
Die hette solln werden ein man,

So

So wurd vmb die sach besser stahn.
Sie wurd mit jrm heilsamen radt
Regieret han ein gantz e stadt,
Vnd alles sehr wol außgericht.

Abigaël.

Sih, des bin ich gewonet nicht,
Das du so zeitig kombst zu haus,
Ist nichts im feld zurichten auß?
Was sibstu mich so trawrig an?
Hat der wolff jr gent schaden gthan,
Vnd vns gebracht in vngemach?

Boas 2.

O frau, es ist ein ander sach,
Vnd hat gar viel ein andern sin,
Darumb ich jtzt und trawrig bin,
Vnd so vnzeitig kom zu haus.
Ich furcht es sey gar mit vns aus.
Ist je ein radt auff s aller best
In einer eyl von noten gwest,
So halt ich das ers jtzt und sey,
So gar sind wir gebracht dabey.
Das wo nicht Gott vns wunderbar
Erret vnd helff auß dieser gfar,
So werden wir ein bose stund
Bald haben, vnd gehn all zu grund.

Abigaël.

wer hat ein solch spiel angericht?

Boas 2.

H 5 Der

Der Iuncker, ich weis anders nicht.

Abigaël.

Ach Hergott, wie doch das sein mag,
So er doch ist den gantzen tag
Aus diesem hause kommen nicht?

Boas 2.

Ich bin also gewiß bericht,
Vnd ist auch nu gantz offenbar,
Das wir jtz t in so grosser gfar
Vmbs Iunckern schuld vnd willen stehn,
Als hiebeuor ist nie geschehn.

Abigaël.

Sag was es ist, mach nicht viel wort.

Boas 2.

Ir wists villeicht vnd habts gehort.
Das gestern boten sein gewest
Beim Iunckern, als er hatte gest.
Vnd das die David het gesandt,
Von jm zu bitten profiant?

Abigaël.

Dauon da weis ich gar kein wort,
Vnd hab gar nichts von jn gehort.

Boas 2.

Ich hab sie geschn einher tretten,
Vnd auch gehort vom Iunckern beten,
Das er jn wolt mit wenig brodt
Zu hulff kommen in jrer not.

Aber

Aber er jnen gar nichts gab,
Ia, weist sie auch gar spottisch ab.
Vnd schalt sie gewlich an jr ehr,
Daruber ich erschrack gar sehr.
Drumb das ich wuste wer sie warn,
Vnd das vns nie ist widerfarn
Von jnen das geringste leid.
Vnd sage das auff meinen eid,
Das sie vmb euch, vnd all ewr knaben
Sich viel besser verdienet haben.
Denn all die zeit sie da gelegen,
Haben wir fried zu weg vnd stegen
Gehabt, vnd zimlich wol genesen,
Denn sie sind vnser schutz gewesen.
Vnd vnser mawr beid tag vnd nacht,
Vnd haben stets vor vns gewacht.
Ein solcher spot verschmad nu sehr
Dem David, vnd sein gantzen heer.
Wie David aber sey gerust,
Das in dem gantzen land bewust.
Wie er so gantzen sey vnuerzagt,
Vnd nie vom feind durch gwalt veriagt.
Ein starcker held von hand vnd hertz,
Dem wird es sein vorwar kein schertz.
Hirzu kompt noch der hunger schwer,
Den kein kriegsman wil leiden mehr,
Vnd ist die sach nu greicht so weit,
Das sie sich han zugleich bereit.
Vnd all gerust mit jren waffen,
Ein solch vnbilligkeit zu straffen.
So

So werden sie nu mit gewalt
Vber vnser haus kommen bald,
Nicht das sie bitten speis vnd tranck,
Sondern das sie es breid vnd lang
Mit rauben, brand vnd mord verheren,
Vnd vnser blut vnd gut verzeren.

Abigaël.

Sich lieber knecht das du nicht leugst,
Vnd mit der zeitung mich betreugst.
Denn ob ich gleich nicht zweiffel dran,
Das vnser Herr hab solchs gethan.
So halt ich doch hirwidder bey.
Das David ja viel kluger sey.
Vnd ja so gar vnbillich nicht,
Das was ein einger außgericht,
Er darumb wolt mit hast gemut
Vergieffen viel vnschuldigs blut.

Boas 2.

Ich habs von Davids knaben dort
Nicht allein mit mein obrn gehort.
Sondern ich hab auch selbs gesehn,
was dar im leger ist geschen.
wie da ein lerm vnd rustung ist,
Drumb mugt jr bald zu dieser frist
Gedencken auff ein guten radt,
wo jr nicht wolt ein trawrigs badt
Von blut heut in ewrm hause han.

Abigaël.

Ich

Ich wil sehn obs geschehen kan.
Ob mein radt was kon richten auß.
Geh du zu knechten in das haus,
Vnd zeig in an das sie, doch leise,
Gerust sich machen auff die reise,
Ich wil bald bey euch drinne sein.

Boas 2.

Es sol bestellet werden fein,

Actus tertij scena sexta.

Abigaël sola.

Ich gleub, das auff der gantz en erden
Kein weib jtz t mug erfunden werden,
Die so gepflaget sey als ich,
Kan ich doch kaum besinnen mich.
Ich mochte schier vor leid verzagen,
Was sol ich doch erstlich beklagen?
Was hilffts das ich mein hab vnd gut,
Was hilffts das ich mit schweren mut
Beklage meine kinder kleine?
Was hilffts das ich drumbeul vnd weine?
Die gfar geht vns zugleich all an,
Alt vnd auch jung, frau vnd auch man,
Das gantze gut, das gantze haus.
Ach Gott ich weis jtz t nirgent aus.
Ich seh es ist nu gar verlorn.
Ach Gott, bin ich darumb geboren,
Ach Gott hat es dir so behagt,
Das ich mit elend wol gepflagt,
Von

Von jugent biß zu dieser zeit,
Das ich mit solchem hertzen leidt,
Vnd solchem schrecken noch solt sehn,
wie es so gewlich wurde gehn.
Das mein hauß solt in grund verderben,
Vnd wir all so jemmerlich sterben?
Bey wem such ich nu trost vnd radt?
Mein man sich vol gesoffen hat.
Ligt da vnd schlefft on muh vnd sorgen,
Fragt nicht darnach wies geh auff morgen.
Vnd wan ich in schon jtz auffweckt,
So wurd er sein allein erschreckt.
Denn er sonst wedder hulff noch radt
In seinem gantzen leibe hat.
was sol ich dan sonst itzt beginnen?
Sol ich allein fliehen von hinnen?
Sol ich allein redten mein leben,
Vnd meinen man gar vbergeben?
Das er verstickt in dem badt,
welchs er sich selbs bereitet hat?
Ich wils nicht thun, denn ob er wol
Solchs wirdig wer, Ein fraw doch sol
Yrm man, er sey auch wie er sey,
In aller noth fest stehen bey.
Ich wil viel lieber jtz versuchen,
Ob nicht der kriegsleut grim vnd fluchen
Versont mocht werden vnd gestilt,
So ich willig, reichlich vnd mildt
In zerung brechte vnd geschenck?
Denn ich also bey mir gedenck,
Das

Das David nicht sey mehr ergrimpt.
Denn es eim solchen man gezimpt,
Das er nicht so vn menschlich sey,
Das mit flehn vnd geschenck darbey,
Darzu mit vernunfft gen geberden,
Sein fursatz nicht gelenckt kont werden.
So wil ich nu, brodt, fleisch vnd wein,
Vnd was sonst mag von noten sein,
Bereiten zu, vnd jm selbs bringen,
Ich hoff die sach sol mir gelingen.
Das er mein gschenck, vnd auch mein flehn
Mit gned gen augen thu ansehn.
Vnd leg hin seinen zorn vnd grim.
O gutger Gott erhor mein stim.
Vnd steh mir itzt mit gnaden bey,
Das es dem feind wilkommen sey
Vnd an genem, alls was ich nu
Im zum geschenck wil richten zu.

Argumentum Actus quarti.

Itzt wil David mit seinem hauffen
Dem Nabal hauss vnd hoff anlauffen.
Vnd aussfuren mit ernst die sachen.
Befielt die ordnung bald zu machen.
In solcher hitz kompt dar gegangen
Abigaël, vnd wird entpfangen
Nach kriegs gebrauch mit frag geschwind,
Aber doch endlich gnade find
Durch freundlich bitt vnd schone gaben.
Welche ein solche tugent haben,
Das

Das sie die leut halten vom kempffen,
Vnd einen blutgen krieg bald dempffen.
David sich recht bedencken thut,
Vnd werden so all sachen gut.
Die Frau sich nach haus wider kert,
Der Nabal wird gar sehr erfert,
Da sie jm von der Zeitung sagt,
Vnd vber in mit wehmut klagt.
Wie er David so sehr verletzt,
Vnd sie in solche not gesetzt.
Darnach wird Nabal kranck behend,
Vnd kriegt gar ein erschrecklich end.
Wies aber mit der Frauen far,
Das macht der funfft Act offenbar.

Actus quarti scena prima.

David, Ioab, Abisau, Obed, Aber.

David.

Ich bin vorwar ein armer helt,
Vnd halte das die gantze welt
In haß, in neid, vnd in gefar,
Widder mich sey verbittert gar.
Das ichs so weit nicht bringen kan?
Wo ichs thu jimmer greiffen an
Mit wolthat viel vnd freundlichkeit,
Mit bitten vnd bescheidenheit.
Das sie von mir, wie sie wol solten,
Doch etwas besser halten wolten.
Vnd ein gut hertz gegen mich fassen,
Sich zu freundschaft mit glimpff einlassen.
Vnd

Vnd das ich andre jtz t laß faren,
So kan ich Nabals ja nicht sparen.
was ich dem hab vor dienst erzeigt,
An all seim gut sich wol ereigt.
Das dasselb ja wer wol verwart
Hab ich kein fleis noch muh gespart.
Seht was danck hab ich nu daruon?
Seht was gibt er mir nu zu lohn?
Er solt sich wider halten wol,
So schilt er mir die haut gar vol.
Ia schend mich noch, vnd dreyt mir sehr,
Gleich als sein hochster feind ich wer.
Ioab, was thustu darzu sagen,
Sol ich solchs lenger noch vertragen?
wlan, eh ichs leid, sag ich gar eben,
Setz ich daran mein leib vnd leben.

Ioab.

Ir daran gar nicht zu weiffeln solt,
So jr also fort faren wolt,
Vnd brauchen ewer recht vnd schwerdt,
Das vns in kurtz geholffen werd.
Denn ichs nicht leichtlich sagen kan,
wies vns so grossen schaden gthan,
Das jr des feinds verschont zu viel.
Denn das ist der tyrannen Ziel,
Vnd sterckt sie in jrm wuten mehr,
Das sie halten man furcht sie sehr,
wan man in weicht mit wort vnd wercken.
So bald sie aber thun vermercken,

I Das

Das man sich vor jrm schnarchen schwer
Nicht furchtet vnd erschreck et mehr.
Bald sie jr boß gewissen dringt,
Das in die schuch das hertz in sinckt.
Vnd werden basen mit jrm dreyen,
Die vorhin brompten wie die lewen.

Dauid.

So wil ich sehn was ich vermag,
Vnd zu eim spiegel diesen tag
Nabaln den andern machen schlecht,
Auff das sie all erkennen recht,
Das es sey gferlich vnd nicht gut,
Das einer seinen stoltzen mut
Wol kulen an eim andern man,
Der jm nichts hat zu leid gethan.
Vnd schwere beim Ichoua mein,
Vnd sag das er mein feind sol sein.
wo ich den Nabal nicht ermordt,
Vnd alles was jm zugehort,
Ehe dan morgen der tag anbricht,
Da wil ich niemands schonen nicht,
Drumb denckt vnd thut bald zu den sachen.

Abisau.

wie solln wir dan die ordnung machen :

Dauid.

Du solt den lincken flugel furen :
Dir Ioab wil der recht geburen :
Die mittel spitze halt ich vor mich,
Das

Das nach mir richt ein yder sich,
Vnd halte sein gelied gar eben,
Biß das ich thu ein Zeichen geben.

Aber.

Ach solcher sorg vnd ordnung fein
Duncket mich gar nicht notig sein.
Ich weis das keinr von Nabals knechten
Sich vntersteht mit vns zu fechten,
Dar wird vns niemand widderstahn,
Last vns das haus nur lauffen an.
Vnd es in eyle vberfallen,
Denn das gesind mochts sonst bewallen,
Oder vns ja der Herr entrinnen,
So er der rustung wurde innen,
Vnd wer so alls vmb sonst bestellt.

David.

Der anschlag mir gar nicht gefelt.
Es ist ein vnbedachter radt.
Der nie nutz einem handel that.
Mein meinung gar viel anders ist,
Das fleis vnd sorg zu aller frist
Sey notig mit vorsichtigkeit.
Vnd sonderlich in krieges zeit.
Denn hie oft durch nachleßigkeit,
Vnd durch sorglose sicherheit,
Felt einem der sieg aus der hand
Mit spot, mit schaden vnd mit schand.
So ist der auch nicht klug noch gut,
Der seinen feind verachten thut.

I ij Die

Die not die ist gar schwer vnd arg,
Vnd macht oft einen schwachen starck.
Sie zeucht oft ein verzagten man
Ein harnisch vnd ein pantzer an.
Das er sich zur wehr stellen thar,
Vnd bringen den in not vnd gfar,
Der sonst mit gwalt, vorteil vnd list
Im gar weit vberlegen ist.
Drumb lasts vns weißlich greiffen an,
Vnd schaw das du mit deinem Compan
Der schutzen habest eben acht,
Das sie auff jren ort gebracht
An die flugel von beider seit,
Denn sie solln anheben den streidt.
So bald der feind vns kompt ins gsicht,
Solt jrn in eyl anlauffen nicht.
Auch nicht eh das geschutz loß brennen,
Biß jr jm kond die augen kennen.
Vereilt euch nicht, fart mit gemach,
So wird gut werden vnser sach.

Obed.

Ich wil mit Gottes hulffe sehn,
Das ich mein ampt mug wol bestehn.
wils kegen den feind getrost wagen,
Das jr nicht solt haben zu klagen,
Heut solt jr sehn on allen schertz,
Das ich hab feuste vnd ein hertz.

David.

Gott steh vnserm furnemen bey,
Ein

Ein jeder nur vorsichtig sey.
Vnd lasse seine manheit sehn.
Wir wollen nu ins Leger gehn,
Vnd die schlachtordnung richten an,
Das wir damit mügen bestan.

Actus quarti scena secunda.

Abigaël, Daniel & Boas 2. serui, David,
Ioab, Abisau, Aber.

Abigaël.

Wolan, so wolln wir auff die ban,
Geht jr gemachlich so vor an,
Auff das ich euch kon folgen nach,
Vnd habt gut acht auff ewer sach.

Daniel.

Gebt euch zu fried in diesen sachen,
Ich wils zwar auff das beste machen,
Wil hie nicht sparen muh noch fleis.

Boas 2.

Ich wil auch auff die beste weis
So ich gelernt, es machen wol,
Das mich hie niemand tadeln sol,
Vnd hoffe das auch gnad hirneben
Zu vnserm fursatz Gott werd geben.

Abigaël.

Auff Gott zwar all mein hoffnung steht,
Denn on jn glucklich nichts fort geht.

I ij Er

Er hat allein in seiner hand
Der menschen hertzen vnd verstand.
Die kan er anders sins bald machen,
Vnd helffen aus des morders rachen.
Auch die so sich fest an jn fassen,
Plegt er in keiner not verlassen.
Aber seht was doch dort so scheint?
Es hat sich schon geharnscht der feindt.
Es ist mir armen weib kein schertz,
Vor angst zittert mein trawrigs hertz,
wie sol ich es doch greiffen an?
Vor schrecken ich kaum reden kan.
Mich macht besturtzt des feindes grim,
Die furcht benimpt mir mut vnd stim.
O Nabal ich werd itzt gewar,
wie du vns bringst in gros gefar.

David.

Es mangelt nu ja nirgent nicht?
Die ordnung ist wol angericht,
wir wolln sie außfurn auff das best.
Seht was kommen vns dort vor gest?
Sind sie gewappent odder nicht?

Ioab.

Es triege mich dan mein gesicht,
So sind sie mit korben beladen.

Abisau.

Sie gehn fein langsam einher waden.
Es sind Nabals knecht wie ich acht.

Der

Der hat sich velleicht baß bedacht.
Vnd rewt in seiner bosen that,
Die er an vns begangen hat.
Es kompt zugleich mit in ein weib,
Mich dunckt sie hab ein schonen leib.

Aber.

Sie kommen stracks zu vns heran,
wolaufflast vns sie greiffen an,
Victori sol vns dar nicht feilen.

David.

Halt in, thu dich nicht vbereylen.
Ich wil nicht das der wehrlos hauff
Zum ersten werd gerieben auff.
wir wolln erst holn den rechten man,
Der diß vn gluck hat gestiftet an.
So gleub ich auch, das on gefehr
Sie hir zu vns nicht kommen her.
Die frau die scheint gantz erbar sein,
Von schoner gestalt vnd kleidung fein.
Sie solln vns wol was grosses bringen,
Das es gut wurd mit allen dingen.
Last vns hir stehn, vnd horen an,
was sie vns breng, was sie wol han.

Abigaël.

Das wird der David selber sein,
Der von sich gibt so klaren schein.
Hilff Gott, sie sehn gantz schrecklich auß,
wie machen sie sich so gar kraus.

I iij Sie

Sie dencken jtz allein auff mordt,
Ich muß in Gottes namen fort,
Vmb's besten willen muß ichs wagen.

David.

Wer seit jr? was thut jr hie jagen?
Wer hat ein weib so kun gemacht,
Das sie nicht harnsch vnd waffen acht?
Vnd darfeim gantz en heer begegnen,
Da es thut pfeil vnd kugeln regnen?

Abigaël.

Mein Herr, es ist ein grosse sach
Die gzwungen hat mich weiblin schwach.
Das ich kun zu euch in der eyl,
Das ich errette beide teil,
Beid euch vnd mich von schad vnd schand,
Vnd bit euch durch ewr werde hand,
Durch alles was euch wol behagt,
Das jr hort gnedig ewre magt.
Mein Herr, es ist leider geschen,
Das sich mein man schlim hat versehn,
Vnd widder euch gesündigt schwer,
Das er darumb wol wirdig wer,
Das er gestrafft wurd mit dem schwerd,
Ich bken es selbs, er wers wol werd.
Aber das ist er wirdig nicht,
Das er von euch werd hingericht.
Ir seid zu viel ein hoher man,
Dan das jr euch solt nemen an
Eins vollen bawren nerrisch wort.
Ich

Ich hab mein tag ja nicht gehort,
Das ein adler ein fliegen fange,
So ist auch keinem lewen bange
Vor eines kleinen flobes stich,
Er daran gar nicht keret sich.
Warumb solt dan ein toller bregen
Euch, Herr, zu zorn vnd rach bewegen?
Denn (ich muß euch thun recht bericht)
Nabal mein man ist anders nicht,
Dan wie sein name mit thut bringen,
Ein rechter thor in allen dingen.
Er weis nicht hulff, er weis nich radt,
Wan er allein zu schwelgen hat
So ist jm wol, das ist sein leben,
Sonst thut er nirgends nicht auff geben.
Wo aber mich vor meinen man
Ewer botten hetten glanget an,
So solt ein solche schmach vnd pein
Euch nimmer widerfaren sein.
Aber Gott hat es wol versehn,
Das noch kein todschlag ist geschen.
Vnd hat mich euch entgegen g sand.
Ehe dan mit blut ist ewer hand,
Vnd ewer schwerdt besprenget worden,
Ehe dan es gangen an ein morden.
So wolt jr mir nu rechen an,
Alls was an euch mein man gethan.
Doch mirs nicht lan zum tod gedeyen,
Sondern es mir in gnad verzeihen?
Vnd entpfangen diß klein geschenck,
I 5 Damit

Damit ich ewre knecht bedenck,
Auff das sie jren hunger stillen,
Vnd jr erkent mein guten willen.
Wo jr dis thut, so wird Gott geben,
Das all die euch zu wider streben
werden mein man dem Nabal gleich,
Vnd jr an leib, ehr, seele reich
werdet ewr nachkomlinge sehn
In gluck, in ehr, in freuden stehn.
Wird auch ewr elend vnd vn gluck
Auffhorn, vnd gehn wider zu ruck.
welchs ich dan hoff, vnd wunschs zu sehn
Das es in kurtz muge geschen.
Denn Gott hat seinem volck bestelt
Zum konig einen rechten held.
Dieweil jr dan vor das volck sein
Krieg furt nicht mit ein falschen schein.
So wird euch auch der Herr bewaren,
Das jr nicht werdet vbel faren.
Vnd ob gleich ein sehr grosser hauff
Sich widder euch durfft lehnen auff,
Zu suchen ewrn todt vnd verterben,
So wird doch ewre seel nicht sterben.
Der feind wird gar nichts richten auß,
Ob er sich schon macht hefftig kraus.
Ob er schon pochen thut vnd drewen,
So wird jn doch der Herr zerstreuen.
Vnd jn von sich verwerffen gar,
Euch aber helffen auß gefar.
Vnd ewers leids widder ergetzen,
Vnd

Vnd in frewd vnd in reichthumb setzen.
Auff das jr krieget guten lohn,
Vor ewre trew der ehren kron.
So wird dis auch im hertzen rein
Euch nicht die geringste frewde sein.
Das jr mit vnschuldigem blut
Nicht habt gekult ewra zornen mut.
Es wird auch ewr gewissen nicht
Euch dan gleich wie ein halsgericht
Erschrecken, vnd vmb diese sachen
Ein vnruwiges leben machen.
Diß allzugleich, wie jr dan solt,
Ir gantz fleysig betrachten wolt.
Erhorn gnedig mein kleglich stim,
Vnd halten in mit ewerm grim.
Vnd so es etwan darzu keme,
Das mein Herr hieuon frewde neme.
Das er sich het hie lassen lencken,
So wolt er meiner auch gedencken.

David.

Ich es zusagen nicht vermag,
Wie gluckselig sey dieser tag.
Der euch mir hat entgegen bracht,
In frewden ich allein betracht.
Wie so gar glucklich sey die stund,
Darin sich offnet ewer mund.
Was sol ich doch fur jderman
Zu loben erstlich fahen an?
Loblichers ist nichts auff der erden
Dan

Dan ewre sitten vnd geberden.
Ich hab freundlicher nicht gehört
Dan ewre glatt vnd kluge wort.
Ewr zung die thut vor allen dingen
Gantz lieblich vnd gantz susse klingen,
wie ist sie so ein schone gabe,
Derselben ich zu dancken habe,
Das ich nicht schuldig worden bin
Nach meinem vorgesetzten sin,
An vnschuldigem fleisch vnd blut,
Nicht angetastet frembdes gut.
Oder sol ich den loben mehr
Der euch gezieret hat so sebr.
Das man ewr nirgent findet gleich
An ebrn, verstand vnd tugent reich?
Denn ich sag euch bey meinem eid,
wo nicht durch ewr gescheidenheit
Dem vngluck wer gekommen fur
Das euch hart war vor ewer thur.
So het es sich mit sturm erhebt,
Vnd jr zum letzten heut gelebt.
Aber es sol kein not nu han,
Wir nemen ewr verehrung an.
Kert jr in fried widder zu haus
Vnd richtet ewre sachen auß.
Zeigt es ewrm man dem Nabal an,
Den ich nicht wirdig nennen kan.
Das er habe zu seinem leib,
Ein so from vnd vernunfftigs weib.
Mein

Abigaël.

Mein Herr, jr thut wies euch gebuert,
Darbey man ewre tugent spürt.
Vnd ich erken, beken auch frey,
Das ich euch viel mehr schuldig sey,
Dan ich euch jimmer dancken kan.
Kem doch etwan die zeit heran,
Das Gott gebe gelegenheit,
Das ich euch meine danckbarkeit
Vnd guten willn erz eigen kund,
Ich wolt es thun mit hand vnd mund.
Vnd keinen fleis, kein arbeit sparen,
Ytz thu euch Gott gnedig bewaren.
Lange zeit ewr gesundheit frist,
Vnd geb euch was euch selig ist.
wol auff jr knecht, vnd eilt nach haus,
wir sind was lang gewesen auß.
Ich furcht das im abwesen mein
Nicht all ding wol versorget sein.

David.

Nu mit der speis ins Leger eilt,
Das sie dem volck werd außgeteilt.

Aber.

Vorwar wir han ein guten koch.

Abisau.

Ich seh der krieg der hat ein loch.

Ioab.

Seht wie es vmb der weiber list
Ein

Ein ding so starck vnd mechtig ist?
Er zwingt die herrn nach seinem willen,
Vnd kan gar bald ein lermen stillen.
wiewol ich dieser frawen fleis
Auffs hochste lob, vnd herlich preis.
Denn den hungrigen geben speis
Das treibt mir nicht aus solchen schweis,
Als wen ich sie furt zu dem streit.

Abisau.

Es ist vorwar ein gut bescheidt.
Last vns des Nabals nu vergessen,
weil er vns gschickt hat gnug zu essen.
Ob solchs schon on sein willn geschen.
wolan last vns ins Leger gehn.

Actus quarti scena tertia.

Nabal, Abigaël.

Nabal.

Wu, wu, wu, wu, ich fuel nu wol,
Das ich bin gwesen gestern vol.
Vnd hab zu starcken trunck gethan,
Pfuy, es geht mich ein eckel an.
Die hend zittern, der kopff ist schwer,
Das hertz das brennd mir grausam sehr.
Gantz durr ist mir der hals vnd mund.
Ich bin entweder nicht gesundt,
Oder hab wie mir oft geschicht,
Den wein noch gar verdewet nicht.
Ey wie ist der ein selger man

Der

Der einen starcken trunck thun kan,
Vnd doch denselben wol vertragen,
Das er nicht vbern kopff darff klagen.
Dem nicht sein leib weh darvon thut,
Vnd bhelt alzeit ein frischen mut.
So diß allein mir Gott het geben,
Wolt ich furn ein viel besser leben,
Dan sonst ein mensch furt auff der erd,
Vor mich, wer es viel geldes werdt.
Vnd das ich kranck werd nach dem wein,
Das bringt mein hertzen grosse pein.
Sonst het ich nirgends von zu klagen,
Ich wolt dan von mein weibe sagen.
Denn es mir auch mein hertzen sehr frist,
Das mir ein solche bscheret ist,
Die mit mir nicht trifft vberlein,
Der nicht gefelt die weise mein.
Die mich gar sehr mit schelten pflagt,
So ichs ein moelchen hab gewagt.
Vnd die becher zu oft erhaben,
Mein helligs hertzen daraus zu laben.
Noch wolt ich mich nicht viel dran keren,
wan es sich nicht zu sehr thet mehren.
Denn so sie erst feht an zu schelten,
Den gantzen tag muß es dan gelten.
Ich zweyffel nicht das ich zur buß
Auch heut jr predig horen muß.
Vnd schaw, sie steht gleich vor dem hauß,
Wie saur, wie mausig sieht sie auß?
Sie wird zu schelten bald beginnen.
Es

Abigaël.

Es sagten ja die knecht darinnen,
Das hir mein man wer außgegangen.

Nabal.

Hort wie schon wird sie mich entpfangen?

Abigaël.

Mein lieber Iuncker seid jr dar?
Ich wunsch euch ein gluck seligs jar.
Gott geb das euch ja dieser tag
Mit besserm gluck erscheinen mag,
Dan es am gestern ist geschen,
Da jr durch ewer groß versehn
Schir euch vnd ewr gesinde all,
Hettet gebracht zum schweren fall,
Das wir all kommen wern vmb's leben.

Nabal.

Sagt ichs nicht, sie wurd mir recht geben?
Was sagstu mir von eim versehn?
Was ist durch mich boses geschehn?
Ich hab ja den gestrigen tag,
Wie niemand anders sagen mag,
Mit guten freunden hin gebracht.
Da ist ja kein vnlust gemacht,
Ist auch ja niemand todt geblieben.

Abigaël.

Ich weis, wie jrs zu haus getrieben.
Aber sagt, habt jr nicht vernommen,
Das botten wern vom David kommen?
Vnd

Vnd hetten profiant begert?

Nabal.

Solt ich drum b satteln bald ein pferdt?

Abigaël.

Was ist jn dan vor antwort worden?

Nabal.

Als wirdig ist derselbig orden.
Sie wolten mir da viele sagen,
Habs jn aber gantz abgeschlagen.

Abigaël.

Vnd weistet jr sie ledig weg?

Nabal.

Ia, solt ich sein ein solcher geck,
Das ich mein wolgewonnen gut
weg geben solt, wie mancher thut.
Vnd sonderlich solchen gesellen,
Die ein nach leib vnd leben stellen,
Vnd durchstreichen das gantze landt.

Abigaël.

Das ist vorwar ein gut verstandt,
wolt Gott das jr so allezeit
Vor vns zu sorgen wert bereit.

Nabal.

Hab sie auch nach jrer gestalt
Mit rechter farb wol abgemalt,
Vnd auff hofisch recht abgericht.

K Auch

Abigaël.

Auch gut, wie? furcht jr euch dan nicht,
Das sie drein schlugen mit der hand?

Nabal.

Wer ich? das wer ja jimmer schand,
Gleich als ein betler odder vier,
Die vor hunger gestorben schier,
Dorfften widder ein solchen man,
Wie ich bin, sich was vnter stan.

Abigaël.

Was sagten sie dan zu der sach?

Nabal.

Ich horte da nicht viele nach.
Ich merckt wol das sies sehr verdroes,
Vnd gab jn einen harten stoos.
Sie drawten wol nach jrem sin,
Gingen doch endlich all dahin,
Vnd hort einer dem andern beicht.

Abigaël.

So David aber jtz villeicht
Ankem gewappent der gestalt,
Das er euch abdrengt mit gewalt.
Das jr mit willn nicht habt woln geben,
Wormit wolt jr jm wider streben?
Habt jr so viel gewalt auch nun,
Das jr jm wider stand kont thun?
Hir auff bedencket euch gar eben.

Ach

Nabal.

Ach, das er solt ein solchs anheben,
Wer wolt jn han gemacht so kun?

Abigaël.

Das weis ich nicht, sag aber nun,
So ers velleicht sich vnterstund,
Was jr darzu thun wolt vnd kund?

Nabal.

Es kem wol radt, kem es so weit.

Abigaël.

Aber itz und ist radtens zeit.
Das jr darnach nicht allzu spet
Euch zu bedencken vntersteht.
Denn hunger macht, das oft geschicht
Von manchem, das sonst gschehe nicht.
Darzu so ist der kriegsleut brauch,
Das sie halten mit ledgem bauch
Mugen sie thun alles mit recht.

Nabal.

Halt hin, halt her, das ist schon schlecht,
Das sie nicht werden kommen an.

Abigaël.

Beseht es doch mein lieber man,
Wie jr alles mit freueln mut
So vnbesunnen redt vnd thut?
Aber ich sag euch offenbar,
Das David schon vorhanden war.

K ij Vnd

Vnd wolte mit aller gewalt
Nicht widerkommen der gestalt,
Das er von euch wolt zerung bitten,
Sondern das er nach feindes sitten,
Euch, all die ewrn, ewr hoff vnd haus
Mit dem schwerd gar wolt rotten auß.
Vnd da ist gar kein zweiffel an,
Das ers jtz t albereit gethan.
Vnd wir wern durch sein zorn vnd macht
All jemerlichen umbgebracht.
Wo Gott vns het geholffen nicht,
Derselb der hat mich vnterricht,
Vnd vermanet durch seinen geist,
Was mir zu thun wer allermeist.
Der hat auch Davids hertz behend
Genommen ein vnd umbgewend.
Das er sein furnemen vnd radt
Nicht hat volnzogen mit der that.
Also hat es mit vns gestanden,
Ein solche gfabr ist gwest vorhanden.

Nabal.

Wie kem ich zu solchem vnglimpf?
Sag recht, ist es ernst odder schimpff?

Abigaël.

Ach solt ich in so schweren sachen
Noch schimpffen, vnd viel schertzens machen?
Vorwar von einem solchen schertz
Mir noch im leib zittert mein hertz.
Ich noch erschrick so ich betracht

DAS

Das schrecklich ansehen vnd die macht
Der kriegsleut vnd der waffen blanck,
Der trommen vnd posauen klanck.
Darzu mir noch vorn augen steht,
Vnd in den sinnen stets vmb geht.
Wie es mit vns het sollen faren,
Wo vns Gott nicht het wolln bewaren.
Es geht mir in den gdancken vmb,
wie da ein hauffen kriegsleut kumb.
Vnd bring vns in die eusserst noth,
Erstech das g sind vnd vieh zu todt.
Vnd find euch da schlaffend vnd vol,
Vnd schlag euch erst die haut gar wol.
Vnd werff euch nider auff die erd,
Vnd stech euch durch ewr hertz ein schwerdt.
Erschlag die kinder vnd auch mich,
Verberg es alles jemmerlich.
Vnd das ers ja gar mache auß,
Steck er ins feur das gantze hauß.

Nabal.

Ach jammer, ein grausamer feindt,
Das het ich nimmermer gemeint.

Abigaël.

Ia, was ist anders meine klag,
Die ich schier treibe alle tag,
Dan das jr, wie sonst ein man sol,
Den sachen vorsteht gar nicht wol.
Vnd wolt mich doch vertragen nicht,
So ich was bessers euch bericht.

K ij Ia,

Ia, so auch sonst ein ander wer
Der euch wolt geben radt vnd lehr,
Ob solches schon im besten gschicht,
So wolt jr jn doch horen nicht.
wolt euch nicht vnterweisen lan,
Ia, fart jn noch wol spottisch an.
Gleich als es einem schande wer,
Entpfangen von eim andern leer.
Denn was habt jr vor vnwilln nicht
Gestern im gastmael angericht?
Da jr auch einem alten man,
Der vns doch alles guts gethan,
Der vnser freund vnd nachbar ist,
Gar nichts verschont, wie jr wol wist.
Habt euch auch nu, ich meine ja,
Mit einem feinen gsellenn da
Dem Gnathoni recht wol versorgt,
Der nicht gern zalt, vnd doch gern borgt.
Desgleichen, halt ich, auff der erd
Itzt leichtlich nicht gefunden werd.
Der so geschickt wer vnd beqwem,
Das er ein halben groschen nem,
Vnd hulff verzern ein gantz es landt,
Ich gschweig ewr gut. pfuy dich der schand.

Nabal.

Ach liebes weib schilt mich nicht mehr,
Ich bin erschrocken sonst so sehr
Von deiner red, das ich kaum lebe,
Ich dir nu gentlich glauben gebe.

wormit

wormit hastu doch so behend
Ein solches vngluck abgewendt?

Abigaël.

Es ist hie widder zeit noch ort,
Dauon zu machen jtz t viel wort,
Im hause wil ichs euch wol sagen.

Nabal.

Ach, ich mocht schier vor leid verzagen.
Ich geh hinein, mir ist nicht wol.

Abigaël.

So, das ist recht, saufft euch noch vol.
Ach lieber Gott, der arme man,
Von awitz nichts beginnen kan.
Sollen die menner dan so sein?
Das dunckt mich ja nicht alzu fein.
Ein man der solt ja weiß vnd kun
All sein ding wissen recht zu thun.
Wolan ich wil jm folgen nach,
Vnd drin erzeln die gantze sach.

Actus quarti scena quarta.

Simon solus.

Ich gleub das nicht ein einger man
weit vnd breit gfunden werden kan,
Dem mehr in solchem grossen gut
Dan mir vnselgen mangeln thut.
welches vnwilns zu aller frist
Allein mein frau ein vrsach ist.
Sol ich sie anders ein frau nennen,

K iij Die

Die ich so oft hab lernen kennen.
Das sie ist ein recht vngebewr,
Bey der all freundlicheit ist thewr.
Denn so ich wil zu hause bleiben,
So thut sie es so feltz am treiben,
Biß das jr der anschlag gelingt
Das sie mich aus dem hause bringt.
Wan solchs geschicht, wo sol ich hin?
Ich auch ja gern bey leuten bin.
So hab ich niemand auff die neh,
Zu dem ich zur geselschafft geh,
Dan nurt mein gsellen den Nabal.
Denn die andern nachbaren all
Sind mit so viel gschefften besponnen,
Das sie mein nicht gewarten konnen.
Wan ich dan zu dem Nabal kum,
So gibt er sonst nirgends nicht vmb
Dan das er zech, das ist allein
Das leben vnd die wollust sein.
So kans ja so gnaw nicht zu gehn,
Ich muß mich auch etwas versehn.
Vnd einen rausch zu zeiten trincken,
Das mir die zung heb an zu hincken.
Wen ich dan also widerumb
Zu haus, beredt vnd frolich kumb.
Hilff Gott, wie geht es da dan an,
Was muß ich da fur gfar auß stan.
Da blixet vnd donnert also sehr
Mein weib, als wans besessen wer.
Solt ich jr dan drum sein sehr holt?

Sie

Sie schilt mich einen trunckenbolt.
Ein weinschlauch, ja ich muß noch sein
Ihr hund, jr esel, vnd jr schwein.
Vnd hort nicht eh zu brommen auff,
Biß das wir kommen beid zu hauff.
Vnd schlagen auff einander zu,
Eh kan sie haben keine ruh.
Vnd wan sie hie so gwaltig wer,
Das sie kont mit der faust so sehr
Als mit dem maul sich mein erwerben,
So wurd sich erst mein vngluck mehren.
Ia, wen sie het so grosse macht,
Ich gleub, sie het mich lang vmbrecht.
Also macht meines weibs vnart,
Das ich meins guts zu keiner fart
In fried vnd ru geniessen kan,
Das ich auch nichts darf haben an
Bey freunden, mit schimpff oder schert,
Dardurch ergetzet wurd mein hertz.
weil ich vor einer solchen buß
Meins weibs, mich alzeit furchten muß,
O wie wer ich ein selger man,
So ich ein solches weib mocht han
Als Nabal hat, ich wolt in ehrn
Sie halten, vnd jr folgen gern.
Abigaël ist klug vnd schon,
Vnd tregt billich der ehren kron.
Ich fest auff dieser meinung bleib,
wer ein beqwem vnd gtrewes weib
Bekumpt, das der wolrhumen kan,

K 5 Er

Er sey ein gluckhafftiger man,
Vnd hab ein schatz, dem auff der erden
Nichts konne gleich geachtet werden.
Er mag jr auch wol viel nachgeben,
Das sie jm muge lange leben.

Actus quarti scena quinta.

Daniel, Simon, Boas 3.

Daniel.

Vorwar so viel ich mercken kan,
So wil es alles vngluck han
Mit meinem Herrn, dem Nabal do,
Vnd schickt sich alle sach also,
Das es darzu wil kommen schier,
Das jm der wein, der meeth, das bier,
Wolln geben seinen rechten lohn,
wie dan die frau oft g sagt dauon,
Das es so kommen wurd ein mal.

Simon.

Ich weis nicht was der vom Nabal,
Von seinem Herrn thut gfehrlichs klagen,
Ich muß jn zwar darumb jtz fragen,
was murmelst du vom Herren dein?

Daniel.

Ach, ich beklag das elend sein.
Ach er hat sich keinerley massen
Darzu wolln vberreden lassen,
Das er meßiger leben wolt,
Vnd wer nicht ein solch trunckenbold.
Biß

Biß das er nu erfahrt mit schmerzzen,
Das die jm hold gewest von hertzen,
Das die es mit jm gut gemeint,
Die er ghalten vor seine feindt.

Simon.

wie so? was hat er dan vor not?

Daniel.

Da ligt er, vnd ist halber todt,
Vnd wird hinsterven wie ein hund.

Simon.

wer Nabal? der noch gestern gesund
Vnd so gantz frolich mit vns war?

Daniel.

Er steht jtz in der hochsten gefahr,

Simon.

So sag mir doch was im gebrist,
Das es so gefehrlich mit jm ist?

Daniel.

Als er heut aus dem beth auff stund
Er sich zu klagen sehr begund.
Er het gehabt ein bose nacht,
Vnd wer oft aus dem schlaff erwacht.
Das heubt wer jm so mechtig schwer,
Als wens vol bley vnd eysen wer.
Darzu so stechs jm in der seiten,
Vnd wie mit ein schermesser schneiten.
welchs jm dan brecht ein grossen schmerzzen,
Vnd

Vnd tret jm gmechlich nach dem hertzen.
wir aber thetens nicht sehr achten,
Sondern allein auff diß gedachten
Es wurd vom necht gen Wein jm kommen,
Des er zu viel het eingenommen.

Simon.

Das het ich zwar auch selbs gedacht,
Denn ers etwas zu viele macht,
Tranck mehr, dan er zu thun sonst pflegt.
Hat er sich dan widder gelegt?

Daniel.

Nein, er so rumb im hause gieng,
Vnd gar kein lindrung nicht entpfing.
Er ward schwächer ye mehr vnd mehr,
Vnd ward jm letzt das atmen schwer.
Das er hub sehr zu keichen an,
Vnd gieng jm oft ein schweimen an.
Darnach, des niemand het verhofft,
Fiel er zur erden das es pofft,
Vnd gab von sich ein grausam laut.

Simon.

Vorwar mir schaudert sehr die haut.
Es mag den alln jr haut wol schaudern,
Die gerne ligen in den laudern.

Daniel.

wir lieffen zu, wern sehr erschreckt,
Der lerm die frawen auch erweckt,
Das sie gelauffen kam zu hand.

Der

Der Herr, gleich als er sie nicht kantz,
Gab jr auff jr frag kein bescheid.
Spert auff das maul vnd augen weit.
Thet das gesicht gresslich verwenden,
Schlug heßlich von sich mit den henden.
Die backen die blies er nu auff,
Nu knirtscht er mit den zenen z hauff.
Vorm maul lag jm ein blutger schaum,
Mein lieber Herr, jr gleubt es kaum,
wies mit jm so gresslich geschen,
Das ichs nicht mochte lenger sehn,
So packte ich mich aus dem haus.

Simon.

Sich da kompt dein gsel auch berauß.

Boas z.

Behut vns Gott vor solcher not.
wie ist das so ein gschwinder todt.
Ich gleub das nie ein menschen kind
Vmbkommen sey, so boes vnd gschwind.
O not, ô todt, wie bist so schwer?

Simon.

Hor, der beklagt sich auch gantz sehr,
was es sey wolt ich wissen gern.

Daniel.

wie geht es nu dan vnserm herrn?

Boas z.

wies jm geh, ich vnwissent bin.
Disß weis ich wol, er ist dahin.

Ey

Daniel.

Ey was ich hor, ist er gestorben?

Boas 3.

Er ist eins schnellen tods vertorben,
Die seel gieng von jm wie ein flut,
Vermischet mit geronnen blut.

Simon.

Ey ist es so greulich geschen?

Boas 3.

Ich habs mit meinen augen g sehn.

Simon,

Ach wie ist doch der menschen leben
Mit so viel gfar vnd not vmb geben.
Ach kan den todt dan niemand meiden?
Vnd ist der Nabal so verscheiden?
So ein junger vnd reicher man?
Ach das dem todt nicht steuren kan
Noch weißheit, noch gewalt, noch tugend,
Noch adel, noch reichthumb, noch jugent.
Ach vmb den Nabal ich schier wein.

Boas 3.

Vnd dunckt euch das solch wunder sein?
Wist jr nicht das frau Trunckenheit,
Denen so jr verwand mit eid,
Vnd die sie haben werd vnd hold,
Zu geben pfleg ein solchen solt?
Ir mußt auch wol den Iunckern mein
Euch lassen ein exempel sein.

wolt.

Simon.

Wolt Gott, das auch mit mir ein mal
Die besserten jr leben all,
Die hiraus treiben nur ein spot,
Vnd den bauch halten fur jrn Gott.

Daniel.

O an gesellen solcher bar
Ist all hoffnung verloren gar,
Da gelten kein exempel nicht,
Mit leer ist wenig außgericht.

Simon.

Es mich vorwar oft wunder nimpt,
woher diß jimmermehr doch kumpt,
Das die leut so zusamen lauffen,
Allein das sie sich vol thun sauffen.
Das sie hie lust vnd lieb zu haben,
welchs in jr hertz gar nicht kan laben.
Denn so ich allerkey betracht,
Das sonst die menschen sundgen macht,
So ist gemeinglich von solchen dingen,
Die frewd vnd wollust mit sich bringen.
Vnd etwas sanfft den sinnen thun.
Aber betracht die weinsucht nun.
Pfleget sie nicht alles zuuorhindern.
Dauon lust kompt den menschen kindern?
Die trunckenheit mit jrem giff
Viel widderwiln vnd vn gluck stift.
Veriagt all frewd, kurtz weil vnd lust,
Vnd

Vnd macht den menschen tol vnd wust.
Doch sind die leut gesinnet so,
Als kondten sie sonst nicht sein fro.
Als wer sonst kein wollust im leben,
Das sie mit aller macht thun streben
Nach sauffen. welchs zu aller frist,
Dem leib vnd der seel schedlich ist.

Daniel.

Wer wolt daran ein zweiffel han?
Das solchs der Teufel richte an?
Denn weil er sonst jr nicht viel find,
Die jm hierin gehorsam sind.
Das sie sich durch strick odder schwert
Selbs vmbbringen auff dieser erd.
So hat er diese kunst erdacht,
Vnd jr viel so verblent gemacht,
Das sie wissent vnd williglich
In den todt selbest sturtzen sich.
Vnd was ist sonst die trunckenheit,
Dan ein willig vn Sinnigkeit?
Aber ich hie zu lang verzih,
wirstu nu gehn auff's feld zum vieh?
Ich wil gehn widder in das hauß.

Boas 3.

Ia ich wil gehn auff's feld hinaus,
Vnd wil dis erschrecklich geschicht
Vor keinem menschen schweigen nicht.

Simon.

So

So wil ich auch nach haus stracks gehn,
Vnd gebens mein weib zuuorstehn
Das sie hiruon hab ein beyspiel,
Das sie mir vorhalt oft vnd viel.
Vnd muge so mit newen stucken
Ir verweisung vnd klage schmucken.

Argumentum Actus quinti.

Als David hort des Nabals end,
Seine Legaten er auß send.
Mit dem befehl vnd der gestalt
Zu werben vmb die witfraw bald.
Vmb die schone Abigaëln,
Die all ding kont so wol besteln.
Thut solchs doch mit des priesters radt,
Vnd geht die sach auch wol von stadt.
Abigaël verwilligt drein,
Lest sich gefalln den willen sein.
Vnd wird jm als balt zugefurt,
Er entpfengt sie, wie sichs geburt.
Vnd wird die hochzeit vort gestellt,
Obs gleich den megden nicht gefelt.
Dem heuchler wird auch abgelont,
Denn seiner der knecht gar nicht schont.
Iagt jn von seiner frawen haus,
Vnd geht diß spiel in frewden auß.

Actus quinti scena prima.

David, Abiathar sacerdos.

David.

L Ich

Ich kan mich gnug verwundern nicht
Des, so ich jtz bin vnterricht,
Von des Nabals geschwinden todt.

Abiathar.

Es ist vorwar ein schrecklich nodt,
Die vns vermant vnd leret frey,
Wie Gott ein grechter richter sey,
Welcher den lastern sey gehaß,
Vnd sie nicht vngestraftet laß.

David.

Es sind sonst auch der beyspiel mehr,
Die vns daruon auch geben lehr,
Vnd lerne ich teglich darbey,
Das nichts so wol geraten sey,
Als das man, so vns gschicht gewalt,
Sie sey auch, wie sie wol, gestalt.
Nicht mit dem aller gstrengsten rechte
Oder sonst mit gewalt verfechte.
Sondern das man die rach allein
Gott gebe in die hende sein.

Abiathar.

Wan diß die menschen kondten thun
So stunds vmb sie viel besser nun,
Sie wurden nicht durch haß vnd neidt,
Durch abgunst, feindschafft, groll vnd streit,
Zergehn, verdorren vnd verterben,
Auch nicht von schlegn vnd wunden sterben.
Sondern sie wurden mit gedult

Einer

Einer des andern sund vnd schuld
Dem vrteil Gottes befehlen gern,
Vnd darneben auch fleis ankern,
Wie aller z anck vnd haß auff erden
Durch wolthat mocht gedempfet werden.

David.

Das ich diß thun muge mit ehren,
Da wil ich grossen fleis ankern.
Vnd ich gleub das mir Gott jtz und
Nichts bessers het erz eigen kund,
Denn das er meins feinds vnrecht pochen
An jm so gwaltig hat gerochen.
Das ich nicht mit vergretzet mit
Mich beschmitzet mit vnschuldgem blut.

Abiathar.

Ich kan ja kein recht vrsach sehn,
worumb es doch so must geschen.
Das so ein mensch widder den andern
Mit vbermut vnd grim thut wandern.
Denn ob wol der gotlosen hertz
Gleich wie das meer tobet on schertz,
Vnd alzeit etwas newes brauet,
welchs den frommen gantz scheußlich drauet.
So lacht doch Gott, vnd macht zu nicht
Alls was der gotloß denckt vnd dicht.
Vnd wan gleich der gotlosen schar
Scheint als sie wer gluck selig gar,
So hengt doch an eim schwachen strick
Ir gluck, vnd felt im augenblick,

L ij Vnd

Vnd ist wie glas, vnd anders nicht,
welchs wol schon blenckt, doch bald zerbricht.

David.

Diß kan ich all in meinem sin
Aussecken z war, doch weil ich bin
Auch fleisch vnd blut, es auch oft kumpt,
Das sich mein sin vnd witz e krumpt.
Vnd das mir dan zorn oder schmerz
Beleufft, vnd gar innimpt das hertz.
Das ich der gbuer vergeß geschwindt,
Vnd schlag mein ampt auch in den windt.

Abiathar.

Das fleisch das pflegt sich so zu streben,
Vnd so lang als wir hie thun leben,
So können wir in keinen wegen
Sein bose art gantz von vns legen.
Doch solln wir, so viel gschehen kan,
Der lust mit vernunft widderstan.

David.

Ich hierauff mich befleissen wil.
warumb ich aber in der still
Dich hab heraus gefurt mit mir,
Das wil ich jtz t erzelen dir.
Denn so deins rads zu einger frist
Mir von noten gewesen ist,
So ist es jtz und vor der hand.

Abiathar.

Worin ich euch mit meim verstandt,

was

Was radten odder helffen kan,
Das thu ich gern, zeigt mirs nur an,
Ich dien euch willig mit meim leib.

David.

Ich halt du kenst ja Nabals weib?

Abiathar.

Abigaëln, sagt jr von der,
welche ein zier ist vnd ein ehr
Aller frawen zu vnser zeit,
Die sie all vbertrifft gar weit
Mit schone vnd mit freundligkeit,
Mit zucht vnd mit bescheidenheit?
wie so? wie fragt jr so nach jr?

David.

Es wer wol mein wil vnd begir,
So ich jtz haben mocht die wael,
Das sie wurd mein ehlich gemael.
Vnd das ich diß begeren thu
Da hab ich wicht ge vrsach zu.
Denn das ich diß laß gehen hin
Das sie recht scheint nach meinem sin.
So ist sie so gar tugentreich,
Das jr kaum ist ein andre gleich.
Drumb sie dan wirdig ist alltage
Das sie einr Kongen kleid antrage.
Darzu so konnen wir viel frommen
Von jr in dieser not bekommen.

Abiathar.

L ij Es

Es ist war, was jr hievon sagt:
wans jr allein auch so behagt.
Aber ich fürcht sie ist so fest
Das sie sich nicht bereden leßt.
Das sie nem einen solchen man,
Der da ist in des Konges ban.
Vnd hat keine gewisse stet,
Drauff er sich zu verlassen het.

David.

Es leßt sich zwar also ansehen,
Als kont es gantz schwerlich geschen.
Aber was schad ein ding versocht?
Villich es vns gelingen mocht.
Darzu so hoff ich das die sachen,
wie sie sein sol, Gott wol wird machen.
Auff den wil ich festiglich bawen,
Im diese sach gantzlich vertrauen.
Er wird sie recht vnd trewlich fassen,
Denn er hat mich noch nie verlassen.
Alzeit er mich gefordert hat.
Dich bit ich vmb ein trewen radt,
wie dich dunckt, das beqwem vnd wol
Die sach getrieben werden sol.

Abiathar.

Erstlich must jr kein arbeit sparen
Der frawen meinung zu erfahren.
wie sie gesint, was jr zu mut,
Ob es sie auch so deuchte gut.
Ir must aber diß jderman

Vertrauen

Vertrauen nicht, noch zeigen an.
Sondern einen allein erwelen,
Vnd dem den handel gar erzelen.
Den jr wol kent, vnd den jr wist
Das er from vnd Gotsfurchtig ist.
Getrew, freundlich vnd wol bered,
Der euch nie was zu leide thet.
wie dan Vrias ist vor allen.

David.

Es thut mir also wol gefallen.

Abiathar.

So bald sie aber willigt drein,
So muß nicht lang geseumet sein.
Das nicht ein schelm darzwischen kumb,
Vnd stoß den handel widderumb.
Vnd etwas schlimmes werffe drein,
wie dan gar viel der kleffer sein,
Die oft machen durch falsche wort
Das eine freye werd zerstort.
Drumb muß man bald sein bey dem handel,
Das sich jr gmut nicht wo verwandel.
Darzu wist jr der weiber art,
Das keine so bestendig wart,
Das sie sich nicht vmbwenden ließ
So was bessers zu handen sties.
Yetzt woln sie gern, bald woln sie nicht,
welchs denn am meisten da geschicht,
wen sie ein andre hoffnung sehn,
Das was stadlichers mocht geschen.

L iij Vnd

Vnd schafft darnach bey jn gar nicht,
Ob man sie schon anders berichtet.
Derhalben mercket diß gar eben,
So bald sie hat das jawort geben,
So last euch keine rast noch ru
Bis man sie euch gefuret zu.

David.

Dein radt der dunckt mich sein gar gut,
Denn es mir auch so gfallen thut.
Es mag hir bleiben bey bestehn.
Wir wollen nu ins Leger gehn,
Vnd diß Vriæ tragen an,
Das er sich bald mach auff die ban.

Actus quinti scena secunda.

Balach, Boas I. Gnatbo.

Balach.

Ey lieber bruder sagstu war?
Es ist erschrecklich gantz vnd gar.
Gantz gresslich, ey behut vns Gott,
Vnd hat das herlich gastgebot
Vnd vnfers Iunckern regiment
Gehabt ein so erbermlich end?

Boas I.

Es gleubts niemand wie es geschehn,
Er habs denn selber angesehen.
Ich weis werstu darbey gewesen,
Dir solt sehr all dein tage gresen.

Ich

Balach.

Ich preyse Gottes gutigkeit,
Vnd spur hie sein gerechtigkeit,
Das er durch sein Gotliche krafft
Auff solche weis die reichen strafft,
Vmb jren pracht vnd vbermut,
Dardurch sie manches armes blut
Verachten vnd gantz sehr beschwern.
Nu gan ich in jr wesen gern,
Vnd bin auch mit meinem gluck vnd standt
Besser Zufrieden dan Zubandt.

Boas I.

Dasselb geburt ein jderman
Das er Gotts willn sey vnterthan,
Vnd geb sich dar gedultig ein,
was so muß vnd nicht anders sein.
Doch wils vns auch gar nicht geburen
Das jmand solt horn odder spuren,
Das wir von vnfers Iunckern sach
wie er gfalln in solch weh vnd ach
Spottisch vnd giftig reden solten,
Gleich als wirs so gern haben wolten.
was jm jtz widerfaren ist
Das mustu auch zu aller frist
Vnd andre all gewarten sein.
Dann allen menschen in gemein
Kan solchs gar leichtlich widerfaren,
Wir sind von einer haut vnd haren.

L 5 Ich

Balach.

Ich aber halts hiefur gar eben,
Das ein mensch fleyszig acht sol geben,
So sich, wies dan zuzeiten pflegt,
Etwan ein solcher fall zu tregt.
Das er, so es wurd notig sein,
Durch solcher beyspiel krafft vnd schein,
Vnd durch meldung solcher geschichten,
Mug andre leut fein vnterrichten.

Boas I.

Ia lieber gsel in der gestalt
Ich es mit dir auch gentzlich halt.
Doch wil ich das man sey darob,
Vnd mach das schelten nicht zu grob.
Sonst mochtens andre dafur halten,
Wir liessen vnsern zorn mehr walten,
Vnd folgten vnserm mutwilln mehr,
Denn das wir suchten Gottes ehr.

Balach.

Ey, wir stimmen nicht wol zusammen,
Ich gleub, das man Gotts werck vnd namen
In allen dingen rumen sol,
Es geh dem menschen wie es wol.

Boas I.

Das dunckt mich recht geredet sein,
Vnd ist das auch die meinung mein.
Doch so du so andechtig bist,
Dem gros biran gelegen ist,
wie

Wie Gottes ehr auff dieser erd
Ghandhabt vnd außgebreitet werd,
So soltestu auch dein gestalt,
Wie du so wol seist abgemalt,
Wie du seist so ein feiner knecht
Auch gleicher weis anschawen recht.
Denn Gottes ehr leuchtet vorwar
Aus deinem stand auch hell vnd klar.
Denn Gott hat dich zum knecht gemacht,
Das du wurdest was zu recht gebracht.
Vnd wurdest zam, bendig vnd mild,
Der du sonst nicht viel leiden wilt.
Wilt niemands nicht schonen noch sparen.

Balach.

Ey laß die predigt jtz und faren.
Ich weis es wol vnd sags auch frey,
Du stehst alzeit dem Iunckern bey.
Ist doch eben so wenig dir
Daruon geholffen, alse mir.
Aber schaw dort nach vnserm haus,
was geht da fur ein gast heraus.

Boas I.

Das isß Gnatho der rechte man,
Der die malzeit hat grichtet an,
Nach welcher es so schlim ist gangen.

Balach.

Ich wolt das er lengst wer gchangen.
Es scheint ein loser tropff zu sein,
Ach

Ach mocht ich han den willen mein,
Oder kont sonst ein vrsach finden,
Ich wolt jm hend vnd fusse binden,
Vnd jm das leder so zugerben,
Das ers nicht braun vnd blo durfft ferben.

Boas I.

Ich sag dir vergreiff du dich nicht,
Denn wer da schlegt, derselb gebricht.

Gnatho.

Die weil der todt mit seiner macht
Den Nabal mir hat vmbgebracht.
So seh ich das ich hir vort an,
Kein briefe mehr, noch raum werd han,
Drumb wil ich mich packen daruon.
Weil ich aber nicht kriegt den lohn
Vor meinen dienst vnd meisterschafft,
Hab ich in eyl diß aufgerafft
Da auff dem tisch vnd banck darbey,
Ich muß nu sehn was es doch sey.
Sich, hat mich doch das gluck verehrt,
Vnd einen silbern leffel bschert.

Balach.

Er hat nu wol versorgt sein sachen,
Vnd wird sich dauon wollen machen.
Ich muß jm nach, geh mit mir fort.
Hor frommer man, hor nur ein wort,

Gnatho.

Was? guter freund, wie ruffst du mir?
Bistu

Balach.

Bistu Gnatho, so ruff ich dir.
Denn vber dich geht ein geschrey,
Das durch dein kuchen meisterey
Mein Iuncker Nabal sey vertorben.

Gnatho.

Ich wolt Saul wer eh selbs gestorben.
Solt ich begern des Herren todt
Den mir Gott hat in meiner nodt
Zu einem schutz herrn kaum beschert,
Vnd der mich auff das best ernert?

Balach.

Du wirst mich vberreden nicht,
Das ich solchs gleub, du arger wicht,
Wo gdenckstu aber jtz und hin?

Gnatho.

Mir steht all mein gedanck vnd sin
Zu suchen einen andern herrn,
Der mich armen mocht auch ernern,
Wolt Gott es mocht nur bald geschehen.

Balach.

Was tregstu da? laß mich es sehn,
Ich halte wol es sey nicht dein.

Boas I.

Ey, was sol solche vnzucht sein?
Laß in zum bencker jimmer gehn.
Ich

Balach.

Ich thues nicht, ich muß es vor sehn.
was tregstu da? horstues dan nicht?

Gnatho.

was bin ich denn dir bawrn verpflichtet,
Das ich dir solchs sol eben sagen?
was gehsts dich an, was ich thu tragen?
Du hast mir nie gegeben gelt,
Ia, hast auch nichts auff aller welt,
Das du eim andern kontest geben.

Balach.

wie nicht? ich wil dir zeigen eben,
was ich eim solchen geben kan,
Seh, trag mit dir die faust daruan.

Gnatho.

Zeter, mordio, vber gwalt.

Balach.

wie? schreistu noch? seh nu hin bald,
Da hastu den noch auch darzu.

Boas I.

was machstu noch hie vor vnruh?

Gnatho.

was ist das vor verwegenheit?
Vnd ist denn das gerechtigkeit,
Das in so einer freyen stadt
Ein ehrlich man kein friede hat?
Vnd

Vnd muß auff Keiserfreyen strassen
Geschlagen werden solcher massen?
Wolan, ich thu dir eben sagen,
Ich wil solchs vor dem schultzen klagen.

Balach.

Ich halt du hettest gern noch einen,
So mochtest du mit fugen weinen.
Geh jimmer hin vnd sings jm auch,
So wird er dir nach altem gbrauch
Ein butterbrodt zu lohne geben.
Itzt sag ich dir diß widder eben,
Wirstu hie lange losung machen,
So werd ich thun so viel zu n sachen,
Das du hirnechst vorm Richter sehr
Vber niemand solt klagen mehr.

Boas I.

Du machst dich itzt zu massen kraus,
Laß vns viel lieber gehn ins haus.
Wir han sonst itzt genug vnrw,
Du darfst jr nicht mehr richten zu.

Gnatho.

Hilff Gott, das ist ein grobes stuck,
wie hat sich itzt gendert mein gluck?
Denn also gehts zu in gemeine,
Es ist kein vngluck nicht alleine.
wer ein mal in vnfal geredt,
Derselb gar selten sanfft auffsteht.
Schawt, ich hab durch den todt verlorn,

Den

Den ich mir hat zum herrn erkorn.
Noch ist das nicht geweest genung,
Wo mir nicht auch den bawren jung,
Der mich wol schlug auff gmeiner strassen,
Das vngluck het begegnen lassen.
Aber wem sol ich solchs nu klagen?
Vorwar es wird ein jder sagen,
Mir sey hiran gar recht geschen.
wolan es pflegt so zuzugehn.
Der muß vorwar leiden gar viel,
Der sich gibt in ein solches spiel.
Das er nur ein schmorotzer sey,
Eß vnd trinck allenthalben frey.

Actus quinti scena tertia.

Vrias, Iosaphat, Daniel.

Vrias.

wist jr auch was die vrsach ist,
Das vns David zu dieser frist
Nach Nabals haus hat außgesandt?

Iosaphat.

Die vrsach ist mir vnbekant.
Es wer dan das er het befohlen,
Das wir mehr profiant solln holen.
Denn ich gleub das mit wenger muh,
wir mochten die bekommen nu,
weil der Nabal jtz ist dabin.

Vrias.

O nicht, es hat ein andern sin.
Wir

wir soln etwas begeren dar,
Deßgleichen, wie ich halt vorwar,
Von kostlichkeit vnd schon darbey
Im gantz en hauß gar nichtes sey.

Iosaphat.

Was ist's? thut mir klerern bericht.

Vrias.

Ich wils deudlicher sagen nicht,
Radt jr nu zu, was es sol sein.

Iosaphat.

Zwar ich bekenn die grobheit mein.
Denn ich kein weissager nicht bin,
Auch hab ich keins Propheten sin.

Vrias.

So wil ich noch was sagen mehr,
Vmb ein ding solln wir bitten sehr.
Welchs so es vns dar wird gegeben,
So wirds vmb vnser gantz es leben
On zweiffel etwas besser stehn.

Iosaphat.

Das mocht ich zwar sehr gerne sehn,
Aber sagt, was es dan sol sein.

Vrias.

Nu ja, David der herre mein,
So sie von Gott jm ist beschert,
Zur Eh Abigaëln begert.
Die Nabals frau zuuor gewesen.

M Dieselb

Dieselb hat er sich außerslesen,
Vnd vns darumb jtz auß gesandt,
Das wir die sach verhorn zu hand,

Iosaphat.

Ey was ich hor? es wundert mich
Das David der lest glusten sich
welche sich wird, wie michs ansicht,
Darzu lassen bereden nicht.

Vrias.

was sagt jr nu? vnd meint jr dan
Das es so schwerlich zu solt gan?

Iosaphat.

wie anders? vnd hie merck ichs bey,
Das sie ja nicht so nerrisch sey,
Vnd woll jr herlichs haus verlassen,
Vnd all jr gut, welchs ist on massen.
Vnd wol nemen ein solchen man,
Bey dem sie wenig r^w wurd han.
Vnd must mit jm zu ibn hin vnd widder,
Das ein land auff, das ander nidder.
Vorwar wie ich die sache richt,
So wird sies gentzlich wagen nicht.

Vrias.

Die weiber thun gar viel auff erden,
wan sie nur recht gehandelt werden.
welchs niemand het zuuor gedacht,
Das man sie het darzu gebracht.
So wird vns auch an diesem ort

Diß

Diß nicht ein wenig helffen fort.
So sie wird horn vnd spurn zugleich,
wie David sey das Königreich
Von Gott dem Herrn selbs zugesagt,
was gilts, ob sie es dan nicht wagt?
Denn die weiber sein dieser art,
Das nie kein so demutig ward,
Die nicht gern het ein grossen herrn,
Vnd strebt alzeit nach höhern ebrn.

Iosaphat.

Ich wil es hertzlich gerne sehn,
Das es nach eurm willn mug geschen.
Aber wo Gott mit seinem geist
Euch hinein nicht sein hulffe leist,
Vnd der frawen gemut bewegt,
So habt jr diß vmb sonst erregt,
Vnd werd bey jr gar nichts erhalten.

Vrias.

wolan wir wollns Gott lassen walten.
Der wird vns furnemlich beystehn,
Das es mug wol von staden gehn.
Doch, so er weis das dieses freyen
Dem David könne wol gedeyen,
Aber so zihn wir jimmer hin.

Iosaphat.

Zu folgen ich bereitet bin.

Daniel.

Mein Fraw die hat mir aufferlegt,

M ij Das

Das ich sol auff die knecht vnd megt
Gut achtung haben was sie machen,
Ob sie auch gnug thun jren sachen.
Denn sie so gar sind vntrew vol,
Das ich es nicht kan sagen wol.
Einer es auff den andern scheidt,
Vnd wo man sie nicht alzeit treibt,
So thun sie doch gar nichts mit fleis.
Ich aber doch vorhin wol weis,
Das sie von mir sehr werden klagen,
wen ich jn werd von arbeit sagen.
Vnd sie vermanen, das sie wollen
Trewlich arbeiten, wie sie sollen.
Doch geb ich auff jr wort nicht viel,
Denn diß das ist mein endlichs ziel,
Das ich, wie ein getreuer knecht
Meiner frauen wil dienen recht.
Vnd machens all auffss aller best.
was kommen aber da vor gest?
Zwar so ich anders recht kan sehn,
So finds von Davids volck jr zwen.
was nu doch werd sein jr beger
Zum andern mal? wundert mich sehr.

Iosaphat.

Seht dort steht vor der thur ein knecht.

Vrias.

Furwar der kompt vns eben recht,
Den wollen wir anreden bald.

Gluck zu, wie hat es ein gestalt
Vmb

Vmb deine frau Abigaëln?

Daniel.

Wie fragt jr das jr guten gseln?

Vrias.

Wir wolten sie gern reden an,
Darzu wir denn gros vrsach han.

Daniel.

Ich weis nicht obs kon sicher sein,
Das ich euch zu jr laß hinein?

Vrias.

Ich sag dir zu auff meinen eid,
Das jr nicht sol geschen ein leid,
Es hat mit vns jtz kein gefar.

Daniel.

Ich halt das jr ja redet war.
Lauff junger zeigs der frauen an.
Ir mugt dieweil ins haus ein gan.
Je mehr ich dieser sach nach tracht,
Je mehr sie mich verwundern macht.
Was es doch sein mug immermehr.
Vnd wo mir nicht bekant wol wer
Dauids trew vnd auch redlichkeit,
So wurd mir zwar sein etwas leid,
Das nichtes gut vns armen leuten
Diß eilend botschaft wurd bedeuten.
Vnd bitte Gott das er behende
All vngefal gar von vns wende.
Wo sie aber vmb profiant

M ij Zum

Zum andern mal sind auß gesand,
So kosts gar viel, vnd ist gantz schwer,
Zu speisen lang ein solches heer.
Das ich von der gefar nicht sag,
Die vns dardurch begegnen mag.
Dieweil der Konig Saul aus macht
Den David hat gthan in die acht.
Aber wie solln wirs anders machen?
Wir konnen nichts thun zu den sachen.
Denn so man jm hulff wolt abschlagen,
Vnd speis in solcher not versagen
So kompt man in die hochste gefar,
Das sie das gut nicht nemen gar.
Aber ich wil nu gehn hinein,
Vnd horn was jr gewerb wird sein.

Actus quinti scena quarta.

Agar, Rebecca ancilla.

Agar.

Ich gleub, das nichts mug auff die erden
Vngluckhafftger geboren werden
Dan eine magt zu dieser zeit,
Da man vns anthut alles leid.
Da eine magt gar nichts thun kan,
Das die frau gut wol bleiben lan.
Wir machens wie wir immer wollen,
Noch wir es besser machen sollen.
Vnd sonderlich thut mir sehr weh,
Das ich daruber diß noch seh,
Wie etliche aus vnserm orden

So

So statlich sind vnd herlich worden,
Die sich des regiments annemen.
Ia thun sich gantz vnd gar nicht schemen,
Das sie vns beid bey nacht vnd tagen
Viel herter vmbtreiben vnd pflagen,
Dan auch die herren selber thun.
Ein solcher g'selle ist auch nun
Daniel vnter vnserm g'sind,
Ich wolt das er wer taub vnd blind.
Denn weil derselb ein heuchler ist,
Vnd der frauen zu aller frist
wol nach dem maule sprechen kan,
So muß er sein der beste han.
Vnd vber das gesind regieren,
Er weckt vns all morgen vor vieren,
Vnd ligt vns darnach vberm hals,
In einer stund solln wirs thun alls.
Er helt vns so gestreng vnd fest,
Als wer er nie ein knecht gewest.
Vnd meint darzu noch anders nicht
Dan er habs so wol außgericht.
Itzt stost er mich auch auß der thur,
Da ich nur gieng ein weng herfur,
Vnd wolt die frembden menner fragen,
Was sie hetten der Frawn zu sagen.
Vorwar wird ers so lange treiben,
So wird hie kein magt konnen bleiben.
Vnd ich dennoch gern wissen wolt,
Wie viel herrn ich hie dienen solt?
Ir viel konnen befehlen schon,

M iij Aber

Aber gar wenig geben lohn.
Schaw, dort kompt mein mitdienerin,
Wo mag die jtz t wolln gehen hin?

Rebecca.

Hilff lieber Gott: vnd ist das recht
Das angeborn ist vnserm gschlecht
Ein solche vnbestendigkeit?
Das die weiber sich allezeit
Von mennern das bereden lassen,
Was die nur in sin durffen fassen?
Aber het ich doch jmands nu,
Denn ich kan eh nicht haben ru,
Biß das ich diß von mir gesagt.
Sib da kompt gleich die ander magt,
Das schickt sich recht, der wil ichs sagen.

Agar.

Mein Rebecca, was ist dein klagen?
Hastu was news, so laß es horen.

Rebecca.

Freilich was news, spitz nur die oren,
Ich weis dich wirds verwundern sehr,
Du hettests gemeinet nimmermehr.
Ich halt auch das an diesem ort
So er die zeitung erstlich hort
Keiner sie werde gleuben bald.
Ia so hats vmb sie ein gestalt,
Das ob ich gleich gehort das gschicht,
Ich mir doch selbs schir gleube nicht.

Ey

Agar.

Ey liebe sag, was ist es u. in?

Rebecca.

Itzt ist kommen ein frembder man
Von Davids volck mit eim gesellen,
Die konnen sich gar hofisch stellen.
Als ich sie sah, vnd das der knabe
Sie furt ins frawn zimmer gerade.
Gedacht ich bald im sinne mein,
Da wird furwar was neues sein.
Vnd schlich in auff den zenen nach,
Vnd stund heimlich vor dem gemach.
Hielt an den abtmen, vnd war still,
Horcht zu was sich da machen wil.
Da hort ich ein vngleublich sach,
Die ich nicht wol darf sagen nach,
Eb dan sie ist gangen von staden.
Es wer dan das dues kontst erraten.

Agar.

Mein Schwesterchen zeig mirs doch an,
Denn ich es nicht erraten kan.

Rebecca.

Die Fraw wil sich bereid verandern,
Vnd mit den gsandten daruon wandern,
Vnd bald mit dem Breutgam zu bette.

Agar.

Ey vexier nu du arge klette.

M 5 Bey

Rebecca.

Bey meiner trew, ich liege nicht,
Sich zu, obs nicht noch heut geschicht.
Sie baten sie gantz freuntlich sehr,
Das sie David jr trew vnd ehr
Vnd das jawort heimgeben volt,
Es sie nimmer gerewen solt.
Erstlich sie sich ja weigern thet,
Als die dar nicht gros lust zu het.
Vnd gieng jr an jr trew vnd glimpf,
Denn sie meinet es wer nur schimpf.
Oder wird ja allein geredt,
Das man sie so versuchen thet.
Aber da sie thet ernst befinden,
Da ließ sie sich bald vberwinden.
Vnd sagt laut ja, zur selben stund,
Das ichs vor der thur horen kundt.

Agar.

Pfuy, das jr ja ein solches freyen
Mug wie dem hund das grass gedeyen.
Gott geb jr ja has hertz eleidt.

Rebecca.

Red mit grosser bescheidenheit.
wo von wiltu ein vrsach suchen,
Das du sie mugst also verfluchen,
Sie hat dir ja nie args gethan.

Agar.

Ach das sie diß vnd das geh an.
Denn

Denn sie ist des ja wirdig wol,
wan ich die warheit sagen sol.
Denn so sie sieht ein arme magt,
Die es jrgent ein wenig wagt,
Vnd redt freuntlich mit einem knecht,
Ich meine ja, sie gibt vns recht,
Vnd gdenckt nichts guts, vnd schilt vns sehr,
Das vns offt geht an glimpf vnd ehr.
Sie aber hat den vorgehen man
Kaum aus dem hause tragen lan,
Vnd ist sein stet kaum worden kalt,
Vnd sie vergist seiner so bald.
Vnd thut sich nach eim andern vmb,
Das sie ja nicht zu spete kum.
Ob ja vnter die menner all
Ein tewrung kem in diesem fall.
weil so viel krieg vorhanden sein,
Vorwar es dunckt mich ja nicht fein.

Rebecca.

warumb hastus vor vbel jr?
welchs so es mocht geburen dir
So wurdest dues auch nicht auß schlagen.

Agar.

Ich wolt es nicht halb so sehr klagen,
wan sie auch het mit vns gedult,
So wir durch schwacheit was verschult.

Rebecca.

So geht es zu, zu aller frist,
Das

Das niemand so aufrichtig ist,
So jms vrteil wird geben frey,
Der nicht sein gnedger richter sey.
Aber wir wollns Gott lassen walten,
Du wollest diß ja heimlich halten,
Vnd ja bey leib es niemand sagen.
Wir krigten sonst wol all die pflagen.

Agar.

warumb solt ichs nicht sagen nach?

Rebecca.

Zwar es ist ja ein ehrlich sach.
Aber ich wils nicht haben wort,
Das du es habst von mir gehort.

Agar.

Hor was ist im haus vor ein laut?

Rebecca.

Vielleicht brengen sie schon die braut.
Laß vns hinein zur hinder thur,
Das sie vns vor dem haus nicht spur.

Actus quinti scena quinta.

Abigaël, Vrias, David.

Abigaël.

Daniel, du jm also thu,
Vnd sich im hause fleißig zu,
Das vns nicht werde was gestolen.
Machs alles wie ich hab befohlen.
Laß die kinder nicht lauffen aus,

Die

Die andern megd halt auch im haus.
Ir aber folget mir jtz t nach.

Vrias.

Abigaël, wie steht die sach?,
Der abend kompt, wolln wir schir gebn?

Abigaël.

Es mag im namen Gotts geschen.
Ich hab mein ding all außgericht,
An mir ist nu kein mangel nicht,
Gott woll diß alls zum besten keren.

Vrias.

Der wol ewr frewd vnd gluck vermeren,
Das euch diß nimmermehr mag rawen.

Abigaël.

Mein Vria, wie viele frauen
Meint jr wol sein, die das thun wolten,
Was ich jtz t thu, ob sie schon solten?

Vrias.

Es trieg mich dan die rechnung mein,
So wurden jr sehr wenig sein.
Aber man muß nicht sehn darauff,
Was jtz und thu der groste hauff.
Sondern viel mehr obs auch darbey
Nutzlich vnd recht vnd ehrlich sey.

Abigaël.

Aber es werden sein gar viel
Welchen nicht gfallen wird diß spiel.
Vnd

Vnd werden meinen, das hiran
Ich gar nicht weißlich hab gethan,
Noch mein gerucht vnd ehr betracht.

Vrias.

Daran da ligt nicht grosse macht,
Ir wist wol das von allen dingen
Mancherley red im volcke klingen.
Der ein sagt das, der ander diß,
Vnd ist doch nicht daran gewiß.
Drumb obs gleich hat ein schon gestalt,
Sol man jm doch nicht folgen bald.
Sonderlich hie in dieser sach
Sol man folgen am meisten nach
Gar heyliger frauen beyspiel,
Der man in der schrift findet viel.
Welche dan gleich, wie jr, gethan,
Dauon sie lob vnd ehre han.
Sara het in jrm vaterland,
Da sie war reich vnd wol bekand,
Ein rwigs leben wol kont furen,
Wie jr wol het konnen gebueren.
Aber sie wolte jrem man,
welchen Gott selbst furdert hindan,
Viel lieber folgen in jrm leben,
Vnd sich drumb in viel gfar begeben.

Abigaël.

Ich weis wol das sie mit jm reist,
Vnd hab sie drumb sehr oft gepreist.

Vrias.

Rebecca

Rebecca hat so auch gethan,
Auch Rachel hat gesetzt hindan
Vnd Lea jres vatern haus,
Vnd mit jrm man gezogen aus.
Auff das sie mochten sein bey den,
welchen Zusag von Gott geschen,
Das sie ewig alhie auff erden
Gebenedeyet solten werden.

Abigaël.

Vorwar mir diß ein hoffnung macht,
Das ich der leut red nicht viel acht.

Vrias.

Die hoffnung wird euch nicht betriegen,
Denn Gott ist war, vnd kan nicht liegen.
Der hat durch die verheischung sein
Vns all bißher erhalten fein.
Es ist on not, das ich jtz und
Es all erz el, wie ich wol kund,
wie oft er aus des feindes hand
Vns hab errettet, vnd aus schand.
wie oft er Sauls gewalt vnd tuck
Vnd all sein Gotuergesne stuck
Zu nicht gemacht hab vnd zuschand:
Dieweil es weis das gantze land
Euch auch nicht kan verborgen sein.

Abigaël.

Ich weis den gantzen handel fein,
Vnd hab das wesen wol verstanden.
Vnd

Vrias.

Vnd ob gleich wer noch gfar vorhanden,
So ist mit jr doch so gethan,
Das sie nicht lange weren kan.
Sauls gwalt die kan nicht lang bestehn,
Denn wir sehn in dem schwanck jtz gehn
Sein tyrannei vnd vbermut,
welcher dan keins thet jemals gut.
wan es nu wird am scherffsten stechen,
So wird es in eim huy zerbrechen.

Abigaël.

Ich bin bereit alles zu leiden,
So mich allein Gott nicht thut neiden,
Sondern so er durch seine gnad
An mir ein gut gefallen hat.

Vrias.

Last euch nicht lang duncken die zeit,
Wir sind nu nicht vom Leger weit.

Abigaël.

Dort seh ich einen gehn allein,

Vrias.

Das wird vielleicht die schiltwacht sein.
Oder ist David? ja vorwar
Er ist, ich ken jn offenbar.

David.

Ich bie in sorg vnd furchten steh,
Das es mein boten nicht wol geh,
Den

Den ich hab abgefertigt heut,
Zu werben vmb die schonste beut.
Mich wundert wo er bleib so lange,
Harn vnd sorg macht mir halber bange.
Aber schaw dort da kompt er schon,
Het ich nur eh geredt daruon,
So wer er auch eh widder kommen
Vnd ich eh gut botschaft vernommen.
Mein hertz im leib vor freuden springt,
Denn er die Braut schon mit sich bringt,
Abigaëln furt er mit sich.
Ich kan nicht gnugsam loben dich
Her Zebaoth, du hochster Gott,
Das du mich auch in dieser not
Verlessest nicht, vnd gibsts mir gern.
Alls was mein hertz thut nur begern.
Ich muß in zwar entgegen gehn.

Vrias.

Er hat vns albereit gesehn.
Darumb er vns entgegen eilt.
Herr David es ja nu nicht feilt,
Das jr mein trewe recht erkent,
weil ich solch muh hab angewend,
Vnd so in einer kurtzen zeit,
Den handel hab gebracht so weit,
Das ewr nu ist Abigaël.

David.

wolan du bist ein ehrlich gsel,
Der du solch trewe thust bey mir;

N. Ich

Ich halte billich viel von dir,
wils auch machen bey meinen trewen,
Das es dich nimmer sol gerewen.
Abigaël gegrust seid jr,
Meins hertzen lust, trost, frewd vnd zier.
Nu ist zu fried das hertze mein,
Mein mit genosse solt jr sein
In allem was mir Gott wird geben,
Gluck vnd vn gluck in diesem leben.

Abigaël.

Mein Herr, woher kompt diese gnad
Die jr mir heut erzeiget hat?
Das jr mich wolt zum Ehgnosß haben,
So ich es doch mit keinen gaben
Ye hab verdient, das ich auff erden
Ewr gringste magt mocht gnennet werden?

David.

Last das nur faren diese zeit,
Ich weis wo her, vnd wer jr seit.
Gott gebe gnad, vnd hulff, das jr,
Die jr ins elend euch zu mir
Begeben habt, in kurtzer zeit
Mugt werden aller sorgen qweit.
Vnd besser tag on alls verdriessen
Mit mir in aller frewd geniessen.
Vria, fur sie nu hinein,
Vnd was da wird von noten sein
Dasselb fleißig vnd bald bereit.
Gott sey mit vns in ewigkeit.

A M E N.

Epilogus recitatus est
à quinque pueris.

Primus puer.

Ir durfft nu hie nicht lenger stehn
Zu harn, das sie heraus her gehn.
Vnd zu der kirchen furn die braut,
Sie werden drinnen jtz t vertraut.
Wolt jr aber noch horen zu,
So wolln wir euch erzelen nu,
Wie jr habt all auß diesem spiel
Zu mercken vnd zu lernen viel.
Vnd das wir hebn vom gringsten an.
Ein knecht vnd magt hie sehen kan,
was jm steh vbel odder wol,
Vnd was er thun vnd lassen sol.
Die schlemmer auch hie klerlich sehn,
wies mit jn pfleg hinaus zu gehn.
was fullerey geb vor ein lohn,
Hut euch dafur, vnd last dauon.

Secundus puer.

Kriegsleut mugen auch lernen hir,
was jn gebuer, vnd was sie zier.
Die armen leut soln nicht verzagen,
Sondern in gdult jr creutz e tragen.
Die reichen soln auch in jrm leben
Sich jres glucks nicht vberheben.
Denn hie haben sie gut bescheidt,

N ij wie

wie on kunst vnd vorsichtigkeith,
Es sey vmb's gut vnd alles gelt
Ein so loeß ding auff dieser welt.
Das manchem leib vnd leben kurtz,
Vnd die Seel in die Helle sturtz.

Tertius puer.

Die bosen weiber hie auch mercken,
Das sie durch mutwilln allein stercken
Ir mennr in zorn vnd vppigkeit,
Vnd sich selbs machen muh vnd leidt.
Aber wie es vmb eine frau,
Dies nicht mit jrm man sucht zu gnaw,
Die Gottfurchtig vnd ehrlich ist,
Zuchtig, from, klug, on argelist.
Wie es vmb die hab ein gestalt,
Ist hie gar artig abgemalt
In der schonen Abigaëln,
Die sich nu zu derselben gseln,
Vnd folgen jren tugden nach,
Die können zwar in keiner sprach
Genug gelobt vnd gebret werden,
Es ist nichts werders auff der erden.

Quartus puer.

weiter auch hie ein Obrigkeit,
Die durch jre sorgfeltigkeit,
Durch jre weißheit vnd verstand,
Trewlich regiert stet, leut vnd land.
Am David sibt was jr geburt,
Das sie vom rechten nichts abfurt.

Noch

Noch gunst, noch haß, noch eigen nutz,
Sondern das sie sein schirm vnd schutz
All jrer vntersassen gleich,
Gros odder klein, arm odder reich.
Endlich, derer so Gottes wort
Mit ernst leren vnd treiben fort,
Ist ein vordbild gar hubsch vnd klar,
Dauids priester Abiathar.
Also find hie ein jder stand,
Er sey auch wie er wol genandt,
Das er sich kan zu nutze machen
wol vorzustehn all seinen sachen.

Quintus puer.

Het jr nu vnser thun euch allen
In gunst vnd lieb lassen gefallen,
Dasselb erfuren wir sehr gern,
Calumniern sey von euch fern.
Nempt vor gut mit vns jungen knaben,
Dies zuuor nicht viel gubet haben.
Das wirs aber gefangen an,
Das han wir zwar im besten gthan.
Darin gar nichts gesucht mehr,
Denn das der jugent vbung wer.
Vnd kem zu nutze gemeiner stadt,
Vnd zu ehrn einem Erbarn Radt.
Dem wir wolten erzeigen gern,
Als vnsern hochgunstigen Herrn,
Vnsern fleis vnd auch danckbarkeit,
Vor veterliche gutigkeit,

N ij Vor

Vor seine trew vnd weisen radt,
Dardurch er hie gestiftet hat
Ein werck Stadt vor die Zarten jugent,
Zu lernen gute kunst vnd tugent.
Weil wirs aber mit andern dingen
Itzt nicht können zuwege bringen,
Das er mug sehen vnsern fleis,
So haben wir auff diese weis
Vnser gmut wollen hie beweisen,
Ein Erbarn Radt dardurch zu preisen.
Ir wolts im besten nemen an,
Euch vnsern wiln gefallen lan.
Das wollen wir in gleichem fall
Vmb euch verdienen alzumal.
Vnd vnsern fleis vorthin nicht sparen.
Gott wol vns all vor arg bewaren,
Vnd in alln wegen stehen bey,
Dem selben danck, lob, ehre sey.

FINIS.

Egerunt collegæ
Gymnasij.

- M. Michaël Retellius Silesius.*
M. Achatius Curæus Prutenus.
M. Iacobus Ciglerus Misnensis.



Vom Ebruch Davidis mit Bethsabea
Vrias hausfrawen, 2. Regum 11.

ALS Kong David zu hohen ehn
Erhaben war von Gott dem HERRN,
Vnd nu in guten tagen lebt,
In aller wollust reichlich schwebt.
Vergift er Gottes gantz vnd gar,
Vnd was eins Konigs wolstand war.
Lest sich betboren mut vnd sin,
Felt in ein schrecklich sund dahin.
Im Krieg lest er fallen durchs schwerdt
Einen vnschuldgen burger werd.
Bringt in also vmb seinen leib:
Schmecht in darzu sein schönes weib.
Erzurnet Gott gar sehr dabey
Durch todtschlag vnd Ebbrecherey:
Verdienet zu wifach Gottes zorn,
Von dem er sehr geliebt zuuorn.
Der in het geben in sein hand
Den Scepter vbers heilig land.
Von dem er war ein Konig werdt
Erwelt, gesalbt, vnd hoch geehrt.
Der in erret von Saules hand,
Das er nicht fiel in seine band.
Der in seins Herren weiber schon
Geben, vnd gsetzt in seinen thron.
Es war die zeit hin nach mittag,
Da sich die hitz zu lindern pflag.
Als

Als David sich zu verlustieren
Gieng hin auff seinen Sael spacieren :
Von dar sah er ein schönes weib,
Das sie wusch jren zarten leib.
Ey hatte dich Bethsabee,
Der Kong sieht deine weisse knee.
Deck zu dein weisse fues vnd bein,
Du bist nicht, wie du meinst, allein.
O es werden des Konigs hertzen
Dein beinlein bringen grossen schmerzzen.
O wie viel besser es jm wer,
Das sie jm nicht gefallen zu sehr.
Die schon gestalt der Meidlin zart
Verwundt der Menner hertz sehr hart.
Das hertz wer herter denn ein stein,
Das nicht bewegt ein Meidlin fein.
Solt solchs wol in sein bluenden jaren
Ein jungen gseln nicht widerfaren :
So David sich so sehr lest narrn
Von der lieb, in sein alten jarn ?
Er war ein sechzig jeriger,
Ein grosser Kong vnd heiliger.
Er hat weiber ein grosse menge,
Noch lest er sich hie auff die lenge
Durch bose lust, vnd schonen glantz,
Der liebe band bestricken gantz.
Also felt man in sund vnd leid,
Durch ledigang vnd sicherheit.
Denn als dem Kong sein hertz beschwert
Der frau gestalt vnd schon gebert,

N 5 Vnd

Vnd er nicht bald sich dauon kert,
Sondern die flam mit gdancken mehrt,
Entzundt sie jn, vnd nimpt bald ein
Sein gantz en leib, sein marck vnd bein.

Also wen ichs durch blasen halt
Kompt ein fewr gros vnd schedlich bald
Von einem kleinen funcklin auß,
Das es verterbet manches haus.

Als David nu so hart bestrickt,
Er bald sein boten abhin schickt.
Vnd ließ die Frax sich furen zu,
Vor der er het kein rast noch ru.
Vnd brach die Eh als bald mit jr.

Ach wie wird das bekommen dir,
O David wo gedenckstu hin?

Wie sehr bethort dir mut vnd sinn
Die bose lust, vnd blinder radt
Das du nicht achtest solcher that?

Ein burger der dir ist gantz traw
Dem schmechst du sein lieb einge frauw.
Im Krieg wagt er fur dich sein leib,
So legstu dich zu seinem weib.

Wie dunckt dich doch vmb diesen man,
Dem in seim haus nie was zerran,
Er hatte alles vbrig gnung,

Vnd ein herd Schaff von alt vnd jung.

Als er aber ein herlich mael
Anrichten wolt in seinem Sael,
Wolt er nicht nemen aus seim stal
Ein Scheflin von der grossen zal.

Sondern

Sondern er nam zu seiner pracht
Mit gwalt, vnd gab es zu der schlacht,
Eim armen man sein lemlein zart,
Des er mit allem fleis gewart.
Denn er sonst keins mehr het darzu,
Das war allein sein frewd vnd ru.
Sein schatz, den er gekaufft mit gelt,
Das er sich zu eim gast erwelt.
Denn er es speist an seinem tisch,
wuchs auff mit seinen kindlin frisch.
Es tranck auß seinem becher wein,
Aß mit jm von der scheiben sein.
Er hielt's alzeit in seinem schos,
Es war jm eine frewde gros.
Gleich wie ein schones tochterlein
Pfleget jrem lieben vater z sein.
wie grewlich nu gehandelt dran
Der reicher geitzhals vnd tyran;
O David in der lieb erhitzt
So vbel handelstu auch jtz.
Du hast viel weiber zart vnd schon,
Die all nach deinem willen thon.
Mocht nicht fur dir Vrias allein
Sein einig weib behalten rein?
Du machsts zwar heimlich im verborgen,
Vnd thust dich des gar nichts besorgen.
Das Gott in alle winckel sieht,
Vnd das fur jm verborgen nicht.
Er wird aber am hellen tage
Dir aufflegen gar schwere plage.
Da

Da wird kein schloß, da wird kein thur
Dich hie können verbergen fur.
Von deinem eigen hause schir
Wird er die feind erwecken dir.
Die werden so sein abgericht,
Das sie dein bet auch schonen nicht.
Das schwert wird dir nicht bleiben aus,
Wird nimmer kommen von dein haus:
Du wirst falln in so grosse noth,
Das du sein woltest lieber todt.
Drumb das du nicht allein geschmecht
Vrias weib on alles recht,
Sondern hast auch lassen mit schand,
In fallen in der feinde hand.
Das kind, so von dir wird geberen
Bethsabee mit kleinen ehren,
Das wird kaum leben sieben tag,
Vnd sterben mit gros schmertz vnd klag.
Denn Gott ein grossen gewel hat
Vor solcher vngburlicher that,
Strafft die kinder in vngedult,
Wen sich die eltern so verschuldt.
So wird dein Sohn sich auch versehn,
Vnd bey sein Schwester schlaffen gehn.
Das wird jr bruder widder rechen,
Sein bruder mit dem schwert erstechen.
Wirds dabey doch nicht bleiben lan,
Wird sich ein schwerers vnterstan.
Er wird erregen widder dich
Auffrur, vnd so erheben sich,
Das

Das du daruon wirst fliben müssen,
Vnd so dein boses lustlein büssen.
Dan wird er auff dein bette schlaffen,
Vnd darin seinen willen schaffen.
Vnd also seines vatern ehr
Vor allem volck beschemen sehr.
Dann wirstu sein gar sehr veracht,
Verhont, verschmecht, verspot, verlacht.
Schand vnd dreuwort wirst leiden viel,
Vnd viel mit dir furn in das spiel,
Die deinem Sohn nach sein verlangen,
Oder dir werden selbs anhangen.
Vmb deiner lust vnz imlichs glimmen
Wird Galaad im blute schwimmen.
Zeuch nu hin vnd sey noch so geil,
Ich mein du hast nu kriegt dein teil.
Geh vnd brich noch ein mal die Ehe,
Nach kleiner lust folgt grosser wehe.
Hor lieber gselle, wer du bist,
Dem wol mit solchem naschen ist.
Auff diß exempel hab wol acht,
Vnd fleißig diß darbey betracht.
Hat dan ein solcher Konig nu,
Vnd heyliger Prophet darzu,
Von Gott sein lohn so schwer entpfangen,
Das er den holtzweg ist gegangen,
Vnd sich an eine andre ghenckt,
Meinstu es werd dir werden gschenckt,
Nein trawen, sich dich eben fur,
Die straff ist dir hart vor der thur.

FINIS.

INSIGNIA NOBILIVM
Prussiae de Sylslauia, hæredum
in Meselantz.

Sylslauiae clypeus gerit hæc insignia stirpis,
Digna Medusæi voce lyraq; chori.
Quattuor è viridi dependent termite glandes,
Quas habuere cibi secula prisca loco.
Prominet insigni duplex è casside cornu,
Quale potens Vrus fronte minace gerit.
Quam benè laude genus, titulisq; illustre vetustis,
Talia signa suæ nobilitatis habet.
Nam populi Dominos artes belliq; togæq;
Vt sua ritè gerant munera, scire decet.
Cum pax alma viget, syluas & iugera curent,
Suppetat vt populis vtilis esca suis.
Tum foueant illos, qui templa scholasq; gubernant,
Glandibus hæc florens denotat vmbro suis.
Sed cum Mars volitat, tunc hos tueantur & illos,
Quod sibi in armata cornua fronte volunt.
Sylslauiae proceres igitur cum gentis vtrunque
Infragili præstent præstiterintq; fide.
Vt meritò clypei quernas in imagine glandes,
Sic meritò in galea cornua celsa gerunt.

Honos Musis Habendus.

Quare complicatis manib.
oramus &

1. Ut testemur supra nos
esse quendam Deum quem
nos invocamus.
2. Ut testemur nullum esse q
nobis opem ferat cum ma-
nis nostrae sint quasi Viri,
etc., praeterq^{ue} DEUM.

1. Praeceptum cor & mentem ho-
minis informat;
2. instruit lingua & sermone
3. Docet de externis operib.
quib. Deum colamus.

Socrates eleganter invidia
appellavit Vleis anima.

Nulla sacrum melius docet enarra-
tio scriptum.

Quam repetens solidas lectio
crebra preces.

Sape lege & precib. ferventib.
erige pectus,

Ut tibi quae nescis, suggerat ipse
DEUS.

Quod nequeunt longis dare com-
mentaria verbis,

Hoc tibi cum precib. lectio
vincta dabit.

Mandatum, pax, pax publica,
dux ad fessum.


Unde Virg.
Vergil. will
sal man. dr
10. gebot. salz


Unde Virg. Virg. will
12. 13. Virg. dir. böhm. stanz
für ein
3. Unde Virg. Virg. will
Virg. will
4. Unde Virg. Virg. will
Virg. will

1
2
1
2
3
7

[Faint, illegible handwritten text, possibly bleed-through from the reverse side of the page]







Postl Die festl LVClæ. Costa, S. Vanna,
DICTYr In Le Cos, Hainzeler, Isse tV,
105.

AB 58731

ULB Halle


3

003 083 586



56





NABAL

1. Samuelis 25.

Ein Nemes

weltliches spiel in deutsche
reyme vbersetzt / vnd so wol eynem
Erbaren / Namhafftigen hochweyssen Rade
vnd ganker gemeyne der Königlichen
vnd weitberümbten stadt Danzig in
Preussen zu ehren / als zur vbung
der jugent im *Gymnasio*
daselbs agieret.

HENRICVS MOLLERVS
HESSVS.

Cum non esse queas Mimus, sis Zoile Momus.

Gedruckt zu Danzig / durch
Jacobum Rhodum
M. D. Xiiij.